

DE  
SACRIFICIO  
MISSÆ  
TRACTATUS ASCETICUS.

*Continens Praxim attentè, devote.  
& reverenter celebrandi.*

AUCTORE  
D. JOANNE BONA  
CONGREG. REFOR. SANCTI  
BERNARDI, ORDINIS CISTERCIEN.  
Abbate, Sac. Congreg. Indicis, Rituum, In-  
dulgentiarum, & S. Officii Consultore;  
Nunc S. Romanæ Ecclesiæ  
Cardinale.

*Zyremi Insula Vigens*

Biblioteka  
Ojców Kamedulów  
w Bieniszewie

*Iuxta Exemplar Roma Editum.*

COLONIÆ,

*Apud Viduam JOANNIS BUSÆI Bi-  
bliopolæ, ANNO M DC. LXXII.  
Superiorum permisſu.*

Bien. III. 4

A D  
SACERDOTES  
D E  
U S U E T S C O P O  
H U J U S L I B E L L I.

P R A E M O N I T I O .

**P**AUCIS te in hoc vestibulo sistam, quis es Christi Sacerdos, qui hanc meam lucubrationem evolvere dignaberis, ut in ea edenda propositum meum, ejusque scopum & usum noscas. Cum primùm Sacerdotio initiatus fui, illud protinus animo versare cœpi, quām ardua res esset suscepto ministerio ritè fungi, & ipsum Dei Filium pro meis & aliorum peccatis incruento sacrificio quotidie immolare. Actus igitur conscientiae stimulis, Sanctorum Patrum & recentiorum ferè omnium, qui de Missa sanctè celebranda aliquid ediderunt, scripta percurrens, plura ex illis documenta excerpti, quibus in unum congestis paucisque de meo additis, hoc opusculum composui, quod amicis impellentibus multos post

anno publici juris facio. Et primò quidem de ipso Sacrificio, ejusque valore & fructibus quædam generaliter præmitto. Secundò de his ago, quæ ad ritè & piè celebrandum Sacerdoti necessaria sunt. Tertiò de antecedentibus Missæ celebrationem, & de proxima ad eam præparatione. Quartò de ipsa celebratione. Demùm de his quæ sacro absoluto facienda sunt.

Inserui aliquot orationes & exercitia pro me, meique similibus adhuc in limine perfectionis hærentibus, quibus si quis assueverit, à distractionibus præservari, Deique amore succendi facile poterit. Alios autem, qui in altiori gradu sunt constituti, sublimiores exercitationes Spiritus sancti unctio docebit.

Porrò bæc exercitia non eo consilio descripta sunt, ut singulis diebus à Sacerdote rem divinam acturo peragantur: sed legendus aliquoties libellus est, donec documenta in eo tradita bene animo percipientur, & voluntas piis affectibus imbuatur: tum ea quisque seliget, quibus se magis affici senserit; & quoties celebrare voluerit, aliqua ex illis

ex illis pro suo arbitrio, & devotione assu-  
met.

Terret quosdam prolixitas, sed inexper-  
tos, qui tandem usu & exercitatione edo-  
cti, quæ prius ardua & operosa putabant,  
expeditissima esse, minimique negotii ex-  
periuntur. Velocius enim mens operatur  
quam lingua; & quæ non nisi longo ser-  
mone explicari possunt, unico mentis actu  
concipiuntur. Plura docebit usus, Deo ju-  
vante, cuius gratia ut mihi & omnibus, qui  
hoc meo labore uti voluerint, uberrimè  
aspiret, enixè deprecor, sed mihi præcipue,  
ne forte cum aliis prædicaverim, ipse repro-  
bus efficiar.

DE

# SACRIFICIO MISSÆ TRACTATUS ASCETICUS.

## C A P. I.

Quædam præmittuntur de ipso Mis-  
sæ Sacrificio.

§: I.

*Quale Sacrificium sit Missa.*

Uamvis in lege veteri plura fuerint sacrificia, in nova ratiōnen unicum est, quod omnium legalium hostiarum differentiam tantò perfectius complectitur, quantò excellentior, Deoque acceptabilior est victimā, quæ in eo immolatur. Est igitur Missa sacrificium latreuticum, sive honorarium oblatum Deo ad summum & supremum cultum atque honorem ipsi exhibendum, tanquam primo principio & ultimo fini nostro, in protestationem infinitæ ejus excellentiæ, dominii, & majestatis; nostræque ab eo dependentiæ, servitutis, & subjectionis. Est Eucharisticum in gratiarum actionem pro omnibus beneficiis naturæ, gratiæ, & gloriæ collatis & conserendis

rendis ab ipso Deo , ut summo benefactore. Est propitiatorium & satisfactorium pro peccatis & pœnis debitibus ; applicat enim omnibus, pro quibus offertur, vim & virtutem sacrificii crucis ; imò est idem sacrificium quoad substantiam, eadem hostia, idem principalis offerens , licet diverso modo offeratur. Ideò verò propitiatorium dicitur, quia hac oblatione placatus Dominus gratiam & donum pœnitentiae peccatoribus non ponentibus obicem concedit : Pœnas item peccatis debitas relaxat, quia per ipsum applicatur sacrificium Christi , qui pro peccatis totius mundi in cruce satisfecit. Basdem pœnas remittit defunctis existentibus in Purgatorio , quia ad eum quoque finem à Christo institutum est ; ut constat ex protestate, quæ confertur sacerdotibus in ordinatione, offerendi pro vivis & defunctis : nec potest hoc effectu carere, quia ex parte ipsorum nullus obex esse potest Porrò in illis, pro quibus tantum offertur, sive vivis, sive defunctis, tanta erit pœnæ remissio, quantam Christus ex sua misericordia taxavit. Licet enim res, quæ offertur sit infiniti valoris, nostra ramen oblatio non nisi finitum habet effectum, ut communiter docent Theologi. In iis verò qui simul etiam offerunt, augetur pro cuiusque affectu & & devotione. Denique quia Christus non

solam nobis remissionem peccatorum, sed alia quæcunque beneficia promeruit, idcirco hoc sacrificium est etiam omnium bonorum imperatorum, spiritualium quidem primò & per se, temporalium verò secundariò, & quatenus ad spiritualia conducunt. Sed quia ex se vim habet dumtaxat impetrandi in genere, ut aliquid determinatum impetretur, debet ad illud offerentis intentio specialiter applicari. Ad impetrandum autem pro Ecclesia: semper intervenit ejusdem Ecclesiae intentione, præsertim quoad ea quæ in orationibus Missæ à Deo petuntur: nam ipsa quoque Ecclesia est offerens in persona sui Ministri.

## §. II.

## De his qui offerunt hoc sacrificium.

**P**Rimum & præcipuum inter offerentes locum obtinet Christus, qui solus potuit acceptabile sacrificium offerte Patri, quod quia quotidiè offert per Sacerdotes ministros suos, idè dicitur sacerdotium habere semipernum, sicut scriptum est; *Tu es Sacerdos in aeternum secundum ordinem Melchisedech.* Non scilicet autem ex eo est offerens quod illud instituerit, quodque ei vim totam ex meritis suis contulerit; sed ex eo præcipue quod sacerdos in persona ejus, & tanquam Minister ac le-

ac legatus ipsam repræsentans sacrificat, ut constat ex verbis consecrationis, non enim dicit, Hoc est corpus, vel Hic est sanguis Christi; sed, Hoc est corpus meum, Hic est sanguis meus. Christus igitur, simul cum sacerdote idem sacrificium Deo Patri pro hominibus offert: & ex ejus Persona, cujus purissima sanctitas & dignitas infinita est, semper hoc sacrificium mundum est & gratum Deo, quamvis à Ministro peccatore offeratur.

Alter offerens est ipsa Catholica Ecclesia, cuius sacerdos Minister est, & in ea omnes fideles non excommunicati, qui etiam aliquaque ratione sunt offerentes per sacerdotem non tanquam per Ministrum, sed tanquam per Legatum seu mediatorem. Nam sicut tota Respublica dicitur agere quicquid ejus nomine Legatus suus agit: sic omnes Catholici dicuntur sacrificare, quia ipsorum nomine in persona totius Ecclesiae sacerdos sacrificat. Nen tamen omnes eodem modo: sed quidam habitualiter tantum, illi nimis qui nec adsunt sacrificio, nec cogitant de illo; quia tamen uniti sunt toti Ecclesiae per charitatem, censentur habitualiter idem facere quod illa facit. Alii causaliter, jubendo & curando ut quis sacrificet, quod maximè contingit in dantibus ad hoc elemosinam. Alii demum actualiter, qui sacrificio actu intersunt.

Tertius offerens & proprius minister hujus sacrificii est Sacerdos legitimè ordinatus, cuius tam firma & immobilis potestas est, ut etiam in hæresim lapsus, suspensus, depositus, degradatus, sive excommunicatus validè hoc sacramentum conficiat & offeat, licet illicite, dummodò legitimam materiam & formam adhibeat. Nec valor sacrificii minuitur, & si sacerdos pessimus, aut ab Ecclesia præcisus sit : non enim fructus ex qualitate Ministri, sed ex Christi institutione dependet.

## §. III.

## De vi effectiva hujus Sacrificii.

**D**uplex spectari potest in hoc sacrificio vis effectiva, una quam dicunt Theologi ex opere operato, independenter à merito & dignitate Ministri: altera quam vocant ex opere operantis, dependenter nimirum ab ipso operante, ejusque merito & bonitate, atque ab ipso preium, & virtutem accipiens. Primum effectum ex opere operato plures Theologi docent nec sacerdotem percipere ut offerens est, nec fideles quatenus sunt offerentes, sed quatenus pro ipsis offeruntur: hunc enim effectum sacrificium istud non habet nisi pro iis pro quibus est institutum, & eo modo quo institutum fuit

fuit: est autem institutum ut pro homini-  
bus offeratur, & ut illis dumtaxat proficit,  
pro quibus offertur: cumque sit applicati-  
vum virtutis sacrificii Crucis, non causae  
nisi in subjecto, cui talis virtus applicatur;  
id autem sit ab offerente, qui determinat ob-  
lationem pro tali persona. Constat sem-  
per fuit Catholicorum sententia habere hoc  
infallibiles & determinatos effectus ex ope-  
re operato, nisi ille pro quo offertur obicem  
ponat, remissionem videlicet alicujus pœ-  
næ peccatis jam remissis debitæ, vel do-  
num alicujus gratiæ prævenientis ad obti-  
nendam commissorum remissionem. Quod  
vero attinet ad vim imprestativam eam non  
esse infallibilem quotidiana probamus expe-  
riencia, non enim omnia quæ petimus, &  
propter quæ sacrificium offertur, semper im-  
petramus. Provenit hoc ex natura impresta-  
tionis, quæ requirit libertatem in dante, a-  
ded ut possit pro suo arbitrio negare vel con-  
cedere quæ petuntur. Petimus enim pro-  
posito aliquo motivo, quo putamus posse  
Deum moveri ad aliquid faciendum, sed ex  
eo non arctatur, vel propter pactum, vel  
propter institutionem ad concedendum. De-  
inde non impetramus, nisi voluntas nostra,  
respectu rei, quam petimus, sit conformis  
voluntati Christi, quæ cum nobis ignota  
sit, ei non possumus nos coformare. Cer-  
tum

hum nihilominus est non carere sacrificium  
cō effectu, quia tametsi id praecepsē Deus non  
boncedat quod postulamus; aliud tamen tri-  
but, quod hic & nunc magis judicat expe-  
dire.

Quo ad alterum effectum ex opere operan-  
tis duo sunt capita, ex quibus augeri potest.  
Primū est bonitas & dignitas operantis  
procedens ex habitu gratiæ sanctificantis &  
virtutum, quæ gratiæ annexæ sunt: nam quod  
sanctior est sacerdos & gratiōr Deo, eo  
magis acceptabiles erunt ejus preces, & oblatio-  
nes. Secundum est actualis devotio, qua sac-  
rificium offertur; nam quod major illa est,  
eo amplius ipsum prodest. Sicut enim alia o-  
pera bona à justo facta eo magis sunt merito-  
ria & impetratoria, plusque valent ad satisfa-  
ctionem & remissionē pœnæ, quo perfectius  
& ferventius sunt: ita hoc sacrificium sive  
spectetur ut est sacrificium, sive ut est sacra-  
mentum, quod ferventius peragitur & suscipi-  
tur; eo magis augetur meritum, magisque  
prodest pro se offerentibus & suscipientibus,  
& illis pro quibus offertur. Ideo satagere de-  
bet sacerdos, ut sit Deo valde gratus, & con-  
tinua virtutum heroicarum exhortatione  
crescat apud illum in gratia & sanctitate,  
semperque celebret cum ingenti fervore &  
devotione: sic enim fiet, ut tam ipse quam a-  
lii pro quibus offert, plures & efficaciores fa-  
ciliſſim

crificii effectus ex opere operantis consequantur.

## S. IV.

*De valore, & fructibus sacrificij.*

Quamvis nonnulli ex Theologis existimat hoc sacrificium ex opere operato valorem sive efficaciam intensivè infinitam habere, è quod sit idem quoad substantiam cum sacrificio crucis, resque oblata, corpus scilicet & sanguis Christi, sit infiniti pretii, & ipse Christus principalis offerens sit persona infinita; certior tamen & communior sententia est, non nisi finiti valoris esse. Potissima hujus Assertionis ratio ex Christi Domini voluntate desumitur, qui noluit hoc sacrificium ordinare ad fructum intensivè infinitum conferendum, sicut de facto rebelles Angeli non sunt redempti, quia Christus merita sue passionis noluit illis applicare. Alia ratio est, quia ad infinitam sacrificii efficaciam, præter hostiæ & principalis offerentis infinitatem, requiritur etiam ejus infinitas à quo immediate offertur. Cum igitur sacerdos immediatus offerens sit finitæ dignitatis, valor etiam sacrificii quo ad actualem influxum & efficientiam finitus erit, quia actio illa à supposito finito immediate producitur: & in hoc

in hoc differt à sacrificio crucis sacrificium nostrum, quia illud fuit immediate à supposito infinito, ideoque fuit actio secundum esse morale infinita, & Deo Patri infinitè grata. Favet huic doctrinæ communis fidelium sensus, qui plura pro se & suis sacrificia offerri curant, quod certè non facerent, si infinitam in singulis efficaciam agnolcerent. Posseint etiam sacerdotes unico sacrificio sexcentis obligationibus sati facere, quod Ecclesiastica verant decreta. Frustrà pro uno defuncto tot multiplicarentur sacrificia, quia unum sufficiens esset ad omnes animas liberandas. Misa denique cuiuslibet sacerdotis sacrificium Christi in cruce æquaret, quod idèò unicum fuit, quia valoris infiniti: neque considerandum est id quod in sacrificio continetur tanquam ens quoddam naturale agens secundum summum gradum virtutis suæ, sed ut ens liberum, cuius operatio tantam habet efficaciam, quantam habere vult ipsum agens principale Christus Redemptor noster, qui hoc incruento sacrificio vult nobis applicari finitum tantum & limitatum fructum suæ passionis. Habet igitur sacrificium efficaciam finitam in ordine ad omnes suos effetti, excepta vi impetrativa, quam idèò infinitam esse omnes fatentur, quia non constituit in aliquo quod producatur à sacrificio,

sed

*Tract. Asceticus.*

sed in excellentia & in rrinseca dignitate ipsius, quatenus objectivè movet Deum ad id quod petitur concedendum, quamvis semper non concedat, nisi cum judicat saluti nostræ expedire ut concedatur.

Si vero loquamur de infinitate extensiva, an scilicet sacrificium pro multis oblatum æquè singulis proficit, sicut uni proficeret, si pro eo tantummodo offerretur, gravis quæstio est præmissa distinctione fructuum Missæ diffinienda. Est igitur triplex portio valoris Missæ, seu triplex fructus, generalis, specialis, & medius. Primus pertinet ad omnes fideles, secundus est proprius celebrantis, tertius subest dispositioni sacerdotis, ut applicet cui voluerit. Primus ex eo provenit, quod generaliter pro omnibus fidelibus vivis & defunctis offertur, est enim idem quoad substantiam cum sacrificio crucis, quod pro omnibus oblatum est, & ex canone constat debere Sacerdotem pro omnibus applicare, pro Papa, pro Episcopo, pro Rege, totaque Ecclesia militante & purgante, & non potest non applicare, cum sit ab ipsa Ecclesia ad hoc specialiter deputatus. Quo circa hic fructus ad omnes fideles extenditur, qui ab Ecclesiæ unitate non sunt præcisi, & non ponunt obicem, & sic potest esse quodammodo extensivè infinitus, omnesque & singuli, si per ipsos non sit, integrum fructum percipere

pere possunt, ac si unus tantum esset. An autem hic fructus non solum impetrationem, sed etiam satisfactionem includat, controversum est. Secundus in hoc fundatur, quia sacerdos offert etiam pro se ipso, offero, inquit, pro innumerabilibus peccatis, & offenditionibus, & negligentiis meis. Debet enim, ut ait Apostolus, quemadmodum pro populo, ita etiam pro semetipso offerre pro peccatis. Provenit autem sacerdoti fructus, quatenus ab ipso ut publico ministro offertur; & ideo non est alteri applicabilis, nam dum offert pro se illis verbis, pro peccatis & offenditionibus meis, eo ipso sibi applicat, sibi verò applicatum non est alteri applicabile. Tertius colligitur ex natura sacrificii, quod ita institutum est ut pro hominibus offeratur, ac propterea illis prouidetur, pro quibus offertur. De hoc fructu medio communis sententia est, non esse infinitum extensivè, sed eò magis in singulis minuti, quo magis extenditur. Debet autem sacerdos hunc fructum illi applicare, pro quo specialiter celebrare tenetur ratione beneficii, eleemosynæ, præcepti superioris, vel alio quocunque titulo; idque ante Missam, vel saltem in Missa ante consecrationem, nam si essentia Missæ in sola consecratione consisteret, ut plerique sentiunt, applicatio post illam facta nihil valeret, sacrificio quo ad substantiam jam consummato.

*Qua praxis servanda in applicatione  
Missæ.*

**Q**uia diximus sacrificii fructum debere à sacerdotibus applicari, operæ pretium erit ex communi & magis recepta Theologorum sententia praxim aliquam sive methodum hujus applicationis praescribere, quæ ipsis sacerdotibus usui sit, ne eos labi in re tanti momenti & muneri suo deesse contingat. Et primò quidem observandum est sacerdotem multiplici nomine hoc sacrificium offerre, nomine Christi primi & præcipui offerentis ex cuius meritis sacrificii valor emanat, & ex cuius voluntate maximè pendet ejusdem applicatio: nomine item Ecclesiæ, cui meritorum suorum & satisfactionum dispensationem Christus commisit: deinde nomine proprio, quatenus libera sua voluntate offert, sibiique aut aliis pro suo arbitrio applicat: nomine tandem aliorum fidelium, qui simul cum ipso, sive per ipsum interno affectu offerre dicuntur, illorum videlicet qui Missæ inserviunt & assistunt, vel pro eaecelebranda eleemosynam largiti sunt. Porro Christus & Ecclesia sacrificii fructuum quoties offertur, participes esse volunt omnes fide-

fideles, dummodo capaces sint, & nullus in eis obex reperiatur: nec ulla requiritur ex parte sacerdotis celebrantis applicatio, ut communis hic fructus in omnes diffundatur. Omnium autem fructuum pars quædam notabilis, Christo sic volente & disponente, relata est liberæ applicationi, & determinationi tam ipsius sacerdotis celebrantis tamquam Ministri & mysteriorum ejus dispensatoris, quam aliorum simul cum eo offerentium, quod ex communi Ecclesiæ consensu morem fidelium approbant, quo exceptunt hoc sacrificium pro se peculiariter offerri, manifestum est, frustrè enim id facerent, si omnis ejus fructus jam applicatus esset, nec ullus per sacerdotis intentionem applicandus superesset. Sacerdos verò in hujus sacrificii actione aliis cum ipso offerentibus superior est, & ideo fructuum applicatio ab ejus intentione præcipue pendet, nam cum sit actus potestatis ordinis, ejus sub jacet voluntati. Sed quanta & qualis sit portio fructus, quam Christus Dominus voluit sive generatim ad omnes fideles, sive speciatim ad hos vel illos secundum intentionem particularem sacerdotis celebrantis derivari, incertum omnino est: neque enim sacra scriptura, nec Ecclesiæ traditio, nec concilia, aut Patres quidquam de hac re tradiderunt aut diffinierunt. Ideò satis est quod sacerdos

dos tantum de fructu sacrificii juxta devotionem, sive obligationem suam his aut illic applicare velit, quantum Christus Dominus ipsi applicandum concessit.

Observandum secundò, quod ut sacerdos sacrificii fructum validè applicet necessaria est ejus intentio, qualem requiri ajunt Theologi ut aliquod sacramentum validè conficiatur. Quapropter habitualis sufficiens non est; actualis optima atque laudabilis; sed non necessaria: sufficit enim virtualis, illa nimirum, quæ ab actuali proveniens & non revocata adhuc remanet secundum suam virtutem. Debet autem hæc intentio ipsam sacrificii actionem concomitari, & esse certa, & determinata, nec effectum sacrificii suspensum relinquere, quia non potest à futura conditione pendere. Quod si sacerdos fructum sacrificii nemini applicet, vel ille pro quo offert ejus capax non est, aut eo non indiget, manet fructus in Thesauro Ecclesiæ. Unde in casu optimum fore censem Theologi conditionatam habere voluntatem, & alium substituere, qui eo fructu potiatur: Optimum quoque aliquibus visum est, quod sacerdos, qui pro pluribus offerre intendit, eos specialiter & nominatim exprimat, non generaliter & in confuso, quia singulis minus prodesset; suum enim effectum producit, secundum modum quod applicatur, perfectior autem

tem applicatio est, cum omnes sigillatim nominantur. Ad scutulos denique evitandos, qui circa applicationem oriri possunt, debet sacerdos rejectis incertis opinionibus sacrificii fructus primò & principaliter illi applicare, pro quo celebrare tenetur ratione beneficii, eleemosinæ, promissionis, aut specialis obligationis. Tum sine ejus præjudicio & in quantum licet potest, aliis item applicare poterit sibi charitate aut alia quavis ratione peculiariter conjunctis, seu commendatis, suam intentionem intentioni Christi summi sacerdotis perfectè conformando, & submitendo: sic enim poterit tuta conscientia ex infinito & nunquam exhauiendo thesauro meritorum & satisfactionum Christi, cuius dispensator est constitutus, partem aliquam in plures derivare, quæ ex summa & ineffabili Dei misericordia non nisi uberrima sperari potest,

## C A P. II.

De requisitis in Sacerdote ad ritè & piè celebrandum.

## §. I.

*De puritate vita.*

**Q**uod olim David de templi ædificatio-  
ne, id

ne, id sibi sacerdos de divini sacrificii oblatione, & sumptione dictum putet: Opus grande est, neque enim homini preparatur habitatio, sed Deo. Ad Deum igitur accessurus, ut ipsius Dei unigenitum Filium incruentè sacrificet, cum timore & tremore tantum opus aggrediatur, propterque seipsum, & præviis dispositionibus præparat ad uberrimos sacrificii fructus percipiendos. Sunt autem tres præcipuae dispositiones, quæ in sacerdote requiruntur, Puritas virtutæ, Restitudo intentionis, & actualis devotio. Puritas virtutæ in duobus consistit. Primum ut sit mundus ab omni peccato non solum mortali, sed etiam veniali deliberato & scienter admisso, atque ab omni affectu erga ipsa peccata venialia. Levia siquidem peccata omnino vitare nequimus; at ipsorum affectum penitus ex animo evellere & possumus & debemus, adeò ut nulli voluntate & affectu inhæreamus. Alterum ut conetur omni studio esse purus & sanctus & ornatus omni virtute, sibiique propterea illud peculiariter dictum existimet, Qui justus est justificetur adhuc, & sanctus sanctificetur adhuc. Recte Chrysostomus, Quo non oportet esse puriorum tali frumentum sacrificio? quo solari radio non splendidiorem manum carnem hanc dividentem? os quodigne spirituali repletur: linguam qua tremendo

mendo nimis sanguine rubescit ? Cogita qualis sit  
insignitus honore, quali mensa fruaris : quod  
Angeli videntes horre scunt, neque libere au-  
dant intueri propter emicantem inde splendorem,  
hoc nos pascimur, huic nos unimur, & fatti sumus  
unum Christi corpus & una caro. Docet S. Tho-  
mas proprium effectum hujus sacramenti es-  
se hominem in Deum transformare, & ipsi  
per amorem assimilare. Quia ergo fide deberet  
esse imbutus, qua spe roboratus, qua succen-  
sus charitate, qua præditus innocentia, qui  
talem victimam quotidie immolat, Deum  
que suscipit, & in ipsum mysticè transforma-  
tur ? Quod si dispositio, ut ajunt Philosophi,  
ejusdērationis esse deber cum forma ad quam  
disponit : divina procul dubio dispositio ne-  
cessaria erit, ut recipiatur cibus divinus ; vita  
sic instituta, ut divina sit & superhumana, &  
mundanæ atq; carnali prorsus opposita. Qui  
sic vivit, secedit à creaturis, & soli Deo adhæ-  
ret : solus Deus in intellectu ejus est, solus in  
voluntate, solus in colloquiis, solus in operi-  
bus. Nihil in illo quod sapiat mundum, quod  
carnem redoleat & sensum : seipsum odio  
habet, corpus suum jugi mortificatione cru-  
cifigit, divitias spernit, honores fugit, amat  
nesciri & pro nihilo reputari. Discutiat ergo  
vitam suam sacerdos, & si talem nequaquam  
esse, sed adhuc tertenam deprehenderit, in di-  
vinam transferre satagit sedula virtutum ex-  
ercita-

ercitatione. Hic etiam pertinet externa corporis & vestium mundities, gravitas & maturitas, quæ Presbyterum hoc est seniorem deceat; talisq; compositio totius hominis, ut omnes ex solo ipsius aspectu ædificantur.

### §. II.

#### *De rectitudine intentionis*

**S**ecunda sacerdotis dispositio ad celebrandum est rectitudo intentionis, virtutis enim laudem vel vitii notam à fine, quem intendimus, actiones nostræ sortiuntur. Intentionem autem ut recta sit, non solum excludit omnem finem malum, & alienum ab ipsa sacrificii institutione, sed etiam vetat ad ipsum accedere ex sola consuetudine sine actuali tanti mysterii consideratione, & prævia præparatione. Sacerdos itaq; celebratus diligenter attendat quo fine moveatur, an propter damnable lucrum, aut aliquod temporale motivum, non cælestem panem, sed terrenum quærens; non animæ salutem, sed corporis emolumentum: ne sacrificio pro mundi vita instituto in sui perniciem abutatur. Finem sibi præfigat excelsum, cælestem, supernaturalem, qui Dei gloriam respiciat, propriam salutem & perfectionem ac proximi utilitatem. Huc dirigat suam intentionem,

ut per

ut per hanc victimam salutarem purgetur à peccatis, à languoribus animæ curetur, & ab ingruentibus malis protegatur: ut ab aliqua tentatione & adversitate eripiatur: ut aliquod beneficium impetrat, & de perceptis gratias agat: ut virtutes, augmentum gratiæ, & donum perseverantiae obtineat: ut pro variis proximorum necessitatibus, & pro requie Defunctorum Deum interpellat; & universam Ecclesiam ei commendet: ut cultum latræ Deo exhibeat, sanctisque honorem & venerationem: ut Christi passionem & mortem commemoret, sicut ipse præcepit dicens, *Hoc facite in mei commemorationem:* ut emendatus ab omni inquinamento carnis & spiritus le ipsum Deo conjungat, & inseparabiliter uniat, cum ipso consummatus in unum. Ex his & aliis hujusmodi motivis intentionem ante Missam dirigere oportet juxta formulam infra tradendam. Non est autem hoc loco prætermittendum quosdam eximiæ sanctitatis & doctrinæ viros semper memores incertitudinis vitæ quotidiè hac intimatione corpus & sanguinem Christi in Missæ sacrificio suscepisse, ut si eos contingenter ea die mori, Viaticum illis foret ad vitam æternam. Multum verò hoc proderit sacerdoti ad mortis & æternitatis memoriam sedulò renovandum.

*De actuali devotione:*

**T**ertia dispositio in actuali devotione consistit, quam ut in se excitet sacerdos, satagere debet primò, ut quicquid de hoc ineffabili mysterio, cœlestiumque charismatum thésauris in eo reconditis sacrosancta docet Ecclesia, firma fide apprehendat cum sublimissima corundem estimatione. Verbis enim consecrationis ab eo prolatis, panis in corpus, & vinum in sanguinem Christi transubstantiatur, atque ibi adest sub specierum velamine illud purissimum Christi corpus, quod pro salute nostra cruci affixum fuit: adest sanguis, qui pro nobis effusus est: adest anima gloria, in qua sunt omnes thesauri sapientiæ & scientiæ Dei: adest Christus verus Deus & verus homo, mirabilis in maiestate sua, qui venturus est judicare vivos & mortuos & sæculum per ignem. Necessaria secundò est ad excitandā devotionem humilitas, quæ præ cæteris virtutibus in hujus sacramenti institutione maximè enituit. Christus enim cum in forma Dei esset, exinanivit semetipsum, & sub exiguis speciebus panis & vini corpus suum & sanguinem atque Divinitatem conclusit, seipsum, exponens scelerorum hominum injuriis, qui pleni immunit.

ditiis ad ipsum accedere , cumque pollutis  
manibus correctare præsumunt. Parigitur  
est,sacerdotem tantam humilitatem imitari ,  
& in suum nihilū resilire,ac nihil de se præsu-  
mere Sola humilitas est, quæ dignè nos præ-  
parat ad tantum hospitem suscipiendum.  
Nulla nostra dispositio, nulla industria, nulla  
virtus ; sed sola Dei gratia nos dignos reddit:  
quare nostram debemus indignitatem agnos-  
cere, & soli divinæ misericordiæ inniti. Tertiò, quia Christus hujus mensæ delicias acer-  
bissima sua passione nobis promeruit, sanctos  
sacerdotes legimus ignem devotionis in se  
solitos succendere, jejuniis, flagellationibus,  
ciliciis, & alijs hujusmodi cruciatibus ; quos  
imitari & nos debemus Agno pro nobis occi-  
so nosmetipsoſ iſuolantes, silentio, solitudine  
abstinentia, sensuum custodia, non omissis  
exterioribus castigationibus juxta cujusque  
vires & conditionem. Multum denique pro-  
dest ad devotionem ingens fames, fervens de-  
siderium, atque ardentissimus amor hujus  
angelici panis , ad quem sumendum nos a-  
mantissime invitat Dominus dicens : *Venite  
ad me omnes, qui laboratis & onerati estis, & ego  
reficiam vos.* Quod si desit hoc desiderium, il-  
lud saltem desiderare, & à Domino petere  
debemus ferventissimis amoris actibus ; des-  
iderium enim pauperum exaudiet, & animam e-  
surientem satiabit bonis.

CAP.

C A P. III.

Variæ considerations ante  
Missam.

§. I.

*Quanta sit sacerdotum dignitas, & quan-  
ta debeat esse sanctitas.*

**N**ulla est inter homines dignitas, nulla excellentia, cui possit sacerdotalis sublimitas comparari. Omnium Principum fulgorem superat, omnium Regum potestatestatem excedit ; illorum enim auctoritas circa temporalia & terrena versatur, sacerdotis autem potentia etiam ad æterna & cœlestia extenditur, pro quibus comparandis omnes Principes & Reges ad sacerdotes confugere opem eorum implorare, seque illis subjicere non erubescunt. Ideò ab Apostolo dictus est sacerdos ab hominibus assumi, ut offerat dona & sacrificia ; ac si super alios elevatus communem hominum conditionem antecellat, quasi mediator Dei & hominum *in his quæ sunt ad Deum constitutus.* A Malachia item Propheta Angelis æquiparatur his verbis : *Labia sacerdotis cuspidient scientiam, & legem r̄equirent ex ore ejus, Angelus enim Domini exercituum est.*

Imò ex potestate quam habet absolvendi à peccatis, & conficiendi corpus & sanguinem Christi, etiam Angelis superior est, & ut ait Nazianzenus orat. 1. quædā illi divinitas inest, aliosque efficit Deos. Hæc te sedulò considerare oportet, quicunq; es Christi sacerdos, ne ad te pertineat Psalmographi sententia dicentis; *Homo cum in honore esset, non intellexit, comparatus est iumentis insipientibus.* Et similis factus est illis. Nihil in te terrenum sit, nihil commune eum populo. Sit Angelica conversatio tua, vita divina, mores illibati. Quid turpius quām honor sublimis, & vita deformis; sancta professio & illicita actio? Vide igitur quām dignè actio respondeat nomini, mores dignitati. Quod si sacerdotes antiquæ legis jussit Deus sanctos esse, ut incensum & panes propositionis convenienter offerrent; quanto majorem sanctitatem inesse tibi oportet, qui filium Dei quo cidiè offers & suscipis? Et si solet corpus ciborum quibus nutritur qualitatibus imbuī, æquum sane est, ut Christi in Eucharistia existentis, quo singularis diebus vesceris, conditiones imiteris, & virtutes perfectè exprimas. Latet Christus sub exiguis speciebus, nec ullo se specioso indicio manifestat: tu quoque Dei dona absconde, & ama nesciri, ac pro nihilo reputari. Ille ibi manet peccatorum, infideliū, ac etiam bestiarum injuriis expositus: tu similiter cunctis subje-

subjectus es tu, atque in omni contemptu & opprobrio patientiam serva. Ille omnes seipso pascit sine ulla personarum acceptione; & tu erga omnes liberalis es tu, sitque sincerus in te animarum zelus siae ullo humano respectu. Ille divisis speciebus nec laeditur nec dividitur: tu etiam pacatum animum ac omnino imperturbabilem in omni difficultate conserva. Ille nullum detrectat locum, & in eo stat, in quo collocatur a quovis sacerdote quantumvis scelerato: tu par i ratione ad omnia loca & officia indifferens es tu, nec ullum onus recuses quod tibi a superioribus imponatur. In hoc denique sacramento substantia panis & vini desinit esse, & sola remanent accidentia: & tu eodem modo in te debes annihilare omnem terrenam substantiam, omnes scilicet affectus inordinatos, gloriæ appetitum, prava desideria, dictamina hujus mundi, & quicquid perfectioni contrarium est,

## §. II.

*De excellentia hujus sacrificii.*

Cum Sacrificium sit primarium Religio-  
nis munus, planè decebat ut Christiana Religio, qua nulla perfectior & sublimiore esse potest, nobilissimum haberet sacrificium, cuius excellentia ex multis capitibus colligi

potest. Primiò ex eo quod in illo offertur, qui  
 est Christus Dominus, verus Deus & ve-  
 rus homo: & quia nihil excelsius illo est,  
 ideo ratione ipsius actio ipsa sacrificandi o-  
 mnes humanas actiones excedit, etiam a-  
 ctus sanctorum in Cælis Deum amantium.  
 Cavendum ergo ne nostra irreverentia & in-  
 devotione tam magnæ rei oblationem deho-  
 nestemus. Et si Deus olim sacerdotibus præ-  
 cepit. Mundamini qui fertis vas a Domini, quan-  
 tò majori puritate nos enitere debemus, qui  
 purissimum Christi corpus, & pretiosissimum  
 sanguinem Deo offerimus? Secundò ex per-  
 sona cui offertur, qui est solus Deus. Nulli e-  
 nim sanctorum, nec ipsi B. Virgini offerri  
 potest, sed ex ipsa intrinseca rei natura conve-  
 nit soli Deo, quia per sacrificium testificamur  
 Deum esse primum principium & ultimum  
 finem nostrum, & supremum Dominum o-  
 mnium rerum, cui in signum nostræ subje-  
 ctionis aliquod sensibile offerimus ad signi-  
 ficandum per rem sensibilem oblatam sacri-  
 cium internum, quo anima se offert Deo sicut  
 principio suæ creationis, & sicut fini suæ bea-  
 tificationis. Hoc autem nec ipse Deus per  
 absolutam suam potentiam efficere potest, ut  
 alicui creaturæ conveniat. Tertiò ex ipsa  
 consecratione, qua panis & vinum in cor-  
 pus & sanguinem Christi transubstantian-  
 tur, manentibus accidentibus sine subjecto.

Est

Est autem hæc actio omnino supernaturalis,  
quæ nullo modo pendere potest ab aliqua  
potentia creatæ tanquam à causa principali,  
quia solus Deus efficit transubstantiatio-  
nem. Quartò ex valore ipsius sacrificii, qui  
est infinitus sicut merita & passio Christi, ac  
proinde æquè placet Deo, ac mors ejus in  
cruce, licet effectus finitus sit. Quintò ex fine  
propter quem, cæteris omnibus abolitis insti-  
tutum fuit, ut nimirum per ipsum Deo crea-  
tori nostro cultum latræ tribuamus, no-  
stramque servitutem & subjectionem humil-  
limè testificemur ut dignas ei gratias perpe-  
tuò agamus pro universis beneficiis ejus: ad  
auxilia divinæ gratiæ, ejusque protectionis,  
excitationis, & directionis impetranda: ad  
obtinendam peccatorum veniam: ad iram  
Dei placandam, & imminentia flagella  
avertenda: ad succurrendum omnium vi-  
vorum & defunctorum necessitatibus, quæ  
sunt penè infinitæ. Porrò ex his clarissimè  
constat nullam posse majorem in hac vita,  
aut præstabiliorē actionem à mortalibus  
exerceri, quam offerre Deo h e sacrificium.  
Ideò nullus seu Rex, seu Pontifex  
esset, qui Sacerdotem celebrantem quacun-  
que ex causa accertere, cœptumque sacri-  
ficium interrumpere auderet. Quia vero  
Sacerdos hoc sacrificium peragit in persona  
Christi, ita te gerere debet, ne quid in

ipso sit quod Christi personam dedebeat : si-  
cut legatus Regis personam sustinens sum-  
moperè caver, ne quid indecorum , & suo  
munere indignum committat.

## §. III.

*De ejusdem necessitate.*

**D**Ebet sacerdos sollicitè considerare quām  
sit necessarium hoc sacrificium , quo  
summoperè indigent & qui sunt in hoc mun-  
do & qui in purgatorio, hi ut citius liberen-  
tur, & ad perennem felicitatem perveniant :  
illi ut continuis Dei præsidiis adjuventur.  
Ad ipsum enim spectat, tanquam ad legatum  
totius orbis , omnium petitiones ad Deum  
ferre, omnium necessitates spirituales & cor-  
porales eidem exponere, & singulis obtainere  
quod singulis prospicit ad salutem. Sunt autem  
necessitates spirituales primum peccata, qui-  
bus plenissima sunt omnia regna mundi in  
quovis ferè hominum statu & conditione.  
Deinde sunt tentationes internæ & externæ  
à corrupta natura, à sensibus & membris, ab  
extrinsecis objectis rerum & personarum, à  
volubilitate liberi arbitrii, à dæmonibus o-  
riri solitæ, ea que innumeræ & superatu dif-  
fices. Sunt denique occasions extrinsecæ  
malorum ad peccata allientes domi & fo-  
ris, & hinc perpetua pericula æternæ damna-  
tionis. Necessitates corporales sunt etiam in-  
nume-

numerabiles, quibus omnes vel premuntur,  
vel sunt obnoxii: morbi videlicet, bella, per-  
secutiones, lites injustæ, inimicitiæ, odia, ca-  
lumniæ, contumeliæ, paupertas, mendicitas,  
amissiones bonorum, exilia, carceres, insidiæ,  
doli, fraudes, pugnæ civiles & domesticæ,  
jurgia, detractiones, & multiplices injuriæ  
dominorum, servorum, vicinorum, & qualiū,  
quæ passim inferri solent manifestè vel occul-  
tè. Sunt igitur in magna necessitate Catholici  
malè viventes, qui peccati mortalis nexibus  
irretiti computrescunt in fæcibus suis: omnes  
quoque infideles Hæretici, Schismatici, Ju-  
dæi, Pagani, & Turcæ, qui veri Dei cogni-  
tione carentes in tenebris vivunt: neque hi  
omnes à statu adeò infelici naturæ viribus e-  
mergere possunt, nisi respiciens desuper Pater  
misericordiarum potenti virtute eos excitet  
& præveniat. Justi item tepidi, & imperfecti,  
& alii etiam ferventes quibus continuum  
imminet periculum cadendi in peccatum  
mortale & gratiam divinam amittendi, cum  
sit tanta depravatæ naturæ fragilitas, tanta  
carnis rebellio, tanta dæmonis rabies, tanta  
vis pravorum habituum, tanta mundi corru-  
ptela. Sunt & alii sine numero suprascriptis  
calamitatibus pressi: Quidam enim opedi-  
vina indigent ad aliquam tentationem supe-  
randam, alii ad aliquam virtutem acquiren-  
dam, sive ad aliquem actum supernaturalem

eliciendum. Quidam in mari sunt, alii in via non satis tuta. Hic vexatur inimicitiis, ille calumniam patitur: nonnulli paupertate, alii morbis, scrupulis, litibus, ærealieno, aliisque calamitatibus affliduntur. Multi sunt in periculo mortis constituti, à qua pendet æternitas, quos modo prorsus inexplicabili torquent & cruciant peccata commissa, bona omissa, temporalia quæ relinquunt, æterna ad quæ properant. Gravissimam denique necessitatem patiuntur animæ defunctorum in carcere Purgatorii detentæ, quarum tota spes in suffragiis nostris sita est, cum ipsæ pro se nec satisfacere, nec quicquam possint impretrare. Horum omnium infinita multitudo supplices manus extendit ad sacerdotem miserabili ejulatu clamans & deprecans, ut partem aliquam divini auxilii singulis impetraret, porrectis in Missa supplicibus eorum libellis, quos seriò & ferventer, magnoque affectu æterno Patri commendare debet. Turpe enim esset in conspectu tantæ majestatis distractione vel hæsitatione insultam reddere legationem, & tanti ponderis negotia frigidè ac perfunditoricè pertractare.

## S. IV.

*Qua reverentia celebrandum sit.*

Duplex est reverentia, interna & externa,  
Internæ

Interna in timore & tremore, in humilitate & compunctione cordis consistit. Ad externam pertinent totius hominis compositio & gravitas, omniumq; cæremoniarum ac prælcriptorum rituum observantia. Quanta verò cura adhibenda sit, ut hoc augustinum sacrificium omni veneratione ac reverentia celebretur, facile intelliget sacerdos, si ex una parte consideraverit nullum opus sanctius ac divinus à Christi cultoribus tractari posse, quam hoc ipsum tremendum mysterium: ex altera verò perpendat maledicū vocari in sacris literis qui facit opus Dei negligenter. Quod si Regē alloquiturus magno metu stat corā illo, nec audet oculos ab eo divertere: quanto majori trepidatione, humilitate, ac solicitudine, in conspectu divinæ majestatis astare oportet, tota mente in ipsum Deum intenta, qui non solum externū aspectum, sed intima etiā animi penetralia intuetur? Quid turpius & pœna dignius, quam quod peccator sacro altari irreverenter assistat, ubi sancti metuunt, pavent Angeli, tremunt Potestates, & supremi Spiritus faciem suam velant præ verecundia & confusione? accedit nox ad lucem, infirmus ad omnipotentem, servus ad Dominum, creatura ad Creatorem, & non formidat, non contremiscit? Proderit etiam ad excitandum reverentiae affectum consideratio gaudii, quod S. Trinitas &

omnes cœlites ex devota & reverenti Missæ  
celebratione percipiunt : tum quia id sacrificium  
testamenti loco à Christo relatum est,  
in pignus amoris quo suos in finem dilexit :  
tum quia est mortis illius commemoratio ,  
qua intercedente peccata nostra deleta sunt,  
homines redempti, sancti salvati, & nos qui  
vivimus innumeris beneficiis cumulamur.  
Cavendum ergo ne quid sacrificans admit-  
eat, quod istam minuat lætitiam Dei & san-  
ctorum, quæ ex hujus sacrificii suavissimo o-  
dore promanat. Ad eandem denique rever-  
entiam comparandam debet sacerdos soler-  
ter præmeditari quam sapienter & exactè S.  
Ecclesia divinitus edo & a tortius sacrificii or-  
dinem, modum, & apparatum præscripserit  
& instituerit. Nam primò culpas veniam pre-  
cando confitetur : tum Deum laudat & ado-  
rat, ei que de acceptis beneficiis gratias agit :  
opem divinam sibi & aliis implorat : nec ul-  
lum officii genus prætermittit, quod possint  
mortales sanctè cum Deo exercere. Jungit  
autem cum his externam confirmationem ,  
habitumq; corporis maximè decentem & re-  
ligiosum : vel stat vel flectit genua, aperto  
semper capite, manibus modò junctis, modò  
protentis, & in cælum sublatis , quæ omnia  
aptissima sunt ad reverentiam in ipso cele-  
brante & in astantibus conciliandam. Nec  
quocunque modo, sed præstantissimo Deum  
alloqui-

alloquitur : secretò enim loquitur & veluti ad aurem, sicut amicus cum amico. Loquitur non suo, sed totius Ecclesiæ nomine, & à Deo auditur tanquam gerens personam publicam, nulla habita sui ratione, sive bonus, sive malus sit. Loquitur in publica celebritate coram universa cœli curia, & hominibus qui adstant: atque ideo in solemnî confessione, quæ Missæ præmittitur, & sanctos & populum appellat ; & in præfatione Deum precatur, ut voces suas cum Angelorum vocibus admitti jubeat. Loquitur cum Christo Domino, qui in sacramento præsens est, ejusque preces simul cum ipso æterno Patri præsentat. Verba tandem, quæ loquitur non ipse suo ingenio compositi; sed vel à Christo tradita sunt, vel in sacris literis à Spiritu sancto dictata, vel sanctorum Patrum & conciliorum auctoritate comprobata : quare nihil proferre potest quod non sit Deo gratissimum & summè acceptum. Toris itaque viribus conari debet, ut tam sanctum ministerium quam maxima fieri potest reverentia & sanctitate exequatur : & depositis terræ fôrdibus Angelica putitate elucescat.

## §. V.

*Alia considerationes ad pios affectus in celebrante excitando.*

**V**Ix fieri poterit ut non attentè, devotè & reverenter celebres, quisquis es Christi sacerdos,

cerdos, si fide viva hanc veritatem perceperis, & intimo sensu apprehenderis, te ipsum Christum offerre, unigenitum Dei filium, salvatorem & judicem tuum. Sed huic veritati magnum momentum ex hoc accedit, quod perfectiorem Christi humanitatem nunc in Missa Deo offers, quam ipse obtulerit in ultima cœna. Nam primò Christus mortalem obtulit, tu immortalem: ille passibilem, tu impassibilem. Secundò nunc eadem offertur cum plena pro nobis satisfactione, omnia siquidem ipsius merita ejusdem morte completa sunt. Tertiò quia humanitas Christi & si à principio sanctificata fuit in unione hypostatica, cum tamen in passione oblata est Deo, novam acquisivit sanctificationem, ut hostia scilicet tunc actualiter exhibita, & nunc offertur in Missa hac nova sanctificatione exornata. Adde quod Christus mirabiliori modo in sacramento existit quam in celo. Totum enim ejus corpus in totis speciebus est, & totum in qualibet minima earum parte sine quantitate coextensa ad locum; ita ut ejus praesentia nec quidem à supremis spiritibus per principia naturalia naturaliter videri possit. Sunt & alia innumera mirabilia, quæ satius est venerari quam enarrare. Nam ut reliqua prætermittam, quis dignè poterit explicare, vel saltem animo concipere, quād magnum beneficium

facium sit, quod mediante hoc sacrificio cælum in terris quadam anticipatione possident homines, dum ante oculos habent, manibusque contrectant ipsum cæli & terræ conditorem? Hoc sedulò contemplare & erubescere, quod adeò tepidè, & irreverenter hæc tremenda mysteria audeas celebrare.

Extende cogitationem tuam per universum mundum, quam malè ubique Deo serviant homines, quot peccata committant: quam pauci sint Religiosi qui perfectioni sedulò incumbant: quam multi qui in rebus vanis & otiosis jugiter occupati vix unquam de Deo cogitant & loquuntur. Ideò tactus dolore cordis intrinsecus ardorem & affectum vehementissimum in te excita erga Dominum Deum quem plerique mortaliū vel non agnoscunt, vel spernunt: tum sacrificium ea devotione offerre satanas, ut Dominus si fieri possit, ejus suavitate, quam habet etiam ex opere operantis, quodammodo recreatus, eorum omnium obliviscatur, quæ contra sanctissimam ipsius voluntatem ab hominibus perpetrantur. Ex altera verò parte in cœlum animo ascende, & considera quanto fervore cælites universi Deum ament, & quam suavi harmonia ipsius laudes uno ore decantent. Jungite illis, & similes elice amoris ac laudum affectus: sed cave, ne vocistus ac morum

caco-

cacophonia Beatorum dulcissime concinen-  
tium concentum perturbes.

Cum hoc sacrificium Christi passionem &  
mortem repræsentet, veluti quædam imago  
& actio tragica est, non verbalis, quales sunt  
Poëtarū Tragœdiæ, sed realis & substantia-  
lis, exprimens incruentè passionem illam &  
mortem cruentam, ex qua omnia bona tua &  
aliorū, omnesq; thesauri divinæ gratiæ pro-  
fluxerunt. Solerter itaque adverte, quam fer-  
vida devotione tanti boni repræsentatio à te  
fieri debeat. Sunt spectatores hujus Tragœ-  
diæ §§ Trinitas, Humanitas Christi in cœlo,  
Angeli, & Animæ beatæ: cave ne quid inept-  
um vel indecens in te appareat, quod Dei ac  
cœlestium civium purissimos oculos possit  
offendere. Id verò assequeris, si perpetuam in  
te ipso corporis afflictionem, & passionum  
mortificationem expresseris, vivamque me-  
moriā in te conservaveris acerbissimorum  
Christi cruciatuum, quos hoc sacrificio com-  
memoras & repræsentas, & eosdem aliis pro-  
polueris morum ac vitæ severitate.

## C A P. IV.

De his quæ Missæ celebrationem  
proximè antecedunt.

§: I.

De necessitate Præparationis.

**A**NTE orationem, ait Sapiens, prepara ani-  
mam

mam tuam, & noli esse quasi homo qui tentat Deum. Quod si Deum tentare atque ad iracundiam provocare dicitur, qui ipsum audet in oratione interpellare, non præmissa diligenti & accurata præparatione: quanto magis eundem sua temeritate & audacia irritabit, qui Unigenitum suum illi offerre, ipsumque fulciperi imparatus præsumet? Et si Rex aut Princeps magnæ potentiae tibi, ô Sacerdos, significasset, ut illi hospitium crastina die parares, quanta solicitudine expurgare domum & ornare satageres, totam etiam noctem ducens insomnem, ne quid ille veniens incompositum & indecorum reperiret? Nunc verò Rex Regum, & Dominus dominantium mandat tibi per Prophetam dicens, *Prepara-re Israel in occursum Dei tui,* quia ecce ego veniam, & manebo in medio tui. Vide ergo & considera quanta diligentia thalami tui tergere lordes debeas, quali apparatu ipsum ornare, quo dignus fias à tanto hospite visitari. Talem se Deus exhibebit animæ tuæ, quallem se illa præparaverit ei: quantumque tu apposueris ad diligentiam, tantum ille adjicet ad gratiā. Vetus parœ nia est, *Adoraturi sedent,* qua parvum purgatumque animum ad Deum afferre monemur. Quidam etiam Ethnicus ait, *Dimidium facti, qui cœpit. habet:* in singulis enim actionibus id in primis curandum est, ut recte ordiamur. Omnia au-

tem optima præparatio , & magis necessaria illa est, quæ in puritate & sanctitate vitæ consistit ; cum quicquid agis , quicquid cogitas , quicquid moliris ad hunc scopum refers, ut vivas vita divina , reque dignum reddas hoc cœlesti convivio. Sicut enim frumentus frequentis celebrationis in hoc præcipue attenditur, ut quotidiè crescas in humilitate, patientia, mundi contemptu, & charitate : ita vera præparatio in hoc sita est, ut quotidiè aliquid vitii deponas, aliquid virtutis acquiras , donec possis cum Apostolo dicere : *Vivo ego, jam non ego, vivit vero in me Christus.* Et illis quidem , qui Deo iugiter adhærentes mentem habent rebus divinis exercitaram, non erit difficile sanctioris vitæ incremento se ad dignè celebrandum rectè disponere : aliis vero , quorum major numerus est, qui minus idonei sunt ad animum sursum erigendum, varia Sancti Patres documenta præscribunt , quibus adjuti ad Deum accedant tali cura, & dispositione, quæ tanto mysterio digna sit. Quædam ex his jam supra à nobis tradita sunt : alia infra explicabuntur.

## §. II.

*De præmittenda confessione sacramentali.*

**F**ormidabilis est, & non sine horrore audienda

dienda Apostoli comminatio dicentis : *Qui-cunque manducaverit panem hunc, vel biberit calicem Domini indignè, reus erit corporis & sanguinis Domini. Quare celebrate volenti revo-candum est in memoriam ejusdem præcep-tum, Probet autem seipsum homo, & sic de pa-ne illo edat, & de calice bibat ; qui enim man-ducat & babit indignè, judicium sibi manduca-t & babit. Et quidem probatio omnino necel-faria est, ut nullus sibi conscientia mortiferæ la-bis ad sacrificandum præsumat accedere non præmissa sacramentali confessione quantum-vis sibi contritus videatur ; alioquin panem vitæ in mortem & condemnationē accipiet. Ut verò ex hoc divino convivio, quod sanctis animabus inexplicabiles præbet delicias, mens abundantius reficiatur, non solum à mortalibus, sed etiam à venialibus culpis, & ab omni terreno affectu eam expurgare o-portet, & puram ac vacuam Deo exhibere gratiæ suæ donis implendam , & exornan-dam. Hac de causa boni sacerdotes, quos te imitari par est , vel quotidiè, vel alternis diebus, vel bis saltem in hebdomada animo verè contrito ad confessionem solent accede-re , omnesque malorum radices evellere conantur, atque omnem vel levissimam ma-culam abstergere. Quod si nihil sacra-men-to pœnitentiæ expiandum occurrat , in-teasum nihilominus contritionis aëtum de-to-*

de totius vitæ delictis elicere non omittes ,  
quia cor contritum & humiliatum Deus non  
despicet.

In ipsa autem confessione vitanda prolixitas , & nimia diligentia in levioribus culpis recensendis : satius enim est intimè de iis dolere , & per devotam cordis ad Deum conversionem eas expiare , quam in iis ad instar historiæ fine proposito emendationis , sicut ut plurimum contingit , enarrandis immorari . An verò expediatur quotidianas imperfectiones in confessione explicare , ut status penitentis notior sit Confessario , non est una Magistrorum spiritualium sententia ; tutior tamen & communior est oportere eas extra sacramentum manifestare . Cavendus item multorum error , qui se prolixè de iis accusant , quæ peccata non sunt , ut de pravis habitibus , & passionibus & de circumstantiis im- pertinentibus ; quod sint superbi , iracundi , & proni ad malum ; quod Deum non amaverint ex tota cordis intensione , & aliae ejusdem generis multa , de quibus & aliis ad confessionem pertinentibus suadeo ut omnino legatur tractatus S. Bonaventuræ de modo confiden- di , & puritate conscientiæ . Confessioni au- tem duplex præparatio præmittenda , remota & proxima . Remota in hoc consistit , ut per vigilem cordis custodiam , profundam tui cognitionem , & exactam discussionem , eam compa-

comparare studeas conscientiæ teneritudinem & puritatem, quæ commissos defectus statim sentiat, & fideliter memoriæ suggerat. Deinde assuesces actum contritionis frequentare, & quotidianum examen sic instituere, ac si statim confiteri deberes. Proxima aliquot actus complectitur: nam primò gratiam efficacem petere debes omnia peccata agnoscendi, detestandi & emendandi: tum in memoriam revocanda quæcunq; ab ultima confessione commissa sunt: Demum de singulis actum doloris elicies cum firmo constantiq; proposito ab his deinceps abstinendi, & satisfaciendi. Quod si peccata leviora sint, quia omnia corrigere propter humanam fragilitatem difficile est, propones saltem & conaberis, quoties ad confessionem accedis, aliquod ex his deponere, in quod frequentius labi soles.

### §. III.

#### *Modus confitendi.*

**Q**uandoquidem hujus sacramenti pars essentialis eaq; præcipua est dolor & contrito ob admissa facinora, huic maximè insistes, præmissa brevi consideratione alicujus motivi ejusdē contritionis, qualia hæc sunt.  
1. Gravitas peccatorum, quibus offenditur Deus, cuius bonitas infinita nec levissime quidem lœdenda foret, etiam ob salutem totius

tius mundi. 2. Atrocissima damna, quæ tam  
in ista quam in altera vita ex peccato oriun-  
tur. 3. Inscrutabilitas judiciorum Dei sæpè  
ingratos deferentis, & tepidos evomentis. 4.  
Brevitas & incertitudo temporis gratiæ, quo  
potest offensa Dei expiari. 5. Memoria æter-  
nitatis, ejusque interminabilis durationis. 6.  
Inæstimabilis dignatio Dei, qui tanta passus  
est, ut te à peccatis liberaret. 7. Magnitudo  
beneficiorū tibi à Domino collatorum, pro  
quibus turpissimum est non te gratum benè  
vivēdo exhibere. 8. Sublimitas æterni præmii,  
& facilitas mediiorum ad illud acquirendum.  
9. Infinita amabilitas Dei infinito obsequio  
propter se dignissimi, quia ipse est summum  
bonum, qui te amore incomprehensibili pro-  
sequitur.

Hæc motiva si attente consideraveris, fa-  
cile poteris summam in te contritionem ex-  
citare. Sic autem dispositus ad pedes confes-  
farii accedes, quasi ad lavacrum sanguinis Je-  
su Christi, in quo te ab omnibus inquina-  
mentis tuis dealbandum fore confides. Duos  
ibi sacerdotes adesse putabis, visibilem unum,  
alterum invisibilem, qui penetralia cordis  
intuetur. Ideò humillimè quasi filius prodi-  
gus resipiscens benedictionem petes, & gra-  
tiam benè confitendi, præmissaque generali  
confessione actum contritionis renovabis.  
Tum magna interiori & exteriori reverentia,  
quanta

quanta Judici solet à reo exhiberi, peccata tua sacerdoti, qui Christum Judicem repræsentat, confiteberis nude, sincere, humiliter, non ex habitu & consuetudine plorans coram Deo flagitia tua cum rubore & confusione. Dum vero sacerdos profert verba Absolutionis, iterum actum contritionis elicies, teque à Christo ceu filium prodigum osculo excipi, nova stola ornari, amplexu constringi putabis, additis ab eodem illis verbis, *Remissa sunt tibi peccata tua, jam amplius noli peccare.* Quare gratias ei ages dicens cum Prophetā: *Nunc coepi, & incipies ab illa hora vitam sanctius instituere.*

Post confessionem id quod impositum tibi fuerit pro satisfactione statim persolves, Deoque offeres in unione passionis Christi, & satisfactionum omnium sanctorum. Deinde examinabis an vera fuerit contritio elicita, an intima cordis penetraverit, an diligentem discussionem præmisieris, an culparum gravitatem aguoscas, an aliquid prætermisieris, an tibi ex ignavia aguoscas, an te ipsum arguas, & ad serio pœnitendum impellas.

## §. IV.

*Oratio ante confessionem, & actus contritionis.*

**A**d te, Piissime Jesu, refugium meum & conso-

& consolatio mea, ad te mōrens & tristis vē-  
nio recogitans tibi annos meos & delicta  
mea in amaritudine animæ meæ. Ad te verba  
doloris effundo misericordiam tuam implo-  
rans, ut facias opus tuum, quod est misereri  
& parcere, tollens peccata mea, quæ sunt  
maxima miseria mea. Ne despicias vōces &  
singultus ovis perditæ & filii prodigi ad tuam  
pietatem redeuntis de regione longinqua,  
non enim lātaris in perditione morientium,  
qui ut ego non morerer, mortem subire dignatus es. Vermis terræ retribui tibi mala pro  
bonis: & heu quot mala & quam gravia pec-  
cata pro tantis & tam eximiis bonis. Et ta-  
men loqueris ad sponsam tuam prævarica-  
tricem animam meam, postquam fornicata  
est cum amatoribus multis, ut revertatur ad  
te & suscipes eam, quia misericordia tua su-  
per omnia operatua; & major est bonitas  
tua, quam iniqüitas mea. Surgo igitur & ve-  
nio ad te corde contrito & humiliato: venio  
ut laver, ô fons æternæ vitæ, ad quem sitio  
sicut cervus ad fontes aquarum: venio ut il-  
luminaet, ô lux mea, & amem te, & confitear  
adversum me injustitiam meam. Emittelu-  
cem tuam & veritatem tuam, & illumina  
mentem meam, ut omnia mala mea quæ  
commisi, & bona quæ omisi distinctè co-  
gnoscam, & integrè confitear; nec me per-  
mittas computrēscere in fōribus meis,  
tu qui

tu qui omnium misereris, & nihil odisti eorum quæ fecisti. Fac me assueta mala relinquare, & tibi placitis operibus occupari, ut ubi abundavit delictum, tua gratia superabundet: & sicut fuit sensus meus ut errarem à te, decies tantum iterum conversus requiram te. Doleo benignissime Jesu, de omnibus & singulis peccatis meis, eaque detestor super omnia mala, non solum arido & imperfetto corde meo, sed corde etiam & affectu omnium verè pœnitentium, ex gratuito tui amore, quia Deus es infinito amore dignissimus: firmiterque propono quælibet potius subire mala, quam iterum peccato consentire. Exactissimè item confiteri volo, tibique & proximo integrè satisfacere, atque omnes peccandi occasiones deinceps evitare. Quicquid verò mihi deest, suppleat mors tua, sanguis tuus, & superabundātia merita tua, quibus fretus veniam obtinere spero, & gratiam mores meos corrigendi, & in bono usque ad finem perseverandi. Et nunc, Domine, qui dedisti mihi cognoscere flagitia mea, perfice contritionem meam, & perduc ad finem satisfactionem meam. Ureme igne amoris tui, & separa à me quicquid displiceret majestati tuæ. Purifica omne quod tibi placet in me, ut in te vivam non in me; & in te moriar ac propter te, salvator meus, Qui vivis & regnas in saecula saeculorum, Amen.

*Oratio post Confessionem.*

**G**ratias ago tibi Domine Pater, & dux vi-  
tae meæ quia non secundum peccata mea  
fecisti mihi, sed superexaltasti misericordiam  
judicio, & projecisti in profundum maris o-  
mnia delicta mea. Arque utinam possem tan-  
tam in me contritionem excitare, quantam  
habuerunt pro peccatis suis sanctus Prophe-  
ta David vir secundum cor tuum, S. Petrus  
Princeps Apostolorum, ac reliqui pœniten-  
tes : quam libenter totus in lacrymas dif-  
fluerem, donec lavarentur iniuriantes meæ,  
& ostenderes mihi placatum vultum tuum !  
Sed facta est anima mea sicut terra sine aqua  
tibi, & aruit sicut testa virtus mea : cumque  
omni virtute destitutus sim, hoc solùm habeo  
residui, ut oculos meos extollam ad redem-  
ptorem meum, ejusque lacrymas offeram ti-  
bi, quas ille pro me uberrimè effudit, ut iis  
placatus aperias mihi januas misericordiæ  
tuæ, & suscipias me servum fugitivum ve-  
nientem ad te, & ab inimicis fugientem.  
Respice in me & misereri mei, Domine pa-  
tiens & misericors, loquere ad petram cor-  
dis mei, & percutie virga virtutis tuæ, ut fluant  
aque compunctionis, aquæ salutares, quibus  
sanctificari poteremus.

sanabitur & dealbabitur anima mea. Confirma hoc quod operatus es in me, tibique grata & accepta sit confessio mea, atque omnem ejus defectum suppleat pietas & misericordia tua. Misericordiam tuam imploro, & veniam postulo cum inviolabili proposito deinceps non peccandi, & studio virtutum sedulo incumbendi, te mihi vires subministrante, qui non deseris sperantes in te. Ne patiaris diutiū me vagari post vanitatem vītæ hujus, transeunt enim dies & dies, anni & anni, & ecce nihil proficio. Convertere ergo & deprecabilis esto super me indignissimum servum tuum, & noli sic attendere malum meum, ut obliviscaris bonum tuum: nam si ego commisi unde me damnare potes, tu non amisisti unde me salves, & recipias in gratiam tuam, Deus meus adjutor meus, Qui vivis & regnas in sæcula sæculorum. Amen.

## S. VI.

## Directio Intentionis ante Missam.

Deus cæli & terræ infinitè amabilis, & omnium bonorum fons indeficiens, ego Nost omnium notarum miserrimus peccator, & Ecclesiæ tuæ minister indignissimus, ante thronum gloriæ tuæ humili pro-

volutus, quam maximo possum amoris, reverentiae, & devotionis affectu, volo & intendo hodie sacrosanctum Missæ sacrificium altissimæ Majestati tuæ, cui soli debetur, juxta ritum S. Romanæ Ecclesiæ offerre, & ex nunc offero, una cum omnibus sacrificiis tibi placitis quotquot à principio mundi oblata sunt, & usque ad finem offerrentur: simulque pretium sanguinis & cunctos labores ac cruciatus Redemptoris nostri; omnia merita Sanctissimæ & immaculatæ Genitricis ejus; omniaum Sanctorum virtutes, totiusque militantis Ecclesiæ laudes & preces. In unione illius admirabilis sacrificii quod idem Unigenitus tuus in ultima cœna instituit & in cruce consummavit factus sacerdos suæ victimæ, & victimæ sui sacerdotii: affectu ac nomine ejusdem, totiusque Ecclesiæ suæ sanctæ, & omnium tecum quocunque modo offerentium: ex puro tui amore ac desiderio tui beneplaciti semper & in omnibus perficiendi. Ad tuam maximam laudem, & cultum, & gloriam: in protestationem supremæ tuæ excellentiæ, dominii tui in omnes creatureas, & nostræ subjectionis & dependentiæ à te: in cultum latriæ tibi soli debitum, simul cum adorationibus tibi gratissimis ejusdem Christi filii tui. B. Virginis, omniumque Angelorum & Sanctorum. In memoriam vitæ, passionis, & mortis præfati

fati Domini nostri, & in obedientiam ejusdem mandati, quo præcepit ut idem in ejus commemorationem faceremus. Ad honorem & augmentum gloriæ Deiparæ Virginis, omniumque Angelorum & Sanctorum, eorum præsertim quorum hodie festivitas celebratur. In gratiarum actionem pro universis beneficiis tuis, quæ mihi in dignissimo peccatori, cunctisque hominibus, & omni creaturæ conferre dignatus es. In propitiationem & satisfactionem pro peccatis totius mundi, & pro meis specialiter, de quibus doleo, quæque detestor & abominor super omne detestabile, quia tibi maximoper displaceat cum firme proposito emendationis. Et quia hoc sacrificium vim impetratoriam infinitam habet, offero illud pro meis, & omnium viventium, ac defunctorum necessitatibus: & primò quidem fructum quem possum & debeo illi principaliiter applico, pro quo celebrate intendo. & si forte contingat eum non indigere, vel non esse capacem, opto & volo hunc fructum ad N. derivari: cum applicatione indulgentiarum mihi vel tali defuncto. Secundariò autem sine ejus præjudicio, pro quo offerre primariò teneor vel intendo, offero pro omnibus mihi peculiariter commendatis, pro N. & N. pro tali gratia obtainenda, & pro cunctis viventibus atque defunctis, pro quibus

me indignum famulum tuum legatione apud te fungi voluisti, ut defunctis requiem indulgeas, vivisque gratiam concedas tibi serviendi, & in amore tuo usque in finem perseverandi, Amen.

## S. VII.

## Deprecatio pro omnium necessitatibus.

**M**emento Domine per viscera misericordia tuæ, per merita Filii tui, quem pro nobis oblatum nunc denuò offero, per merita B. Virginis, & omnium Sanctorum; memento Ecclesiæ tuæ sponsæ tuæ, augæ in ea puritatem fidei & munditatem sanctitatis, & labore virorum Apostolicorum dilata eam toto orbe terrarum. Conserva eam quietam & tranquillam, & portæ inferi non prævaleant aduersus eam. Hostium ejus elide superbiam, & gentes à fide alienas veritatis tuæ splendore collustra, ne pereant tot imagines tuæ, pro quibus pretiosus Filius tui sanguis effusus est. Da Summo Pontifici nostro N. cor docile, da Spiritus sancti abundantiam, ut populo sibi commissio verbo & exemplo præluceat. Intende oculos pietatis tuæ in universos Ecclesiæ Præsules & Pastores, & fac eos super gregem sibi commissum fideliter excubare.

cubare. Adesto Parochis & Presbyteris, & omni clero, ut nulli præbeant scandali occasionem, diligent puritatem, & ea sequantur quæ pacis sunt. Esto propitius omnibus Religiosis, quos separasti tibi in hæreditatem de universis populis terræ, da illis continuum in virtute profectum, votorumque ac regularum exactissimam observantiam. Da huic domui bonorum temporalium sufficientiam, & spiritum excita in Prælatis nostris, & in cunctis fervorem accende. Suscita in Ecclesiâ tua strenuos operarios, qui eam verbo fideliter passant, & exemplo confirmant. Da eis rectam mentis intentionem, zeli sinceritatem, contemptum sui, animi robur, virtutis constantiam. Effunde miserationes tuas, Domine Princeps Regum terræ, in omnes Reges & Catholicos Principes, cunctaque tribus in obedientia fidei & Ecclesiæ perseverantem famulatum, subditorum curam, justitiae zelum, mutuam pacem & observantiam mandatorum tuorum. Tuum etiam auxilium cunctis Magistratibus præbe, ut pacata gubernatione subjectos regant, te in omnibus judiciis suis timeant, tibique jugiter placere contendant. Da omnista Ecclesiæ abundantiam gratiarum tuarum, ut unusquisque in ea vocatione, in qua vocatus est, tibi dignè & laudabiliter famuletur,

Da Virginibus castitatem, Deo dicatis continentiam, conjugatis sanctimoniam, pœnitentibus indulgentiam, viduis & orphanis sustentationem, pauperibus protectionem, peregrinantibus redditum, navigantibus portum: justis perseverantiam, bonis ut meliores fiant, tepidis ut fervescant, malis & peccatoribus, qualem me dolens esse confiteor, ut convertantur. Conserva cælum in salubritate, terram in fertilitate, fructus in maturitate, mundum in providentia omni ex parte sufficienti. Respice omnes ægrotos, afflitos, tentatos, agonizantes, & in aliquo periculo vel necessitate constitutos, & da illis auxilium, remedium, consolationem, prout expedit ad gloriam tuam & illorum salutem. Supplex item ore te, benignissime Deus, pro omnibus inimicis meis, quos intimè diligo: pro iis qui me offenderunt, vel quos ego offendi aut scandalisavi, ut eis in omnibus beneficias, & pectora eorum sancto igne tuæ charitatis succendas. Miserere omnium pro quibus orare debeo, vel qui se commendaverunt indignis orationibus meis, omnium præcipue consanguineorum, affinium, amicorum, benefactorum meorum N. & N. Exaudi preces & vota ipsorum, & subveni eorundem ad te clamantium necessitatibus. Orote quoque pro tali re & negotio N. N. ut felici-

ut felicem exitum sortiatur, si saluti nostræ profuturum esse cognoscis. Memento etiam Domine Rex æterne, cui omnia vivunt, animalium omnium fidelium defunctorum præfertim N. & N super quas invocatum est nomen tuum. Extingue earum ardorem optato rore misericordiæ tuæ, & citò purgatas in conspectu tuo admitte. Pro me ipso tandem infelicissimo peccatore clementiam tuam humillimè imploro, ut per virtutem hujus sacrificii universa peccata mea dimittas mihi, quæ multiplicata sunt super numerum arenæ maris. Audi sanguinem Filii tui altius clamantem quam sanguis Abel, & in virtute hujus oblationis miserere servi tui secundum magnam misericordiam tuam. Dirige me in via tua, & doce me facere voluntatem tuam. Auge in me fidem, Spem, charitatem, & reliquias virtutes statui meo necessarias. Da terrena despicere, & amare cœlestia. Posside me jugiter secundum benplacitum tuum, ut te in omnibus & ubique inveniam, donec per felicem mortem ad te merear pervenire,

Amen.

*Spectabilis oblatio sacrificii quatenus est  
Latreuticum.*

**S**ancta Trinitas unus Deus, rerum omnium principium & finis, cuius potentia, sapientia, bonitas, & magnitudo incomprehensibilis est, toto corde & corpore prostratus adoro te; tibique hodie sacrificium offerre intendo corporis & sanguinis Domini mei Iesu Christi pure propter te, ad majoram tui gloriam, in protestationem supremi Domini tui in omnes creaturas, & nostræ subjectionis ac omnimodæ dependentiæ ante: in recognitionem infinitæ tuæ perfectionis, beatitudinis, & gloriae, omniumque operum tuorum, quæ summoperè gaudeo à nulla creatura dignè posse aestimari, nisi à te Pater omnipotens, æterne Deus, & ab Unigenito tuo Salvatore nostro, qui tecum & cum Spiritu sancto unus est Deus, unus est Dominus: quem ideò tibi in sacrificium laudis offero tua infinita majestate dignissimum, in cultum latriæ tibi soli debitum, cum omnibus obsequiis, laudibus & adorationibus, quibus te olim glorificavit in terris: una cum meritis, laudibus, & adorationibus Beatissimæ Virginis Mariæ, omniumque

niamque Angelorum , & Sanctorum.  
Quis enim ego sum vermiculus terræ , &  
opprobrium hominum , ut audeam faciem  
meam levare ad te , & aspicere altitudinem  
cœli ? Christi igitur Filii tui , & omnium  
electorum meritis onustus accedo ad te , co-  
rumq; nomine & affectu abjicio me corpo-  
re & spiritu ante thronum Divinitatis tuæ ;  
ut intelligat universus orbis me esse opus  
manuum tuarum , & tanquam nihilum  
ante te . O quam gratum & jucundum mi-  
hi foret per omnes undique regiones omnes  
homines videre in genua pro volutos te ado-  
rare ! Sed quia plerique te non cognoscunt,  
vel cognitum non venerantur , pro his quo-  
que te adoro , teque humillimè deprecor , ut  
hanc oblationem Filii tui suscipere digneris  
in supplementum peccatorum & blasphemiarum ,  
quibus perditim mortales te offendunt sive in terra , sive in inferno . Tibi glo-  
ria in sæcula . Amen .

## §. IX.

*Oblatio sacrificii quatenus est Eu-  
charisticum.*

**G**ratias agoribi Domine Deus omnium  
bonorum fons & origo pro maximis

& innumerabilibus beneficiis tuis, pro quibus omnibus & singulis infinita tibi & interminabilis gratiarum actio singulis momentis temporis & æternitatis deberetur; sed quia minor sum sine ulla comparatione minimo beneficiorum tuorum, nec ulla creatura reperiri potest, quæ tuæ inexhaustæ bonitati dignas valeat referre gratias: Unigenitum Filium tuum tibi unicè dilectum divinæ majestati tuæ in sacrificium eucharisticum humillimè offero, una cum omnibus obsequiis, laudibus, & gratiarum actionibus ipsius ac Beatissimæ Matris ejus, omniumque Sanctorum & electorum tuorum. Specialiter autem gratias tibi hoc sacrificio persolvere intendo ex totis præcordiis meis propter magnam gloriam tuam, proque omni gaudio quod tu teipso beatus intra te percipis perenni & interminabili fruitione ex æterna generatione Filii tui; & à te atque ab eo processione Spiritus sancti, & ex perfectionibus tuis, quarum non est numerus, & quas nemo comprehendere potest. Pro omnibus item misericordiis & mirabilibus tuis, quæ per Filium tuum extra te operatus es, & semper operaberis Pro ejusdem Incarnatione & pro inexhaustis sapientiæ, scientiæ, meritorum, & gloriæ thesauris, quos in sanctissima ejus Humanitate abscondisti: proque illa singulari pietate, qua cum mihi in Patrem, ac

Docto-

Doctorem, in Duce ac Redemptorem con-  
cessisti; & pro omni fructu vitæ, passionis  
& mortis ejus. Pro immensi gratiarum o-  
pibus, quas Beatissimæ ejusdem Genitrici  
Virgini Mariæ contulisti, quam mihi quo-  
que in parentem, advocatam, & protestri-  
cem largiri dignatus es: pro ejus electione,  
immaculata conceptione, admirabili mater-  
nitate, gloriola in cœlum assumptione, om-  
niue gratia, & gloria, qua illam in terra &  
in cœlo honorificasti: & pro omnibus bene-  
ficiis, quæ ipsa intercedente toti terrarum  
orbi, ejusque devotis clientibus contulisti  
& conferes in perpetuum. Pro innumerabi-  
libus Angelorum exercitibus, quorum nu-  
merum tu solus nosti, qui eos creasti præro-  
gativis singularibus exornatos ad tui glo-  
riam & nostrum subsidium. Pro eximiis do-  
nis, quibus Sanctos & electos tuos cumula-  
sti, illos præsertim quos hodie S. Ecclesia ve-  
neratur, quorum meritis & doctrina ipsam  
Ecclesiam ædificasti, hæreses & schismata  
contrivisti, & omnes fideles illuminasti. Pro  
maximo gratiarum munere, quibus eos re-  
ples, quos ad apicem perfectionis efficaciter  
trahis, & ad dulcissimam familiaritatem  
tuam admittis. Pro inexplicabili patientia,  
qua peccatores toleras, ad te invitas, & auxi-  
lia illis necessaria suppeditas ut convertan-  
tur. Pro singulis beneficiis quæ omnibus via-  
toribus,

toribus, amicis & inimicis meis, fidelibus  
& infidelibus, cunctisque creaturis sensibili-  
bus & insensibilius contulisti. Pro gra-  
tiis gratis datis ad Ecclesiae utilitatem, quas  
licet non omnes singulis dederis, dedisti  
tamen ut sint in omnibus, ut quod sin-  
guli inde non habent, in aliis habeant; spi-  
ritus enim tuus dividit singulis pro ut vult.  
Pro infinito amore, quo me prosequutus  
es eligens me ante mundi constitutionem,  
ut sim sanctus & immaculatus in conspe-  
ctu tuo: quodque tempore praefinito ex a-  
byssone nihili eduxeris me, & nasci feceris in  
Ecclesia tua, extra quam non est salus.  
Quod me dono tuis gratiis per baptismum di-  
taveris, & animam meam præclarissimis  
virtutum habitibus exornaveris: quod per-  
petuò assististi mihi conservans me, & præ-  
servans à multis periculis & adversitatibus  
admirabili tua providentia: quod Angelum  
ad mei custodiam deputaveris, qui perpe-  
tuus cogitationum, & operationum mea-  
rum inspectore est, dirigens me occultis im-  
spirationibus ad salutem. Pro maxima misé-  
ricordia, qua me redemptum pretioso san-  
guine filii tui ē seculo nequam eripuisti, &  
eum in peccatis jacerem excitasti illustratio-  
ne tua, & vocasti in admirabile lumen tuum  
in locum sanctificationis, dissimulans pecca-  
ta mea propter pœnitentiam. Pro sublimis-

fina

fima sacerdotii dignitate, ad quam me prorsus immerentem exexisti : & pro multis præclarissimis donis naturæ & gratiæ, quæ mihi singulariter contulisti. Quod mihi tot media ad salutem, totque virtutis instrumenta suppeditaveris, quod toties me custodieris ne peccarem, occasiones subtrahens, & pravas sanans affectiones : quod cum aliquando me tentari permisisti, vim tamen & fortitudinem resistendi misericorditer tribuere dignatus sis præveniens me in miserationibus tuis. Quod viatum & vestitum, & alia necessaria ad decentiam status mihi copiosè præbueris: quodque omnia propter me regere & conservare non desinas. Quod ut validius me traheres ad te, aliquot mihi corporales ægritudines, angustias animi, & adversitates immisisti, ac mirabili vicissitudine consolationum & desolationum erudiens me, ne in prosperis extollar, aut in adversis deficiam. Quod per viam mandatorum tuorum deduxeris me, dans scire, velle, & operari quod bonum est; ut per bona opera certam faciens, te adjuvante, vocationem meam, præparata electis tuis gloria perfruar in æternum. Hæc & alia multa fecisti mihi Domine Deus meus, vita & dulcedo animæ meæ, de quibus optabile mihi fore semper loqui, semper cogitare, semper tibi gratias agere: sed imperfectum meum vide-

runt oculi tui. Quis enim ego sum filius iræ,  
 & abyssus tenebrosa, ut tantis beneficiis par-  
 esse possim? Calicem igitur saltaris accipiam,  
 & hoc tibi sacrificium pro me & omnibus  
 immolabo, ut de perceptis hac dignissima vi-  
 ctimæ gratias exhibentes beneficia potiora  
 sumamus. Amen.

## §. X.

*Oblatio sacrificii quatenus est  
 propitiatorium.*

PROCIDO coram te, Domine, cum tremo-  
 re & rubore gravissima onustus flagitio-  
 rum meorum sarcina: nec mea solum, sed &  
 totius populi peccata coram te porto, quia  
 me pro omnibus legatione fungi jussisti, ut  
 quod illi pro se non poslunt, ipse tanquam  
 mediator merear impetrare. Sed qua fiducia  
 pro culpis alienis intercessor veniam servus  
 nequissimus innumerabilium scelerum reus,  
 qui prior beneficiis à te susceptis gravissi-  
 mas tibi injurias & offendas retribui, boni-  
 tatem tuam contemnens, & justitiam vili-  
 pendens? Iniquitates meæ diviserunt inter  
 me & te, & peccata mea absconderunt fa-  
 ciem tuam ne exaudiens. Veruntamen ecce  
 revertor ad te dolens & moxiens quod offen-  
 derim

derim te : & quia nullum extat pretium, quo infinitæ bonitati tuæ offendæ condignè satisfacere valeamus, nisi pretium Sanguinis dilectissimi Filii tui Domini nostri Jesu Christi , ipsum tibi offero hostiam placationis sufficientissimam pro meis ac totius mundi peccatis, ut mihi, & N.N. atque omnibus peccatoribus veram contritionem concedas, meque & illos à reatu pœnarum misericorditer abolvas, per acerbissimam passionem & mortem ejusdem Filii tui, quem semel in cruce oblatum nunc denuò offero. Ibi enim invenio meritorum ejus mare magnum & spatiōsum , quo demergantur omnia peccata nostra : ibi infinitum satisfactionum thesaurum, quo omnia debita nostra remissione obtenta expungantur. Esto itaque placabilis super multitudinem iniquitatū nostrarum, & audi Sanguinem Filii tui clamantem ad te non vindictam, sed veniam & misericordiam, Attende Domine , & ignosce dolentibus & pœnitentibus. Da gratiam emendationis, & in bono perseverantiam, & cantabimus laudes tuas in sœcula sœculorum. Amen.

## §. XI.

Oblatio sacrificii quatenus est imperatorium.

**Q**uia ineffabili tua pietate & misericordia  
me

me indignissimum famulum tuum legatione  
fungi apud te voluisti pro omnibus homin-  
bus vivis & defunctis ; offero tibi Clementi-  
tum meum Pater , hoc tremendum sacrificium  
quod vim imperatoriam infinitam habet,  
pro singulorum necessitatibus & indigentius,  
ut per passionem & mortem Jesu Christi Sal-  
vatoris nostri eorum voces & singultus mi-  
sericorditer audire, & partem aliquam auxi-  
lii tui singulis largiri digneris. Attende ita-  
que & exaudi pro singulis de pre cantem, nec  
avertas faciem tuam a me propter innumera-  
bilia peccata mea; non enim in justificationi-  
bus meis, sed in persona Ecclesiae tuæ, & tibi  
unicè dilecti Filii tui ad te loqui præsumo.  
Miserere omnium quos fecisti Domine , &  
reple eos scientia ac fide tua, ut lauderis cum  
hæreditate tua. Da omnibus fidem vivam, &  
ardentissimum in te amorem , & ne claudas  
ora canentium te. Effunde misericordiam  
tuam in gentes quæ te non noverunt, Turcas,  
Mauros, Idololatras, Judæos, Hæreticos,  
Schismaticos, obscura nocte infidelitatis se-  
pultos; vindica eos ab erroribus, & illumina  
corda illorum, ut te cognoscant , & Jesum  
Christum quem misisti. Diffipa consilia im-  
piorum, ne quicquam officiant regno tuo, &  
propagationi glorie tuæ ; & libera fideles  
tuos de manibus filiorum alienorum. Sancti-  
fica Ecclesiam tuam, quam plantavit dextera  
tua :

tua: aufer ab ea omnia scandala, dissensio-  
nes & schismata; ut tandem a iiquando  
fiat unum ovile & unus Pastor. Da Sum-  
mo Pontifici nostro, cunctisque Prælatis  
ut oves sibi commissas fideliter pascant fru-  
ctu orationis, exemplo bonæ conversationis,  
verbo prædicationis, subsidio charitatis.  
Sit perpetua in illis oneris sibi impositi  
consideratio, & sacerdotio fungantur sine  
reprehensione. Reforma omnes Ecclesia-  
sticos ordines, ut & ipsi luceant coram ho-  
minibus, sitque in eis virtutum decus,  
splendor sanctitatis. Reduc omnes Reli-  
giones ad fervorem & perfectionem, in  
qua fuerunt institutæ; da Superioribus ze-  
lum disciplinæ, subditis obedientiam, ut  
professione sua omnes digni inveniantur.  
Da Prædicatoribus vocem virtutis, ut è cœ-  
no peccatorum quamplurimos educant, &  
ad timorem & amorem tuum perducant. Il-  
lumina sapientia tua omnes Reges, & Prin-  
cipes, cunctosque Magistratus ut subditis  
sibi populis justitiam fideliter admini-  
strent, pacem diligent, Ecclesiam veneren-  
tur, mandata tua custodiant, & de hosti-  
bus sanctæ fidei te protegente triumphent.  
Defende fideles tuos à fâne, peste, &  
bello, à persecutionibus & calumniis, à  
cunctis periculis & adversitatibus, ab omni  
necessitate corporali & spirituali, ab omni  
angustia

angustia & calamitate: & illos adjuva quos  
affligi & tribulari permisisti , ut omnes sibi  
miseri cordiam tuam sentiant adfuisse. Ne si-  
nas eos labi, qui in periculo & occasione pec-  
candi versantur : eosque conserva quos gra-  
tiae tuæ pretiosissimo munere locupletasti.  
Adesto agonizantibus, ut vera contritione  
purgati & amore tuo succensi diaboli insi-  
dias evadant, & à damnatione perpetua libe-  
rentur. Memento tot miserabilium pecca-  
torum, qui in foveam peccati mortalis infe-  
liciter lapsi sine ope tua inde emergere non  
possunt, & da illis auxilium efficax , ut sur-  
gant & resipiscant. Omnibus item inimicis  
nostris charitatem & dulcedinem tuam be-  
nignus infunde ; & libera nos à malorum in-  
sidiis. Da illis quos ego offendit aut scandalizi-  
zavi veniam peccatorum & veram emenda-  
tionem. Omnes autem amicos & benefacto-  
res, consanguineos & affines nostros illustra  
gratia tua, succende amore tuo, ut te solùm  
quærant, te solùm diligant, omniq[ue] tem-  
po-re opera illorum plena inveniantur in oculis  
tuis. Da huic Congregationi, ad quam me vo-  
care dignatus es, bona spiritualia & tempo-  
ralia, nosque & illa administra & dirige, ut  
cultus tuus, & animarum salus hic semper  
vigeat, creseat, & perseveret. Custodi omnes  
mihi commissos & commendatos , & pro  
quibus orare debeo, præcipue verò N. & N.  
rege,

rege, & salva eos juxta beneplacitum tuum,  
ut nemo ex illis pereat. Succurre omnibus,  
pro quibus me orare tu vis, & ego nescio :  
protege servos tuos omnes , qui te maxime  
diligunt, quamvis eorum numerum & nomi-  
na ignorem : justis autem tepidis & imperfe-  
ctis auge fidem, spem charitatem, auge fervo-  
rem, ut ad culmen perfectionis citò perve-  
niant. Relpice benignis oculis animas in Pur-  
gatorio detentas illas præsertim quæ suffra-  
giis nostris magis indigent, & da illis requie  
sempiternam. Mei deniq; memento omnium  
miserrimi & indignissimi, qui gratiæ tuæ au-  
xilio tanto majori præ cæteris egeo, quanto  
infirmiter sum & impotentior. Extingue in  
me omnia terrena desideria, & ignem amoris  
accende. Dirige me in veritate tua, & da fina-  
lem perseverantiam, Per Christum Filium  
tuum, cui tecum & cum Spiritu sancto est  
laus & honor in sæcula sæculorum, Amen.

## §. XII.

*Actus diversarum virtutum ante  
Missam.*

## F I D E I.

**Q**uis mihi det, suayissime Jesu , ut sub  
can-

candido specierum sacramentalium velamine vultum tuum intueri possum, in quem desiderant Angeli prospicere? Quis mihi det ut pateant mihi fontes saluberrimi quinque vulnerum tuorum, quæ oculis fidei in tuo corpore cerno, fontes aquarum viventium in ablutionem peccatricis animæ meæ? O venæ salientes in vitam æternam, effundite super me aquam gratiæ, quæ sitim meam satiet, ut gaudio repletus, & fide viva imbutus exclamem cum Thoma Apostolo, *Deus meus & Dominus meus.* Credo enim firmissima fide te in augustissimo sacramento corporis & sanguinis tui verè præsentem esse Deum meum, & Dominum meum; & pro hac assertione millies mori paratus sum. Credo inquam quod in hoc sacramento corpus tuum gloriosissimum verè adest, sole splendidius, electum ex millibus, cum ea integritate, pulchritudine, majestate, qua in cœlo existit, & qua nulla major concipi potest. Ibidem est sanguis olim pro nostra omniumque salute effusus. Ibi est anima omni gratia & sapientia plena, in qua sunt omnes thesauri virtutum & scientiæ Dei. Ibi denique latet Divinitas tua, Verbum scilicet omnipotens, per quod Pater dicit omnia: & quia tu in Patre, & Pater in te est, adest etiam Pater te Verbum suum generans; adest & Spiritus sanctus unicunque nexus & amor. Hoc est compendium omnium

omnium mirabilium tuorum, hoc summum prodigium omnium creatarum mentium captum excedens, hæc veritas infallibilis, quam te largiente per gladios & ignes profitebor.

## S P E I.

**I**N te solo spem meam colloco, dulcissime Jesu, quia tu salus & virtus mea, tu refugium & firmamentum meum, tu fons omnium bonorum. Quomodo enim auderem hoc tremendum sacrificium Deo Patri offerre, teque in eo suscipere, nisi fiduciam tu mihi præberes, qui me tuo sanguine redemisti? Det tua igitur benignitate confisus accedo ad te, ut ovis morbida ad Pastorem, ut infirmus ad Medicum, ut reus morti obnoxius ad Advocatum; ut tu me foveas, protegas, corrobores, & sanes. Abyssus nihil mei abyssum invocat bonitatis tuæ nam licet peccata mea plurima & gravissima sint, ea tamen nihil sunt, quamvis plura & graviora forent, si cum misericordia tua, & pretio sanguinis tui conferantur. In ipso deposita est tota fiducia mea, & gaudeo quod nihil in me sit, in quo possim confidere. Miserere mei, & salva me, qui nunquam deseris sperantes in te.

## CHARITATIS.

**O** Quanta vis amoris cor tuum succedit,  
Amanissime Jesu, cum transiit de  
hoc mundo ad Patrem mensam parasti no-  
bis habentem omne delectamentum, & om-  
nem saporem suavitatis. Grande quidem  
fuit & admirabile opus amoris tui, quod na-  
turam nostram assumere dignatus sis; sed  
longè præstantius & mirabilius est, quod  
corpus tuum in cibum, & sanguinem in po-  
tum reliqueris: in illo siquidem nostram sus-  
cepisti humanitatem, in hoc tuam largiris  
Divinitatem. Sic totum thesaurum gratiæ  
tuæ in nos effudisti, ut immensa hac dile-  
ctione præventiamoris vicem tibi rependere  
totis viribus satagamus. Amo itaque te uni-  
cum meum solatium in hoc exilio, unica spes  
languentis animæ, unica mea felicitas, &  
summum bonum quo in terris frui licet. Amo  
te toto corde, tota mente, tota virtute: atque  
utinam omni momento te ferventius semper  
amarem! Hoc est ardens desiderium meum,  
huc feruntur gemitus mei, & suspiria cordis  
mei. Ad te enim trahis omnes vires animæ  
meæ, dum te ipsum transfundis in me: dum  
quantum fieri potest me similem rui facis:  
dum esurientem animam meam non cibo a-  
liquo terreno, sed pretioso corpore & sanguine  
tuo nutris, satias, & saginas. Pro hac tua  
ineffa-

ineffabili largitate amo te, Deus meus, & ut  
nunquam cessem amare te , amorem meum  
teipso inflamma, qui esca & pabulum amoris  
es. O ignis jugiter ardens, & nunquam des-  
ciens, ure renes meos & cor meum, ut ardeant  
amore tui. Ignem venisti mittere in terram,  
accende illum & eventila, ut semper creascat.  
Te enim amabo, si amandi vires præbueris, &  
eo amplius amabo , quod uberiorem amandi  
gratiam infuderis: numquam tamen te a-  
mabo, ut dignus es.

## D E S I D E R I I .

**Q**uemadmodum desiderat cervus ad fon-  
tes aquarum, ita desiderat anima mea ad  
te, Salvator meus Domine Jesu: desiderat, in-  
quam, anima mea accedere ad te, teque of-  
ferre Deo Patri, ac de fontibus salvationis tuorum  
vinum lætificans in gaudio haurire. Sitio e-  
nim Domine, lassatus in via iniuitatis, sitio  
te Deum meum venam aquarum viventium,  
sitio sanguinem tuum, quem mihi in potum  
mirabiliter tribuisti. Ad te venio, & clamo  
post te, liberator meus, esuriens & sitiens:  
miserere mei fili David , & da mihi panem  
tuum, da vinum quod miscuisti, ut refocille-  
tur anima mea. Atque utinam possem om-  
nium Sanctorum effectus & inflammata de-  
sideria habere, teque semper fitire fontem vi-

ꝝ, fontem sapientiꝝ, fontem æterni luminis,  
 torrentem voluptatis. Utinam te semper e-  
 suriat cor meum panem Angelorum, refectio-  
 nem animarum sanctorum; & dulcedine sa-  
 poris tui repleantur viscera animæ meæ. Re-  
 nuit consolari anima mea, donec suscipiam  
 te omne bonum meum, Domine Jesu, quem  
 solum ardentissime concupisco cum omni  
 affectu & devotione omnium electorum  
 tuorum tecum epulantium in mensa tua,  
 quorum divitias offero tibi in supplementum  
 inopiarum mearum. Esto tu solus gaudium meum,  
 tranquillitas mea, refectio mea & thesaurus  
 meus, in quo mens mea quiescat. Nihil desi-  
 derem extra te, & omnia mihi vilescant præ-  
 ter te Deus meus dulcedo mea, & unicum  
 centrum cordis mei.

## G R A T I T V D I N I S.

**Q**uis sum ego bonitas infinita, ut me sacris  
 altaris astare volueris, tibi que offerre  
 de donis tuis sanctum sacrificium hostiam  
 immaculatam? Unde inveni hanc gratiam  
 in oculis tuis ut ostenderes in me divitias  
 misericordiæ tuæ? Venite & audite omnes  
 Angeli & Sancti Dei, & narrabo vobis quan-  
 ta fecit Dominus animæ meæ. Nam cum es-  
 sem abjectus in domo mea, de pulvere erexit  
 me, & constituit me cum Principibus po-  
 puli sui

puli sui ut comederem panem & biberem vi-  
num in mensa sua omnibus diebus vitæ meæ.  
Quas ergo tibi gratias agam, Clementissime  
Jesu, Salvator mundi, aut quid retribuam ti-  
bi pro omnibus quæ tribuisti mihi? Verè e-  
nīm de te sponso Ecclesiæ illud Canticorum  
intelligitur. Si dederit homo omnem substan-  
tiam domus sua pro dilectione, quasi nihil despi-  
ciet eam. Tu omnia quæ habes mihi largitus  
es, corpus, sanguinem, animam, & divinita-  
tem tuam: & si ego tribuam tibi omnem sub-  
stantiam domus meæ, corpus, animam, & li-  
bertatem cum omnibus quæ nunc habeo vel  
habere possum, hoc quasi nihil reputabi-  
tur comparatione immensi, & inæstimabilis  
doni tui. Tantum tibi debeo, quantum ipse  
vales, qui infinitus es: quare debitum meum  
omnem meam facultatem excedit. Audeo  
tamen rogare te, qui a benignus, & misericors  
es, & tu nosti paupertatem meam, audeo ro-  
gare te, ne despicias munusculum quod tibi  
offerò in simplicitate cordis mei dicens cum  
sponsa, *Dilectus meus mihi, & ego illi.* Na m  
sicut tu totum te mihi tradidisti in nutri-  
mentum animæ meæ; ita ego me totum se r-  
vitutis tue consecro, & quicquid habeo,  
quicquid sum, quicquid possum tibi penitus  
trado, ut me totum tibi vendices, nec qui c-  
quam mei mihi patiaris superesse,

**A**D mensam convivii tui à te vocatus & invitatus, Domine Jesu, summum bonum meum & felicitas sempiterna, patere quidem vocanti vellem, tēq; amanter & devote suscipere; sed contremisco valde, cùm meam intueor fœditatem, contremisco à voce Apostoli tui dicentis: Si quis manducaverit panem hunc & biberit calicem Domini indignè, reus erit corporis & sanguinis Domini. Mira enim res est, & portento simillima. Pascor cœlesti pane, quo saturari possunt infiniti mundi: potor præclarissimo vino, quo ardentissima Angelorum sitis extinguitur; & fame ac siti aresco: omne cæli gaudium intus fero, & terræ illecebris irretiri non desino, vanaque solatia à creaturis emendico. ad Deum excelsum fontem omnium bonorum quotidiè accedo, & sub specie panis & vini ipsum quotidiè sumo; & non solum non rapior cum Paulo in tertium cælum, sed terræ totus adhæreo, omnisque mea solicitude terræ famulatur & corpori, nulla cælo. Hæ sunt angustiæ, quæ me undique premunt, hæc consternatio mea magna nimis. Vereor enim ne quod in salutem constitui, in judicium & condemnationem accipiam. Nunquid ergo fugiam à facie tua cum impi Cain, aut abscondam me cum Adamo,  
cò quod

cōquod nudus sim, & audierim vocem tuam? Absit. Scio enim quia major est misericordia tua, quam miseria mea: major est clementia tua, quam iniquitas mea. Si fœdus, si infirmus, si nudus sum: tu me potes mundare, sanare, vestire. Ad te igitur cum timore, & tremore configio, ut me vestias, sanas, & purifiques. Abstrahe cor meum à cæteris omnibus extra te, in quibus nihil est nisi vanitas & afflictio spiritus. Sentiat mens mea dulcedinem præsentiae tuæ: gustet quam suavis es, ut amore tuo capta nihil querat extra te, Deus cordis mei, & pars mea Deus in æternū.

## H V M I L I T A T I S.

I mmense, tremende, potentissime, & incomprehensibilis Deus, quis es tu, & quis sum ego, ut digneris venire ad me, mecum epulari, & mansionem apud me facere? Heu quanta est dignatio tua, quanta miseria & ingratitudo mea? Tu Rex Regum & Dominus dominantium, qui respicis terram & facis eam tremere: tu fons sanctitatis, coram quo Angeli non sunt puri: tu Sol claritatis æternæ, qui lucem habitas inaccessiblem: ego vero animal immundum, omnium calamitatum ludibrio expositum, insanis perturbationum motibus agitatum: omni vanitati subiectū, vas contumelieæ, filius iræ & tenebrarum. Et

quomodo potest lucis tuæ ad tenebras meas  
esse conventio? Quomodo prælumam ad te  
accedere vermiculus terræ, in quo nullus or-  
do, sed sempiternus horror inhabitat? Qua fi-  
ducia coram te apparebo, justissime Judex,  
ante cujus conspectum columnæ cæli con-  
tremiseunt? Longè enim recessi à te, qui ta-  
men ubique es, & miserabilis anima mea,  
quam tibi in baptismate despontaveras, for-  
nicata est cum amatoribus multis, te repu-  
dians Creatorem & Redemptorem, ut falla-  
cibus creaturis adhæreret. Tu me segregasti  
ex utero matris mee, & vocasti per gratiam  
tuam, ut lucerem coram hominibus doctrinæ  
& vitæ splendore: ego vero in tenebris vixi,  
non sapiens quæ tua sunt, sed quæ super ter-  
ram. Tu parasti mihi mensam in dulcedine  
tua, & suspiravi ad ollas carnium Ægypti. Tu  
potasti me sanguine tuo, & converti me ad  
poculum Babylonis. Verum tamen ego loquar  
ad te, cum sim pulvis & cinis. Respice ser-  
vum tuum & suscipe me, quem tam amanter  
invitas ad te. Jam enim cognovi, quia sine te  
nihil sum, nihil possum: & extra te non est  
salus nec vita. Projice ergo post tergum tuum  
omnia peccata mea, & amplectere me, quam-  
vis indignissimum gratia tua, ad te reverten-  
tem. Juxta verbum Prophetæ tui dicentis: Sa-  
crificium Deo spiritus contributatus: cor contri-  
sum & humiliatum Deus non despicies.

§. XIII.

## §. XIII.

Commemoratio Dominicæ Passionis  
ante Missam.

Æpè dictum est in hoc incruento sacrificio  
cruentum illud , quod semel in Cruce  
peractum est , non verbis sed re ipsa repræ-  
sentari: una siquidem & eadem est hostia ,  
idem qui per sacerdotis ministerium offert ,  
idem Christus qui immolatur. Sicut e-  
nim dicitur Agnus occisus ab origine  
mundi , eò quod mortuus censeatur in fi-  
guris animalium , quæ in ipsius memoriam  
mactabantur : ita non immeritò eundem  
vocare possumus Agnum , qui quotidiè  
occiditur usque ad finem mundi , in hac  
nimirùm suæ mortis repræsentatione , quæ  
duratura est , donec Mundus durabit. Ideò  
sancti Patres mortis Christi memoriam hoc  
sacrificium celebranti super omnia necessa-  
riam esse affirmant dicente Apostolo. Quo-  
tiescunque manducabis panem hunc , & ca-  
licem bibetis , mortem Domini annunciatibitis ,  
donec veniat. Hoc ipsum aurem idem Sal-  
vator noster præcepit , cum instituto hoc sa-  
cramento ait, *Hoc facite in meam commemora-  
tionem. Quæ verba Seraphicus Doctor solicite  
expendens libro de puritate conscientiæ c. 9.*

existimat sacerdote nullatenus debere Missæ  
sacrificium celebrare, quia prius passionem &  
mortem Domini commemoret. Id, inquit,  
quod pro meipso retineo, est verbum illius qui hoc  
Sacramentum instituit, quem non credo illud fru-  
strâ protulisse. Dixit enim, Hac quotiescumque  
sacerditis, in mei memoriam facietis. Ex quo qui-  
dem verbo arguo mihi ipse, quod quozies volo id  
agere, quod ipse instituit, & modo predicto reli-  
quit, timeo nequaquam sine remorsu conscientia  
ac prejudicio anima ad illud posse accedere, nisi  
pramemorata ipsius instituentis charitate, ac e-  
ius passione & morte, in cujus memoriam perpe-  
tuò recolendam illud Sacramentum debere con-  
fici & percipi ipse præclarè asseruit & injunxit.  
Sacerdos itaque, cum ad sacrum faciendum  
se præparat, fasciculum sibi colligat ex om-  
nibus anxietatibus & amaritudinibus Domini,  
& inter ubera sua collocet, cordisque medullis inserat; mente & affectu sedulò revolvens  
omnia tormenta, quæ ille pro salute  
nostra perpassus est. Hæc frequenter in ore,  
hæc semper in corde habeat: & hæc sit ejus  
sublimior Philosophia, scire Christum, &  
hunc crucifixum. Cum vero ad altare acces-  
surus est, sic oret ex toto corde.

## O R A T I O.

**M**Emoria memor ero, Clementissime Pa-  
ter, &

ter, & tabescet in me anima mea : omniumque dolorum & passionum, atque acerbissimæ mortis Filii tui Domini mei Jesu Christi cum gemitibus & lacrymis recordabor, quia ipse salas & vita mea ante oculos pependit in ligno , offerens se tibi in holocaustum pro mea & rotius mundi salute. Hanc autem oblationem vivam, quam tu misisti in miseratione multa ad altare crucis immolandam pro nobis, hanc eandem tibi nunc offero, passionem ejus & mortem recolens ac repræsentans, sicut ipse præcepit, cum dixit, ut idem in ejus commemorationem faceremus. Recordare itaque humilitatis ejus , patientiæ , charitatis , mansuetudinis , & obedientiæ . Respice labores ejus, jejunia, contemptus, contumelias, vincula, irrisiones, & iniquam condemnationem. Respice in faciem Christi tui, & intuere speciosum forma præ filiis hominum opprobriis, injuriis, verberibus, livoribus, contusionibus ita deformatum, ut non sit ei species, neque decor. Vide caput nobilissimum spinarum punctionibus transfusum, & percussionibus attitum. Vide genas modestissimas sputis fædatas, a lapidis cæsas, sanguine cruentatas. Vide oculos benignissimos lacrymis perfusos, & ad ignominiam velatos. Vide os suavissimum siti ardentissima cruciatum, & felle atque acero potatum. Vide dorsum, supra quod fabricaverunt pec-

catores, verberibus dilaniatum, & humeros crucis pondere oppressos. Vide brachia amabilissima funibus devincta, & in cruce crudeliter extensa. Vide manus innocentissimas durissimis clavis perforatas. Vide pedes delicatos tot itineribus defatigatos, ac cruci tandem affixos. Vide corpus venerabile pro nobis in cruce suspensum, vulneratum mortuum & sepultum. Vide sanguinem pretiosissimum usque ad minimam guttam pro nostra salute misericorditer effusum. Hæc enim tibi offero & repræsento, omni quo possum devotionis affectu suppliciter orans, ut ipsa pietas, qua Filium tuum pro nobis tradidisti, te omnibus misereri compellat, pro quibus ille factus obediens usque ad mortem crucem subire dignatus est. Amen.

## g. XIV.

## Oratio ante Missam ad Patrem:

**R**espice Clementissime Pater, de sanctuario tuo, & de excelso cælorum habitaculo, & intuere hanc immaculatam hostiam, quam tibi offert magnus Pontifex noster Jesus Christus Filius tuus Salvator mundi pro peccati fratrum suorum, & eis placabilis super multitudinem malitie nostræ,  
quia.

quia vox sanguinis Domini nostri clamat  
ad te de cruce. Hic est justitia mea, & san-  
ctificatio, ac propitiatio mea. Averte faciem  
tuam à peccatis meis, & respice in faciem  
Christi tui: eus enim meritum offero ad te,  
omnemque fiduciam in eo defixam habeo.  
Impellit ministrandi necessitas, terret con-  
scientia indebiti sacerdotii. Sed rogo te, ne  
despicias mihi creditæ dispensationis offi-  
cium, licet in me boni operis testimonium  
non agnoscas. Et quia me indignum media-  
torem esse oculisti inter te & populum tuum,  
ne me repellas à tua pietate cum divinissimis  
donis tuis venientem ad te, ut inculpatè ac-  
cedens ad gloriam tuam, dignus sim qui ope-  
riar protectione Unigeniti Filii tui, & illu-  
minatione Spiritus sancti tui, atque pro om-  
nibus deprecans pro omnibus exaudiatur, te  
præstante, Deus meus, Pater misericordiarum,  
qui cum eodem Filio tuo in unitate  
eiusdem Spiritus sancti vivis & regnas in sæ-  
cula sæculorum, Amen.

## §. XV.

*Oratio ante Missam ad Dominum  
Iesum Christum.*

**G**ratias ago tibi, Domine Jesu Christe,  
D 6 pro

pro ineffabili tua charitate , qua transiurus  
de hoc mundo ad Patrem mensam mihi pa-  
rasti in dulcedine tua, mensam prorsus rega-  
lem, omne delectamentum in se habentem ;  
mensam pretiosissimam corporis & sanguini-  
stui , ut adipe & pinguedine repleatur a-  
nim a mea , & secreto illapsu nutritionis tuæ  
roboretur infirmitas mea. Et unde hoc mihi  
Gloriosissime Fili Dei, ut me permittas veni-  
re ad te , & cum cæteris commensalibus tuis  
epulari ? atque utinam ab omni culpa liber,  
purus ab omni labe, ab omni vitio purgatus,  
& ab omni inordinata affectione perfectè e-  
mendatus essem, ut ad hanc mensam supercæ-  
lestem accedere possem fervens charitate, ni-  
veus innocentia , & omnium virtutum de-  
core exornatus. Sed quia miserrimus ego  
sum , & omni ornamento destitutus, obsecro  
te in primis benignissime Salvator, cuius cha-  
ritas immensa est , bonitas infinita , ut san-  
guine tuo animam meam lavare , & superni-  
vem dealbare, meritis tuis induere, illoque  
igne ardentissimi amoris succendere digne-  
ris, qui te à nobis discessorum compulit ad  
hoc vivificum convivium instituendum. Ob-  
secro deinde Beatissimam Virginem Matrem  
tuam , & omnes electos tuos , ut tibi pro me  
offerant charitatem, fidem & devotionem ,  
qua hoc Sacramentum suscepserunt ab initio  
institutionis ejus usque in præsentem diem.

Et

Et quia particeps ego sum omnium timen-  
tium te, offero tibi omnium sacerdotum, o-  
mniumque fidelium hac die celebrantium &  
communicantium pietatem & puritatem.  
Offero omnium justorum ab origine mundi  
usque ad ejus consummationem virtutes &  
merita, ac pios affectus erga te, dulcissime Je-  
su, in Venerabili Sacramento existentem: fir-  
missimæ nimirum fidei, & vivæ apprehensio-  
nis earum rerum, quæ de hoc maximo my-  
sterio credendæ sunt: perfectissimæ charita-  
tis, & intimæ tecum familiaritatis: famis &  
flagrantissimi desiderii te omne bonum susci-  
piendi: filialis fiduciaæ & spei de tua miseri-  
cordia tam mirabili modo declarata: zeli di-  
vinæ gloriæ & dilectionis proximi, pro cu-  
jus salute hoc sacrificium offertur: admira-  
tionis tantæ dignationis, & profundissimæ  
humilitatis: gaudii & jubili in te & de te:  
laudis, gratitudinis, adorationis, & devotio-  
nis. Hos inquam, aliosque affectus offero  
tibi in supplementum insufficientiæ meæ, &  
eos si possem elicerem cum maxima inten-  
sione ad laudem & gloriam tuam quia di-  
gnus es. Succe Domine hoc desiderium  
meum, meritisq; placatus electorum tuorum,  
ne à mensa tua repellas me, quatenus hoc ci-  
bo satiatus, hoc recreatus pota vitam ha-  
beam, & abundantiū habeam, hic & in æ-  
ternum, Amen.

*Alia Oratio ad eundem.*

**V**eni Domine Jesu, unica salus animæ  
meæ & infunde pectori meo multitudi-  
nem dulcedinis tuæ, ut nihil amem, nihil de-  
siderem præter te. Veni gaudium & felicitas  
mea, veni spes & robur meum, quia tecum  
sunt divitiae & gloria, tu vita & consolatio  
mea, tu paradisus voluptatis. Atque utinam  
te veniente ad me vertantur mihi in amari-  
tudinem, omnes mundi deliciae, ut tibi unitus  
in hoc cœlesti convivio à te nunquam sepa-  
rer in æternum. Frustrè expenderem argen-  
tum meum non in panibus, & laborem meū  
non in saturitate, licet omnes Ægypti escas  
compararem, si carerem hoc pane, qui  
præbet delicias Regibus, & vino tuo destitu-  
tus essem, cuius suavitas in infinitum exce-  
dit omnia hujus seculi oblectamenta. Et  
unde mihi tantum bonum, ut tecum epula-  
xi merear, Rex tremendæ majestatis, ego in-  
dignissimus servus tuus, qui quotidiè pecco  
& incorrigibilis persevero: Sed major est  
in infinitum misericordia tua, quam miseria  
mea: & tu dulcissima refectio mea me in vi-  
rum alterum transformas, & verbo virtutis  
tuæ sanas omnes languores meos. Ad te  
igitur

igitur venio de tua pietate confisus , & in te  
ſperans non confundar. Lætifica animam ſer-  
vi tui, & ſupple quod mihi deefit, tu benignif-  
fime Salvator, qui omnes ad te vocare digna-  
tus es, dicens : *Venite ad me omnes qui labora-  
tis, & onerati eſtis, & ego reficiam vos.* Refice  
me teipſo, quia in te ſunt omnes cæli deliciæ  
ex copioſiſſimo fulmine gaudiorum Dei cum  
tanta plenitudine emanantes, ut homines dignè  
ad te accedentes inexplicabili lætitia replere  
poſſint. Uni intime tecum animam meam ,  
& fac me dignum, ut huic mensæ ſupercae-  
leſti cum debito virtutum ornatu affideam,  
& dulcedine perfruar præſentis Divinitatis.  
Amen.

## §. XVII.

## Oratio ad Spiritum Sanctum.

**V**eni Sancte Spiritus , amor Patris &  
Filiī , mundator ſcelerum , curator  
vulnerum, fortitudo fragilium , mœren-  
tium consolator, fulgor intellectus, & vin-  
dex libertatis. Veni è patria felicitatis, & cor-  
dis mei penetralibus tam potenter illabere,  
ut vi-

ut vitia omnia & defectus tuo igne consumas, & omnia peccata mea remittas. E-mitte in animam meam lucis tuæ radium, quo illuminante intellectum, quæ tibi sunt placita videam: quo affectum inflammante ad ea prosequenda tota virtute incumbam. Fac me dignum sacris altaribus ministru-m, neque torrente tuæ voluptatis inebria, ut cælesti suavitate in hac divinissima mensa degustata, nihil venenatæ mundi dulcedinis libeat amplius degustare. Imbuat me & perficiat leptiformis Spiritus tuus, & ad illum scientiæ gradum fac me pertingere, ad quem pervenit Apostolus tuus, cum dicebat se ni-hil scire, nisi Christum & hunc crucifixum. Roboretur iinfirmitas mea fortitudine tua, vincat bonitas tua malitiam meam; & defor-mitas mea tua pulchritudine decoretur. Sur-sum erige me per æternorum affectionem, copula tecum per amoris unitatem, conserva per finalem perseverantiam; ut tuo ductu-revolet anima mea ad te principium & fi-nem suum, à quo nunquam sepa-retur. Amen.

*Oratio ad B. Virginem.*

**G**loriosissima Mater Dei Virgo Maria, tota fiducia mea, & unicum solatium languentis animæ meæ, precor te, ut mihi miserissimo peccatori assistere hac hora digneris, qua pretiosissimum Filii tui corpus & sanguinem æterno Patri oblatus sum; sicut amans & dolens eidem Filio tuo in cruce pendentis & se pro nostra salute offerenti astitisti. Ne me despicias, Mater misericordie, ob intolerabilem peccatorum meorum fœditatem; neque avertas faciem tuam à me, quem Filius tuus tanto amore dilexit, ut pro memori dignarus sit. Plena es gratiarum, plena rōre cœlesti, innixa super dilectum tuum, delitiis affluens. Ciba ergo pauperem tuum de superfluenti mensa tua: tuarumque virtutum vestibus indue me, ut his ornatus divino conspectui gratus appaream. Memento illius charitatis, quia verbum Dei ex te carnem assumpsit, ut tu fieres mater nostra. Aperi manum tuam, & imple me benedictionibus, quibus te Deus benedixit in æternum, ut te interveniente tremenda mysteria acceptabiliter perficere, & sancta sanctorum dignè merear degustare.

## Oratio ad Sanctos Angelos.

**S**ancti Angeli, purissimi spiritus, ministri Dei Altissimi, qui facitis voluntatem ejus, & orantium preces in cælum desertis : Tuque præcipue fidelissime Custos meus , state mecum juxta aram , in qua Deo Patri totius mundi pretium oblatus sum , & in vestris thuribulis incensum orationum mearum suscipe, ut fumus aromatum hujus divini sacrificii ascendat per manus vestras in conspectu Dei. Purgate, illuminate, perficite, & dirigite me, vestramque puritatem & innocentiam impetrare mihi , ut appaream coram Deo decenter ornatus.

**S**ancti Archangeli, duces illustrissimi militia cælestis, instruite me ut hæc sancta mysteria percipiam, fidemque vivam & efficacem hujus sacramenti in me excitate.

Altissimi Principatus, vera pace interna animam meam componite ut in ea jugiter commoretur Dominus, de quo scriptum est,  
*Et factus est in pace locus ejus.*

**S**anctissimæ Virtutes assistite mihi, ut proficiens de virtute in virtutem Deum deorum dignus sim oculo fidei cernere , manibus contractare , intus recipere , ac tandem

tandem in patria clarè vobiscum intueri.

Invictissimæ Potestates, dæmonum impetus cohibete, ne mihi appropinquent sacrificanti; ut sine impedimento dignè merear Deo servire, & ministrare. Potentissimæ Dominationes veram mihi & sanctam libertatem obtinetе, ut nec peccato serviam, nec corporis mei appetitui, & sensibus subdar. Throni stabiles & sublimes, sedes pulcherrimæ Dei, discam à vobis veram humilitatem & subjectionem, ut fiat anima mea gratissimum domicilium Deo, qui superbis resistit, & super humilem & quietum requiescit.

Clarissima & nobilissima cœli lumina Cherubim, illustrate mentem meam plenitudine scientiæ, ut summam vilitatem meam, hujusque sacrificii infinitam excellentiam agnoscam.

Supremi spiritus Seraphim, ardentissimi amatores Dei, solvite gelu cordis mei, & vestrum in eo ignem succendite, ut Deum vobiscum ardenter amem, atque utinam facut vos.

## §. XX.

### *Invocatio omnium Sanctorum.*

Sancti Dei omnes, cives supernæ patriæ,  
incli-

incline aures vestras & dimitte lumina ad me, meamque orationem exaudite. Ad vos clamo pauper, nudus, & infirmus, cui omnia desunt ornamenta virtutum: ad vos clamo, & vestram imploro benignitatem; succurrite infirmitati meæ, fidem meam & spem roborate, excitate in me igniculum amoris vestri, induite me ueste nuptiali, ornate donis, quibus abundatis, ut sine rubore introire valeam in locum tabernaculi admirabilis, in aulam cœlestis convivii, in conspectu divinæ maiestatis.

Sancti Patriarchæ & Prophetæ, qui Christum Dominum nostrum dictis prophetatis, & ardentissimis desideriis e cœlo ad terram traxistis, hujusque Sacramenti mysteria variis typis & umbris præfigurastis, preces fundite pro me, ut ipsum Dei Filium sanctè tractare possim & puro corde complecti.

Sancti Apostoli quos Christus in ultima cœna novi Testamenti sacerdotes creavit, ac primùm seipso cibavit, vos supplex exoro ut vestra adjutus ope gratiam non negligam per manuum impositionem mihi collatam, sed magno quotidie augeam incremento.

Sancti Martyres, qui Christo Regi pro nobis crucifixo vicem quam potuistis vitæ oblatione per martyrium rependistis ipsum pro me orate ut ignem sui amoris accendat in corde meo, quo succensus & purificatus meipsum

meipsum magis Deo hostiam vivam & ei placentem; sicque paratus & probatus ad hoc divinum sacrificium accedam.

Sancti Pontifices & Confessores mysteriorum Dei fidelissimi dispensatores, qui hostiam placationis frequenter pro populo obtulisti; pro me obsecro intercedite, ut meum quod oblaturus sum sacrificium Deo sit acceptabile, mihi & omnibus pro quibus illud offeram, propitiabile.

Sancti Monachi & Eremitæ, qui cibo potuque cælesti sæpius refecti pravas concupiscentias, & vitæ hujus pericula superastis, adjuvate me orationibus vestris, ut sacris hisce mysteriis armatus meipsum vincam, & omnes inimicos animæ meæ conteram sub pedibus meis.

Sanctæ Virgines Deo amabiles, quæ studio castitatis dignum in vobis Filio, Dei habitaculum præparasti, & nunc in cœlo canticum novum concinitis, quod nemo potest dicere, nisi fuerit Virginitatis prærogativa eximus, impetrare mihi perfectissimam castitatem, qua corpus & animam in omni puritate contineam, ut Christo Domino, qui pascitur inter lilia, gratum in corde meo exhibeam domicilium.

Sancti mei tutelares N. N. & vos Sancti N. N. quorum hodie memoriam veneramus, vestro consilus patrocinio accedo nunc ad im-

immolandum corpus & sanguinem Jesu Christi Domini nostri, comitamini me euntem ad altare, fulcite meritis vestris, ornate virtutibus, ut hoc sacrificium viva fide, ferventi charitate, & plena devotione perficiam, perque ejus continuum & salutiferum usum vestro dignus consortio tandem inveneriar. Amen.

## C A P. V.

## De Missæ celebratione.

## S: I.

## De proxima dispositione ad Missam.


**P**ervulgatum apud Sanctos Patres axioma est, quod talem se animæ exhibit Deus, qualem se illa præparat Deo. Ideò Christus in Eucharistia aliis quidem est fructus vitæ, panis Angelorum, manna absconditum, paradisus deliciarum, ignis consumens, & tertium cælum, in quo audiuntur arcana verba, quæ non licet homini loqui. Aliis vero est panis insipidus, omni caretens dulcedine, & vitali operatione, & nauseat anima eorum super cibo isto : quia nimis mors est malis, vita bonis

bonis; & sicut quisque erga Deum affectus est, talem ipsum erga se experitur. Pauci sunt qui admirabiles hujus sacri convivii insentiant effectus, quia pauci sunt, qui se ad illos recipiendos ritè disponant; qui sentiō cogitent se ad sancta sanctorum accedere ad altare Dei, ad Deum ipsum. Ideò multi infirmi sunt & imbecilles, & dormiunt multi. Mortem olim summo sacerdoti minabatur Deus, si ausus fuisset introire in sancta sanctorum sine strepitu tintinnabulorum, non radians gemmis, non fulgens auro omniumque virtutum varietate circumamitus. Quam ergo pœnam merebitur novæ legis sacerdos, qui non ad arcam typicam, sed ad Deum ipsum accedit, ut filium ejus Dominum Jesum Christum immolet, tangat, comedat; nisi id faciat ea solitudine attentione, & apparatu, qui dignus sit tali convivio, dignus Deo? Instante itaque celebratione totis viribus curare debet, ut in aera cordis ignem divini amoris succendar, actusque eliciat diversarum virtutum, qui heroici sint, & tanto sacrificio, ejusque termino & objecto, quantum fieri poterit, convenientes.

Quia verò in hoc sacrificio non solum animus, sed etiam corpus occupatur, ipsum quoque oportet ab omni sorde incontaminatum custodire. Si enim sacerdos Mosaica

sacrifi-

sacrificia, quæ non nisi infirma & egena ele-  
menta fuerunt, ac umbra futurorum, oblatu-  
rus, ex Dei præscripto nitidis vestibus indui,  
corpusque lavare tenebatur: quanto magis  
debet à sordibus etiam corporeis Christia-  
num sacerdorem expurgari, qui Domini sui  
carnem, & sanguinem offert, comedit, bibit?   
Et primò quidem necessariæ celebraturo sunt  
hæ corporis dispositiones, jejunium seilicet,  
castitas, & carnis munditia, de quibus dispe-  
rere ad scholasticos spectat: vestes item com-  
positæ, & modestæ, quæ sordibus careant &  
pompa, nec quicquam redoleant, quod à sta-  
tu sacerdotis alienum sit. Tum quia Christus  
ante hujus sacramenti institutionem lavit  
pedes discipulorum suorum, debet sacerdos  
pedes animæ, qui sunt affectus, ab omni  
macula expurgare, cor lacrymis ablueret, &  
dum manus lavat actu ferventissimo con-  
tritionis omnem vel levissimam culpam ex-  
piare. Cum verò lotis manibus hostiam pa-  
tenæ imponet, intentionem renovabit, con-  
siderans quod ille panis mox fiet corpus Chri-  
sti: tum ex suæ vilitatis & immensæ dignita-  
tis hujus mysterii apprehensione, actus  
elicet timoris & confusionis.



## §. II.

## De Sacris vestibus, &amp; earum significatione.

Sicut Reges & Magistratus non vulgari & quotidiano vestitu in publicis functionibus uti solent, sed alio augustiore, quo potestas eorum appareat, & ipsis reverentia concilietur: ita sacerdos celebraturus sacro & peculiari utitur habitu, amictu scilicet, alba, cingulo, manipulo, stola, casula, sive planeta, quibus & passio Christi ante sacrificium recolenda representatur, & ejusdem virtutes exprimuntur, quibus ornari celebrantem par est, ut sacerdotio fungatur in justitia & sanctitate veritatis. Cum enim hoc sacrificium incruentum idem sit cum sacrificio crucis, ut supra explicavimus, congruum est ut sacerdos, qui Christi pro nobis morientis personam gerit, ejus quoque similitudinem habeat in vestimentis; idque ad decus & reverentiam sacrificii adhibeat, quod impius Iudæorum furor ad contumeliam intulit Salvatori. Porro Amictus velamen illud significat, quo facies Christi velata est, cum percutiebant eum illudentes & dicentes, Prophetizanobis, quis est, qui te percussit? Alba vestem albam denotat, qua ab Herode tan-

E

quam

quam stultus indutus fuit. Cingulum funes, quibus in horto vinxerunt eum; sive flagella, quibus columnæ alligatum crudelissime cœciderunt. Manipulus vincula, quibus adstrictæ sunt manus ejus tanquam hominis nefarii & scelerati. Stola funes collo ejus injectos, sive crucis patibulum humeris ejus impositum, & in quo pro nobis pependit. Planeta vestem purpuream, quam ei milites in domo Pilati tanquam ludicro Regi imposuerunt. Cum igitur hæc indumenta signa sint eorum, quæ Christus pro nobis perpessus est, varii actus à sacerdote, dum illis induitur, eliciendi sunt, amoris, doloris, gratitudinis, & intensissimi desiderii ejus patientiam & humilitatem imitandi in doloribus, afflictionibus, opprobriis, aliisque adversitatibus sustinendis.

Considerandæ sunt etiam virtutes, quæ per eadem indumenta mysticè designantur, ut discat sacerdos, qua virtù sanctimonia & morum integritate præditus esse debeat: scriptum est enim: *Sacerdotes tui induantur justitiam, omnibus scilicet virtutibus ornati sint, quas justitiæ nomine passim sacræ litteræ comprehendunt.*

Amictus itaque significat oportere mentem in æternæ dumtaxat salutis, rerumque cœlestium consideratione fixam habere, ab omnibus curis rerum caducarum amotam,

& con-

& contra quoscumque hostium incursus spe  
& fiducia in Deum tanquam galea salutari  
communitam. Refert etiam Amictus Chri-  
sti Domini humanitatem, cuius caput Di-  
vinitas est, quæ ab illa occultatur, sicut A-  
mictus caput tegit sacerdotis. Neque enim  
oculi nostri Solis justitiae infinitum splen-  
dorem intueri potuissent, nisi carnis nube ope-  
xitetur. Quare sacerdos, cum illum acci-  
piens osculatur & capiti imponit, se amoris  
osculo sacratissimam Christi Humanitatem  
tangere, & capiti imponere putet, ut ea se  
protegat & tueatur, dicens cum Propheta,  
*Domine virtus salutis mea obumbrasti caput*  
*meum in die belli.* Obiter quoque per Ami-  
ctum monetur sacerdos maximam servare  
oculorum modestiam, cum pergir ad Altare,  
& ibi manet, & ab eo redit, nihil prorsus  
aspicioendo, nisi quod necessarium est, ut vi-  
deat quod facit.

Alba torum corpus regens innocentiam,  
simplicitatem, puritatem, animique cando-  
rem, & pulchritudinem indicat, quæ totum  
sacerdorem complecti, & exornare intus &  
extra debet, atque in omnibus operibus ejus  
splendere, ut sit sanctus & immaculatus in  
conspicu Dei, seque talem semper exhibeat  
divinis mysteriis celebrandis.

Cingulum indicium est Castitatis, quæ  
in sacerdote ita splendere debet, ut nullam

prorsus tam in corpore quam in corde admittat labem. In cuius rei typum jussit olim Deus, ut comedentes Agnum, accingerent renes suos: & ipse Christus ait, *Sint lumbi vestri præcincti*. Idem quoque B. Joanni apparuit in Apocalypsi præcinctus zona aurea, ut nimis intelligamus oportere nos omnes affectus purificare, & amorem carnalem vincere spirituali, quod est aurum charitatis.

Manipulus præmissio crucis osculo sinistro brachio insertus ostendit lachrymas, dolorem & pœnitentiam, quibus lugere peccata, ac perpetuò dolere sacerdos debet; carnis item & spiritus mortificationem, & humilitatem, qua accedendum est ad altare; tum futuram bonorum operum retributionem, si-  
cū Psalmographus cecinit: *Euntes ibant & flebant mitentes semina sua: venientes autem venient cum exultatione portantes manipulos suos.*

Scola collo superposita, & in modum crucis per medium pectoris ducta demonstrat sacerdotem teneri se Deo unire & quodammodo colligare, suamque crucem Dei causa patienter ferre, divinæ legi cum omni obedientia se subjecere, ejusque jugum alacriter portare, ac semper memorem esse mandatorum Dei ad faciendum ea.

*Casula, quæ cæteris vestibus splendidior  
& pre-*

& pretiosior illis superinduitur, signum est Chartatis, quæ reliquis virtutibus excelsior omnibus supereminet tanquam illarum Regina, & vinculum perfectionis. Omnes enim sine ea sunt imperfectæ, ab ea pendent omnia mandata divinæ legis, & omnia bona in ipsa continetur. Sicut autem casula in duas partes dividitur, ita charitas duplex est, erga Deum & proximum: & sicut illa varios exigit colores juxta temporis aut festivitatis diversitatem; ita hæc varios affectus, nunc lætitiaæ ob Dei magnalia, nunc gratitudinis ob ejus beneficia, nunc fortitudinis in adversis, nunc tristitiaæ ob propria & aliena peccata.

Hæ sunt præcipuae virtutes, quas vestes sacerdotales significant, quarum actibus induere se debet sacerdos, ut suum dignè offerat sacrificium. Consuetas autem Ecclesiæ preces singulis indumentis accommodatas attentè & devotè recitatib: & cum induitus fuerit seipsum considerabit tanquam lumen in vestimentis ovium, & rubore suffusus veniam à Deo flagitabit,

## §. III.

*De accessu Sacerdotis ad Altare.*

**S**i ad omnes sacras functiones sanctè accedendum

dendum, & omnes sanctè peragendæ sunt ; multò majori sanctitate hoc divinum sacrificium offerendum est, quò nihil sanctius , nihil excellentius, nihil divinius esse potest. Ad hoc omni conatu niti debes, Christiane sacerdos, si tam sublimi, & tremendo ministerio ritè & perfectè fungi desideras. Quia in re ut tibi prosim, documenta quædam generalia præmittam : deinde sigillatim proponā aliquot considerationes pro singulis sacrificiis partibus, ex quibus pios elicere affectus possis, & mentem utiliter occupare, ne distrahatur. Neque deterreas si hujusmodi considerationes & affectus aliquantò fusius explicavero : licet enim multis verbis describantur, possunt tamen in momento elici, nec Missæ celebrationem solito prolixiorem reddent, ut re ipsa experieris ; nam ipso usu memoriæ tenaciter insigntur, adeò ut eos quasi naturaliter elicitus sis, absque ulla confusione , aut capitis fatigatione. Primum generale documentum est , ne toto sacrificii tempore Deum offendas ullo peccato veniali : nec ullo defectu & imperfectione tam venerandi sacrificii excellentiam contamines. Id vero assequeris, si ea reverentia, attentione & devotione celebraveris, quæ omnem vel levissimam animi evagationem excludat : si exactissimè & scrupulosissimè observaveris quicquid in Missa-  
li præ-

li præscribitur circa ritus & cærimonias, eo modo quo à viris serio perfectioni incumbentibus observari solent.

Secundò, omnia verba, quæ sive elata, sive submissima voce proferuntur, clare, distinctè, ferventer, & absque ulla festinatione pronunciabis, nihil interim mente revolvens, quantumvis bonum & sanctum videatur, quod à propria & litterali verborum significacione alienum sit, ut te menti Ecclesiæ conformes, quæ omnes Missæ preces, lectiones, & sententias magno cum delectu ad sacerdotis & astantium instructionem & devotionem selegit. Ad hoc autem plurimam prodiderit omnes Missæ ritus perspectos habere, eaque omnia probè intelligere, quæ tum in lectionibus, Collectis, Evangelio, Versibus, & cæteris hujusmodi; tum in canone continentur, quæ facile disces ex eorum lectione, qui de officiis Ecclesiasticis scripserunt, quales sunt Isidorus, Amalarius, Rabanus, Berno, Hugo Victorinus, Rupertus Abbas, Dionysius item in libro de Ecclesiastica Hierarchia, Germanus in Theoria rerum Ecclesiasticarum, & ex recentioribus Gabriel Biel in Canonem, Durandus in Rationali, Joannes Baptista Scortia de Sacrificio Missæ, & alii plures. Affectus vero elicies, quales infrà propnam, eorum quæ recitas & agis sensui & significationi convenientes.

Tertiò, sicut in Missali præcipitur, ante-  
quam sacris te vestibus induas, Mislam cele-  
brandam perquires, perleges, & ad ea quæ  
dicturus es signacula ordinabis, ne te postea  
contingat aut in verbis hæfitare, aut in cære-  
moniis desicere, & perturbari.

Quartò, Processurus ad Altare, Crucifixum  
vel aliam imaginem humillima inclinatione  
salutabis, te tanto ministerio indignum repu-  
tans, atque ideo ipsius Christi, sanctorumq;  
opem implorabis. Tum ipsum Christum  
mente intueres, quasi Cruce onustum & ad  
Calvariæ montem iturum, ante te inceden-  
tem. Sequere ipsum primarium offerentem,  
cujus passio & mors à te debet repræsentari:  
sequere, inquam cum modestia & gravitate,  
& agmina Angelorum te undique stipantia  
venerare: teque existima ex hoc mundo in  
cælum transferri.

Quintò, Cùm perveneris ad Altare, cæ-  
lum tibi desuper veluti apertum contempla-  
re, & curiam cælestem, Deumque ipsum  
spectantem te pro universa Ecclesia hostiam  
litantem immaculatam. Memineris pœnam  
mortis olim indictam bestiæ quæ montem  
tetegisset, idque tibi applica hominum  
pessimo, & timorem concipe. Mox in Deum  
assurgens, fatage quantum potes ferventissi-  
mos actus charitatis elicere, cupiens in Chri-  
stum totus converti, eique simillimus fieri  
virtu-

virtutum imitatione. Cum denique librum  
aperis, memor esto libri, quem aperuit Agnus,  
& septem signaculorum ejus ; & desidera  
Christi fidem in universum orbem propaga-  
xi.

## §. IV.

*De initio Missæ usque ad Introitum.*

**C**alice ritè collocato & Misericordia aperto,  
stantis paulisper in medio Altaris, & facta  
cruci inclinatione te cum Abrahamo quasi  
pulverem & cinerem ante conspectum Do-  
mini confiteberis, imitans Christum, qui cæ-  
los inclinavit & descendit formam servi ac-  
cipiens : quòd enim humilior fueris, eò gra-  
tior & acceptior erit Deo oblatio tua. Mox  
descendens ad crepedinē Altaris, Verbi æter-  
ni Incarnationem recole, ejusque dilectionem  
& admirabilem promptitudinem ad o-  
pus nostræ redēptionis subcipiendum. Ite-  
rata autem inclinatione te intime humilia, &  
Deum adora pro omni creatura. Dum signo  
Crucis te signans dicis, *In nomine Patris &*  
*Filiī, & Spiritus sancti*; animadverte quale &  
quantum sit nomen, à quo sacrificium auspi-  
caris, & sic te gere ut tantam decet mājeſta-  
tem. Magni momenti est Sanctissimæ Trini-

tatis præsentiam initio concipere, & ab ea nunquam deflectere ; ad ipsam enim & ad ejus gloriam oblatio dirigitur, ejusque memoria robur tribuit ad improbos hostium conatus elidendos, qui semper tentant variis & inutilibus curis , atque imaginationibus mentem à sacrificio avocare. Sic conceptâ Dei præsentia , duos affectus raptim elicies, Fidei contra infideles, Trinitatem negantes, & recordationis Crucis Christi, atque passionis in ea completæ , ex qua fluxerunt omnia bona. Hos autem affectus ad omne signum crucis renovabis.

Sequitur antiphona, *Introibo ad altare Dei,* quæ ter repetitur ante psalmum , in ipso, & post ipsum ; ut intelligas spirituali impulsu, & alacritate , ac summa veneratione totam Missæ actionem peragendam esse; omni abjecta tepiditate. Admirare Dei bonitatem, qui te vocavit ad Altare suum : quis enim es tu , ut audeas ad ipsum introire ? Ora abscondi in abscondito faciei Domini à conturbatione malorum spirituum ; ne immittentes tetra phantasmatâ divinum perturbent ministerium. Ora etiam renovari in te animæ juventutem , quæ est fervor spiritus , ex quo vera & solida lætitia procedit.

*Ad primum versiculum psalmi, Iudica me Deus,*

**D**eus, considera ea præparatione & disposi-  
tionē ad altare accedendum esse, ut Dei judi-  
cium non pertimescas, ut discernaris à gente  
non sancta & iniqua, siisque purus & sine  
macula ante Deum, quantum fert humana  
fragilitas. Hanc autem puritatem humili-  
ter petes, cum certa fiducia eam meritis  
Christi obtinendi.

**A**d 2. *Quia tu es Deus fortitudo mea.* Eru-  
besce quod toties tanti sacramenti divino  
alimento confortatus adhuc imbecillis es,  
adhuc tristis incedis, & cuicunque levissi-  
mæ tentationi turpiter succumbis. Meritò  
ergò repellit te Deus, meritò te affigit ini-  
micus, nisi ipse vires suppeditet, qui est for-  
titudo tua & robur tuum.

**A**d 3. *Emitte lucem tuam.* Pete divinum  
lumen, ut veritatem à vanitate discernens,  
iplam veritatem sequaris, cuius splendoribus  
interior sensus illustratus cum externo sacri-  
ficio concorderet. Mons verdus sanctus, qui in  
hoc versiculo commemoratur, altare est, Cal-  
varyæ montem indicans, quia in eo Christi  
passio & mors repræsentanda est.

**A**d 4. *Et introibo.* Magnum renova in te  
reverentiæ affectum erga Altare & sacri-  
ficium.

**A**d 5. *Confitebor tibi in cithara.* Excita  
in te cordis lætitiam, quæ per citharam signi-  
ficatur:

sicatur: sed statim oculos ad tuam imperfectionem reflectens ingemisce & dic, *Quare tristis es anima mea, & quare conturbas me?*

Ad 6. *Spera in Deo.* Ne despondeas animum, restat enim spes in salutari tuo, in quo tota fiducia collocanda est, quoniam ipse dabit ut obtentā culparū veniā, in ipso gaudreas, & in ejus laudibus perseveres.

Hac spe excitatus dices cum ingenti fervore, *Gloria Patri & Filio*, caput inclinans & offerens ad omnia adversa, & ad mortem pro Deo sustinendā. Tum repetita antiphona *Introibo*, ut benē memineris quō ingrederis, & quid aggredieris, dices, *Adjutorium nostrum*. ut discas non ponere fiduciam in tuis viribus & industria, sed in eo *qui fecit calum & terram*, à quo duplex adjutorium postulabis, pro consequenda æterna salute & mediis ad eam necessariis, & pro illa peculiari necessitate, pro qua offers sacrificium.

Subditur statim generalis confessio, quia *justus prior accusator est sui*, quam humiliter recitabis, actum eliciens contritionis, ut est distincta ab attritione; dolens scilicet de peccatis tuis & totius mundi super omnia mala, idq; purè propter Deum super omnia bona dilectū: dabisque operam ut verba illa, *mea culpa*, cum magno doloris sensu proferas, & cum bona spe divinæ misericordiæ prout tuis & aliorum peccatis. Confiteris autem

non

non solùm Deo Creatori, Redemptori, & Judici tuo ; sed etiam B. Virgini, cuius innocentem filium sceleribus tuis interfecisti : B. Michaëli Archangelo, cuius obsequiis te ingratum exhibuisti : B. Joanni Baptistæ, & aliis Sanctis, quorum monita & exempla contempsti : fratribus quoque, quibus scandalo fuisti. Agnoscens autem fragilitatem tuam & necessitatem, auxilium eorum imploras quibus confessuses, ut pro te orent, quod humiliter facies : & cum astantes preces pro te fundunt dicentes, *Misereatur*, dum etiam ipsi confitentur, dum sequentes versiculos recitas, illum in te spiritum excitabis, quem verba sonant, magno animi ardore & devotione.

Osculum altari semper figes tenero amoris affectu erga Dominum Jesum Christum, cum intenso desiderio semper ei adhaerendi, & ideo brevem sed ferventissimum amoris actum elicies.

### §. V.

#### *De Introitu usque ad Epistolam.*

**I**n troitum & ea quæ sequuntur sedatè, attente, & devotè recitabis, adhibitis magna cum honestate præscribris cæremoniis, ut spiritua-

spiritualem ac divinam rem agi omnes intelligent. Attendes autem ad sensum verborum, & cum dicis *Gloria Patri, Sanctissimam Trinitatem* adorabis optando ut omnes illi serviant. *Kyrie eleison* ad singulas tres personas mente in cælum erectus diriges petens remissionem peccatorum cordis, oris & operis prote & aliis: & quia novies repetitur quot sunt Angelorum chori, ipsorum vocibus tuam conjunges, & cor ad illos elevabis. Ad *Gloria in excelsis*, miraberis quomodo peccator in terra aliena canticum Angelorum canere presumas: num alios affectus adjunges laudis, adorationis, gratiarum actionis, fidei, spei, amoris, zeli gloriae Dei, petitionis & obsecrationis, juxta sensum verborum. Hæc autem verba, *Tu solus sanctus, Tu solus Dominus, Tu solus Altissimus Iesu Christe*, intensiori affectu charitatis & reverentiae erga Christum Dominum pronunciabis, desiderans, ut ab omnibus ametur, honoretur, glorificetur.

Hymno absoluto sequitur salutatio populi per hæc verba, *Dominus vobiscum*. Quoties autem ea dices, optabis intimo affectu Ecclesiam Dei & toti mundo omnem Dei benedictionem, per quam singulis animabus id quod maxime indigent, conferatur. *Diritus Collectas erubescet, quod mediator inter Deum & populum esse audeas, qui toutes*

ties alios ad malum pertraxisti. Cum dicis  
*Per Dominum*, offeres Deo omnia merita  
Christi cum magna fiducia quia scriptum est,  
*Quicquid petieritis Patrem in nomine meo dabit vobis.* Expendes autem verba Orationum,  
quæ & per se magni ponderis & efficaciarum  
sunt, & cum in persona Ecclesiæ à celebrante recitantur, facilius postulata impre-  
trant ob sacrificii præstantiam.

## §. V.L

*De Epistola, Evangelio, & Symbolo.*

**A**bsolute Introitu sequitur instructio populi in fide, per doctrinam Prophetarum & Apostolorum in Epistola, per verba Christi in Evangelio, per articulos fidei in symbolo; quæ omnia mysteriorum sanctificationi, ut nos purgent & præparent, præmittuntur..

Ipsam verò Epistolam & Evangelium lectorus mente elice hunc actum humilitatis. Ego in Ecclesia divina depromat oracula, qui tamdiu sedi in Cathedra pestilentiae? Ego Evangelium promulgabo, qui factis & exemplis Evangelium impugnavi? Deinde considera beatos nos esse, quia ut ait Baruch Propheta, quæ Deo placent manifesta sunt nobis,

nobis. Deus enim voluntatem suam nobis revelavit per Prophetas & Apostolos in eorum libris & epistolis, & per Filium suum in Evangelio. Ideò hæc omnia magna cum attentione & reverentia legenda sunt tanquam sermones Dei, gratias ei agendo, quod mundum doctrina sua illuminare & instruere dignatus sit: promptumque animum offerendo ad servanda ipsius mandata tam in prospectis, quam in adversis. De hoc autem nos monent in Epistolæ lectione manus super librum positæ, & veluti operi admotæ.

Graduale etiam, & cætera quæ sequuntur, exequandi desiderium significant, & ascensum ad apicem Christianæ perfectionis, qui sunt fructus Propheticæ & Apostolicæ prædicationis. Quidam devotus Sacerdos dicebat se quotidie duabus concionibus interesse elegantissimis & efficacissimis, lectioni nimirum Epistolæ, & Evangelii: quas sic audiendas asserebat, ac si Apostolus & Christus præsentes forent, & loquerentur, cum firmissimo proposito exequandi quod docent. Turpissima enim esset ejus præcepti transgressio, quod ab Apostolo & à Christo ea die auditum fuit, nam videretur Verbi Divini statim oblitus esse, & tantos Concionatores neglexisse.

Initio Evangelii librum & ipsum signabis signo crucis cum tenero affectu erga Christi

Christi Passionē & mortem. Fit autem ipsum signum in fronte sede pudoris, ne Evangelium erubescas, in ore ut palam annuncies & confitearis: in pectore ut illud in corde semper conserves, nec ulla diaboli suggestio fructum ejus impedire queat. In fine librum ibi osculaberis, ubi prius crucem formaveras, ad significandum amorem, quo ea doctrina amplectenda & executioni mandanda est: ideoque propones factor verbi esse, & non tantum auditor; actu ferventissimo amoris elicto erga Deum ejusque legem.

Certis diebus lectionem Evangelii excipit Symbolum, ut fides excitetur, & sicut corde ad justitiam creditur, sic ore confessio fiat ad salutem. Actus igitur fidei exercebis verbis correspondentes, & contrarias hæreses detestaberis. Christo item gratulaberis ob ejus gloriam, dum ipsius Resurrectio, Ascensio, & judicaria potestas commemoratur, & gaudebis, quia regni ejus non erit finis. In illis verbis, *Qui cum Patre & Filio simul adoratur, Spiritum sanctum adorabis, & intimo animi sensu sanctissimam Trinitatem glorificabis ob singula beneficia naturæ, gratiæ, & gloriæ omnibus creaturis concessa & concedenda.* Demum cum dicis, *Et vitam venturi seculi, spem firmam concicies vitam æternam meritis Christi obtinendi.*

## De Offertorio usque ad Canonem.

**H**Actenus instructio fidelium & Missa Ca-  
techumenorum, qui deinceps adesse non  
poterant, indicente eis Diacono ut exirent.  
Jam sequitur Missa fidelium, & quia hic in-  
choatur actio sacrificii incruenti, majori fer-  
vore & igneo pietatis sensu singula verba  
proferenda sunt. Exorditis autem ab osculo  
altaris; in quo divinum sacramentum perfici  
debet, ut hac amoris & honoris exhibitione,  
Dei quodammodo captes benevolentiam.  
Sed quia Dei amor annexam habet erga Pro-  
ximum charitatem, sequitur populi saluta-  
tio tanquam commune amicitiae signum,  
quo ostendis te omni odio & dissensione ca-  
rere, præcepit enim Dominus non esse offe-  
rendum munus, nisi prævia cum fratribus,  
qui aliquid habent contra offerentem, recon-  
iliatione. Astantes etiam mones, ut simul te-  
cum orent, dicens, *Oremus*, & hoc ferventer  
facies respiciens in cælum ad Deum Patrem,  
deinde ad te ipsum, tuumque nihilum, qui  
peccator cum sis omnium notarum æterno  
Patri Flium suum offerre debes.

Quando patenam cum hostia in manibus  
accipies, pones in ea cor tuum, & omnium  
circun-

circumstantium , omniumque fidelium, ut ea quoque Deo offeras hac intentione , quod sicut panis, quem offers, mox convertetur in corpys Christi ; ita cor tuum & omnium fidelium, in ipsum Christum, per amorem & imitationem transformatum, adeò ut dicere omnes possint, *vivo ego jam non ego, vivit vero in me Christus.* Idem repetere poteris in calicis oblatione.

Dum vinum calici infundis , gratias ages Deo, quod sub his speciebus se occultare voluerit pro amore tuo : & cum misces aquam, desiderium excitabis te totum immergendi in abyssum meritorum Christi ; atque ad intimam cum Deo unionem suspirabis. In oratione autem, *Deus qui humana substantia dignitatem,* tres veluti mixtiones seu coniunctiones prorsus admirabiles celebrari observabis, primam in humanæ naturæ creatione, cum mortali corpori immortalis anima copulata est: alteram in ejusdem à Verbo facta assumptione , cum duo extrema infinitè distantia in unitate personæ conjuncta sunt : tertiam in ejus elevatione ad gratiam & gloriam , ad consortium scilicet & participationem Divinitatis, quam ardenterissime concupisces.

Quamvis hoc sacrificium unicum sit, duabus tamen partibus constat, corpore videlicet Christi, sub speciebus panis, ejusque sanguis-

languine sub speciebus vini. Ideò pane jam oblato, seorsim procedis ad vini oblationem. Utramque verò extendes ad omnes fines propter quos hoc sacrificium institutum fuit, qui cum sint maximi momenti, cum summo devotionis fervore hæ oblationes fieri debent ac si tu solus essem in toto mundo sacerdos, & ab hoc sacrificio omnium hominum salus penderet.

Subditur brevis precatio. *In spiritu humilitatis ex longiori decerpta*, quam Azarias unus ex tribus pueris inter flamas fornacis Babilonicæ concepit, animo verè contrito & summæ humilitatis affectu recitanda. Sequitur alia oratio, *Veni sanctificator*, quæ Deum invocas omnis sanctificationis auctorem, ut non solum sacrificium jam præparatum perficere, sed sua etiam benedictione completere dignetur.

Dum manus lavas, protestaberis te velle purè ac mundè vivere, & à minimis etiam defectibus emundari: tum gratias ages, quod Christi sanguine lotus sis, aliosque affectus elicies verborum sensui conformes.

In oratione, *Suscipe sancta Trinitas*, non nudam & aridam beneficiorum Redemptionis nostræ, quæ ibi commemorantur, memoriam facies, sed quæ intimæ gratitudinis affectum includat. Quare totus in demississimam gratiarum actionem effusus hanc hostiam infinitæ

nitæ dignitatis te posse offerre gaudebis , ad Dei gloriam, & ad honorem B. Virginis, & omnium Sanctorum, ut ipsi in cælis ante thronum Dei incensum orationum tuarum pro tua aliorumque salute repræsentent.

Postea memor imbecillitatis tuæ & considerans quanti momenti sit tantum sacrificium divinæ majestati offerre , ad circumstantium confugiens suffragia ipsos admones ut pro te orent. Manus autem extendis , ac si omnibus viscera pandas : & rursum jungis, quasi intra pectus receptos complectaris. Ipse verò, qui alios ad orandum hortatus es , secretò quoque oras, ut tuum à Deo sacrificium acceptetur. Porro inter hæc congruos his considerationibus affectus excitabis.

Secretis orationibus absolutis statim clara voce dicis, *Per omnia facula faculorum, nihil sonans temporale, sed sublime & æternum.* Tum populum salutans non te ad eum promore convertis, quia jam debes à terrenis abductus, totus Deo intentus esse, *Jubes autem sursum corda attolli, ac si diceres, Elevamini omnes creaturæ ad Deum, emergite è fœce terræ, & quæ sursum sunt quærite, quæ sursum sunt sapite, non quæ super terram.* Corda verò ad superna subiecta ad gratias Deo agendas hortaris, quia nihil dignius , nihil magis æquum & salutare, quam beneficiorum memorem esse. Ideò cor tuum expandes ad

ad omnes creature, & ad omnia beneficia illis collata, gratiarum enim actio potissima est ad ampliorem gratiam dispositio. Succedit Præfatio, quasi proloquium, seu præparatio quædam ad eam actionem, quæ propriè sacrificium continet, in qua Deum impensius laudas, advocatis etiam caelestibus spiritibus, ut tecum concinant. Ne tamen temerè in Angelorum choros te ingeras, facultatem à Deo petis humili supplicatione dicens, *Cum quibus & nostras voces ut admitti jubeas deprecamur.* Ita Angelicis junctus agminibus sacrum Trisagion psalles cum summa reverentia & fervore, qui tantus sit, ut quantum fieri potest, supernorum spirituum affectui correspondent, & adæquetur. Si enim tremunt Potestates, quæ sunt veluti cæli columnæ, quanto debes horrore ac tremore concurti tu vilissimus tertæ vermiculus, qui Deum toties & tam enorriter offendisti? Porro continet hic hymnus tres laudes, & duas petitiones. Nam primò laudas sanctitatem, potentiam, ac supremum Dei dominium, cum dicis *Sanctus, Sanctus, Sanctus, Dominus Deus Sabaoth.* Secundò celebras gloriam ejus, quæ in tot creaturis in cælo & in terra tam mirabiliter elucet, his verbis: *Pleni sunt celi & terra gloria tua.* Tertiò magnificas Christum Dominum dicens, *Benedictus*

*nedictus qui venit in nomine Domini: & cum  
hoc dicis, ipsum invitabis in animam tuam  
affectu omnium Sanctorum. Duæ verò pe-  
titiones insunt verbis istis, *Hosanna in excelsis,*  
*quæ bis repetuntur, & illis salutem postu-  
las, & quæ ad eam sunt necessaria , primò à  
Deo, deinde à Christo. Hic autem hym-  
nus ideo Canoni præmittitur, ut ex ipso  
admonearis te in maximi momenti negotio  
coram throno divinæ Majestatis consistere,  
ac veluti in Sancta sanctorum introire : & si  
haec tenus oportuit te purum & ferventem  
esse, jam memineris te deinceps debere tan-  
to ardore inflammari , ut eo possis omnes  
circunstantes , imò universum terrarum  
orbem succendere.**

§. VIII.

*De Canone usque ad Consecra-  
tionem.*

**H**Æc pars Missæ Canon dicitur , id est  
Regula , quæ in sacrificii oblatione  
servanda est. Constat autem , ut testatur  
Tridentinum Concilium , ex ipsis verbis  
Domini, ex Apostolorum traditionibus ,  
ac Summorum Pontificum institutionibus;  
nihil-

nihilque continet quod non maximam redoleat pietatem & sanctitatem, atque offrentium mentes in Deum erigat, ut cum eo conjungantur. Submissa voce recitatur, ut per silentium tum gravitas negotii, quod quasi secretò cum Deo tractatur; tum compositus, pacatusque animi status, qui ad hanc functionem ritè peragendam necessarius est, intelligatur. Ejus verba attente & devotè prolata ipsa literali significatione pios affectus suppeditabunt. Per particulam igitur, connectitur cum præcedentibus: cùm enim tibi Angelorum ministerio, quorum vocibus tuas adjungi in Præfatione rogasti, jam quasi pateat ad cælum via; statim fiducialiter ad thronum Dei accidis, & elevatis sursum oculis, expansisque manibus, preces tuas ad Deum effundis, per Christum eum rogans, uti accepta habeat *hac dona* ab ipso nobis collata, *hac munera à nobis ipsi oblata,* *hac sancta sacrificia*, quæ pro peccatis nostris offeruntur. Et primò quidem personam commemoras, cui oblatio dirigitur, nempe Deum Patrem: secundò, Mediatorem Christum Jesum: tertiò, offerentes, eorumque affectum: quartò res oblatas, quas petis ut Deus acceptet ac benedicat: quintò, eos pro quibus offertur, Ecclesiam scilicet, summum Pontificem, & alios: sextò, ea omnia, quæ consequi hac oblatione desideras, redemptio-

nem,

nem, salutem, incolumentem : septimò, Beatam Virginem, & præcipuos Principes Curiæ cælestis, quorum suffragia memor tuæ imbecillitatis imploras, ut Deum tibi propitium reddant.

Ut omnium recordari possis, pro quibus orare debes, postquam dixisti, *Memento Domine famulorum, famularumque tuarum* : utque ipsæ preces vim habeant efficaciorē, multum proderit cum Christi Domini cruciatus illas sociare, hunc ferè in modum. Primò, pro te ipso orabis per sanguinem pro nobis effusum, ut per illum expieris à peccatis, & eas virtutes obtineas, quæ tibi maximæ sunt necessariæ, & finalem perseveratiā. 2. Per latus transfixum Ecclesiam commendabis, quæ ex eo orta est. 3. Per caput Spinis coronatum, Summum Pontificem, omnesque Principes, & Antistites. 4. Per vulnus dexteræ manus, amicos, consanguineos, & benefactores. 5. Per vulnus sinistræ, omnes qui te oderunt, vel aliqua molestia aut scando affecerunt. 6. Per dextrum pedem transforatum, personas, & negotia à superioribus commendata. 7. Per sinistrum, omnes qui sunt in peccato mortali, ut in dexteram partem transferantur. 8. Per flagella, sputa, & alapas, ethnicos, hæreticos, cæterosque infideles, qui Deum contumeliis afficiunt. 9. Per crucifixionem, Religiosos

F omnium

omnium ordinum , ut crucem voluntariæ  
asperitatis libenter ferant. 10. Per sicut, eos  
omnes qui tuas preces expetunt. 11. Per an-  
gorem, quem in horto pati voluit, omnes qui  
in aliqua calamitate, periculo, necessitate,  
tentatione, aut molestia versantur. 12. Per  
mortem & sepulturam, justos omnes, ut cum  
ipso sepulti semper in justitia perseverent.  
Speciatim verò pro illis orabis , quorum  
Deus meminisse vult, tu nescis: pro his quos  
Deus maximè diligit, licet eorum numerum,  
& nomina ignores; id enim gratissimum illi  
est, ut amicorum ejus memor sis. Ab his au-  
tem orationibus te brevissimè expedites , imi-  
tatus Ecclesiam, quæ paucissimis verbis sei-  
psam, Summum Pontificem & Antistitem,  
omnesque orthodoxos commendat. Neque  
enim decet privatas causas prolixius quam  
publicas tractare, præsertim apud eum Prin-  
cipem, qui omnia scit , & nos admonuit , ne  
orantes multum loquamur. Consultius itaq;  
erit pro omnibus ante Missam fusiū orare,  
ut in ipsa brevior sis.

Postquam verò privatæ devotioni satisfe-  
cisti, rursum publicas Ecclesiæ preces assumis  
pro circumstantibus & pro offerentibus, sive  
præsentes sint, sive absentes: & quia sacri-  
cium jam oblatum fuit in expiationem cul-  
parum, in gratiarum actionem , & impetra-  
tionem omnium beneficiorum, jam prima-  
rius

rius ejus finis exprimitur hac oratione, *Hanc igitur oblationem servitutis nostra, qua protestatis & agnoscis supremum Dei dominium, & infimam nostram servitutem ac subjectiōrem; expansis manibus super oblata vereri ritu, ut ea transferas in Dei potestatem, ipsum exorans, ut ab aeterna damnatione nos eripi jubeat, & in electorum suorum gregenumerari.* Tum ipsi commendas sacrificii oblationem, ut eam *in omnibus benedictam, & inter dona sibi grata ad scriptam gratam, sive approbatam, & confirmatam: atque rationabilem, divinis scilicet rationibus congruentem, ac tandem acceptabilem, id est dignam, quæ non solum ex parte doni, sed etiam ex parte ministri offerentis à Deo acceptetur non quidem ex nostris meritis habere, sed sua gratia facere dignetur.* Porro ad illa verba, *Vt nobis corpus & sanguis fiat dilectissimi Filii tui Domini nostri Iesu Christi; actualem & expressam intentionem renovabis consecrandi corpus & sanguinem Christi per transubstantiationem panis & vini, Christi verbis conficiendam.*

(:†:)

*De Consecratione usque ad Orationem  
Dominicam.*

Post multas oblationes verbis hactenus expressis, sequitur tandem realis oblatio, quia idem Christus incruentè immolatur, qui in ara crucis semel seipsum cruentè obtulit. Quod si hactenus necessaria fuit puritas, humilitas & reverentia; multò major nunc requiritur, cum ad tremendum misterium non sine timore & horrore perficiendum appropinquas. Humilia te igitur quantum potes, & recordare quid acciderit Ozæ: tum ea Christi verba tibi ad aurem dici existima, ecce appropinquat hora & filius hominis tradetur in manus peccatoris. Considera te hic, Christi personam gerere, totumque hominem internum & exterum ad ejus majestatem & sanctitatem compone: & cura ne quid sit in te dissonum à persona quam sustines.

Hæc verba, Qui pridie quam pateretur, proferuntur historicè, & recitativè, ut inspicias & facias secundùm exemplar, quod tibi à Christo Domino monstratum est. Cùma dicis, Accepit panem in sanctas ac venerabiles manus suas, considerabis quām puræ debeant esse manus, quæ tantum pignus attractant, & hinc

hinc disces hoc opus esse divinæ omnipotentiæ. Cum oculos in cælum elevas, illuc transferes universas animæ vires & cogitationes. Cum dicis *gratias agens*, gratias item ages ob hujus' anctissimi sacramenti institutionem. Verba consecrationis prolatus considera te ea formaliter & enunciativè proferre in persona Christi. Ipsis autem prolati penetra oculis fidei id quod latet sub speciebus sacramentalibus: tum genua flectens aspice iisdem oculis fidei exercitum Angelorum te circundantem, & cum illis adeò profunda reverentia Christum adora, ut cor tuum usque ad abyssum humilies. Ad elevationem, Christum in cruce exaltatum contemplare, & ora ut omnia trahat ad seipsum. Varios etiam virtutum actus, eosque intensissimos elicies, nunc hos, nunc illos, fidei, spei, amoris, adorationis, humilitatis, & similium, mente dicendo, *Iesu fili Dei miserere mei. Dominus meus & Deus meus Amote Deus meus, & adoro toto corde & affectu.* Poteris etiam renovare intentionem pro qua celebras, & sacrum offerre secundum quatuor fines. Specialiter verò cum calicē elevas, memoreris cum sensu doloris & lachrymis sanguinē Christi pro te effusum fuisse, & à te sæpè contemptū: ipsumque adorabis veluti in compensationem præteriorum contempnum. S. Petrus Martyr in calicis elevatione

gratiam petebat martyrii & obtinuit: tu ad-  
versitatum incruentum martyrium postula-  
bis.

Ad illa verba, *Hac quotiescumque feceritis,*  
passionis & mortis Christi recordaberis, quam  
consecratio panis à consecratione vini se-  
juncta representat. Et quia peracta conse-  
cratione statim adsunt sancti Angeli, & per-  
severant venerabundi, donec sacrificium sit  
consummatum; tu horum reverentiā æmu-  
lare. Nam si cælum est, ubi est Deus, cælum  
sine dubio efficitur sacrum altare, in quo tan-  
tum peragis mysterium, tuq; admirabili sum-  
mi boni participatione quodammodo deifi-  
caris. Quoties verò hostiam tanges aut cali-  
cem, Christum complectere & cordi tuo ad-  
stringere omni possibili amoris affectu.

Post consecrationem sequitur Oratio,  
*Vnde & memores,* qua Christi passionem, re-  
surrectionem, & gloriosam ascensionem  
commemoras, quibus mysteriis excitatur fi-  
des, spes robatur. Sperare enim debes per  
merita tam beatæ passionis, è qua omnis bea-  
titudo nostra promanat, te aliquando parti-  
cipem futurum resurrectionis, & ascensionis  
in cælum, ac gloriæ sempiternæ. Nec  
nudam solummodo aduersus mysteriorum  
commemorationem, sed simul cum hostia  
pura, sancta, & immaculata, corpore scili-  
get & sanguine Christi: licet enim propter  
species

species sacramentales panem adhuc nomines, non tamen panem qui prius erat, sed panem via aeterna, & calicem salutis perpetua. Elices autem actus gaudii propter Christi glorificationem, & cum dicis, *suprà qua propitio ac sereno vulnu*, offeres Deo omnia antiqua sacrificia.

Cum inclinatus Deum rogas, ut sacerdium perfserri jubeat in sublime altare suum per manus sancti Angeli sui, ad summam interiorē humilitatem te excitabis, & ipsos beatissimos spiritus orabis, ac nominatim S. Michaëlem ut opem tibi ferant. Cum dicis, *Omni benedictione & gratia repleamur*, ingens desiderium elicies consequendi ex meritis Christi omnia possilia dona, quibus maximè possis Deum glorificare. In *Memento mortuorum* orabis primò pro consanguineis : tum pro iis, qui tibi causa fuerunt alicujus crucis, seu molestiæ : deinde pro benefactoribus, postea pro aliquo recenter mortuo ; aut specialiter commendato : demum pro iis, qui neminem habent, cuius suffragiis nominatione juventur.

In illa oratione, *Nobis quoque peccatori- bus*, agnosce te peccatorem esse circundatum infirmitate, & time : licet enim nihil tibi conscientia sis, non tamen in hoc justificatus es. Spem igitur erige ob multitudinem miserationum Dei, & magno animi ardore.

ardore partem aliquam & societatem cum  
sanctis tibi donari humillimè pere, atque in-  
eorum consortium admitti, optando eximiā  
vitæ sanctitatem pro majori Dei gloria in  
Christo Jesu Domino nostro. Per quem, ais  
consequente, *haec omnia, Domine, semper  
bona, panem scilicet & vinum creas*, quia per  
ipsum omnia facta sunt: *sanctificas*, cùm in  
prima oblatione sacrificio sunt destinata: *vi-  
vificas*, mediante transubstantiatione: *benedi-  
cis*, quia per hæc sacramenta copiosam ac-  
quirimus gratiam: *& præstas nobis* in cibum  
& redemptionem. Porrò hæc verba valde  
ferventer pronunciabis, itemque sequentia,  
quia per Christum, cum Christo, & in Chri-  
sto est, *Deo Patri omnipotenti omnis honor &  
gloria*. Hic autem gratulari poteris toti san-  
ctissimæ Trinitati gloriam quam habet per  
Christum: & dum tenes hostiam super cali-  
cem, offeres SS. Eucharistiam, quam sub u-  
traque specie in manibus habes, in laudem  
& gloriam Dei, pro omnibus beneficiis, in  
expiationem culparum, & pro omnium  
bonorum impetracione.

*De Oratione Dominica usque ad  
Communionem.*

**A**Bsolute Canone, jam te ad Communio-  
nem præparare debes factio initio ab ora-  
tione Dominica, quam cum tremore, & filia-  
li erga Deum affectu recitabis, oculis in sa-  
cerdotium intensis, quia Christus simul cum  
Patre preces tuas audit & exaudit. Septem  
sunt ejus petitiones, in quibus summatim  
continentur res omnes à Deo petendæ, & pro  
quarum imprestacione hoc sacrificium offer-  
tur. In prima petitione desiderium excitabis  
eximiae tuae & aliorum sanctitatis, ut gloria  
Dei augeatur, ut ab omnibus ametur &  
timeatur, ejusq; sanctitas, bonitas, sapientia u-  
bique innotescat. In secunda optabis Deum  
in tua, & cæterorum voluntate regnare, si-  
mulq; petes ad regnum suum feliciter perve-  
nire. In tertia rogabis, ut omnes homines sic  
Deo serviant & obedient in terris, sicut ei ab  
Angelis servitur in cælis, nunquam peccan-  
do, & quæ illi grata sunt semper ferventissi-  
mè faciendo. In quarta omnia necessaria pro-  
victu, vestitu, cæterisque temporalibus po-  
stulabis. In quinta, implorata Dei liberalita-  
te pro alimentis, ejusdem clementiam pro re-  
missio-

missione peccatorum deprecaberis, elicto a-  
ctu contritionis, & sinceræ dilectionis om-  
nium iamicorum & aliorum, qui tibi causa  
fuerunt alicujus molestiæ, pure illos aman-  
do propter Deum. In sexta diffidens de pro-  
priis viribus, & timens malitiam & incon-  
stantiam tuam, petes à Deo, ut te præserves  
à tentationibus, ne forte in eas inductus ab e-  
jus gratia & amicitia excidas. In septima à  
malis culpæ & pœnæ liberari preceris, at-  
que ab omnibus adversitatibus, quas diabo-  
lus & mundus contra te moluntur.

Hæc postrema petitio fusius explicatur in  
sequenti oratione, *Libera nos quæsumus Do-  
mine, in qua mala enumerantur, à quibus  
postulas liberari, præterita scilicet, præsentia,  
& futura. Mala autem præterita sunt pecca-  
ta, de quibus scriptum est, Fili peccasti, ne ad-  
jicias iterum, sed de prateritis deprecare, ut tibi  
dimittantur. Præsentia sunt quotidiana pec-  
cata, & aliæ calamitates. Futura sunt tenta-  
tiones, & aliæ imminentes miseriæ, quæ sine  
speciali Dei adjutorio evitari non possunt.* Ad hæc impetranda opem flagitas B Virginis,  
Sanctorumque Apostolorum Petri, Pauli, &  
Andreas & omnium Sanctorum: & signans  
te signo crucis pacem petis, quam Christus  
nebis sua passione promeruit.

Sequitur fractio hostiæ in tres partes, qua-  
rum unam dum calici immittis, intimam

sum Deo unionem postulabis Pacem populo annuncians triplicem cunctis pacem desiderabis pacem scilicet uniuscuiusque cum Deo quæ in ejus gratia & amicitia consistit: pacem cum seipso, quæ in concordia appetitus cum recta ratione sita est, ut quod ista dictat, ille exequatur: pacem cum proximo suo, ut nemo alteri p̄beat offensæ occasionem, sed omnes potius Christianæ charitatis officiis sibi devincent.

Ad primum *Agnus Dei*, elicito actu fidei erga Christum ibi p̄äsentem, qui est verè *Agnus Dei* pro nobis in cruce immolatus, liberari & p̄servari petes ab omnibus miseriis spiritualibus, quales sunt habitus pravi, tepiditas in obsequio Dei, inconstantia in bene cœptis. Ad secundum liberari item & p̄servari petes à miseriis temporalibus, à peste, fame, bello, morbis, & perfectionibus, quatenus à servitio & cultu pacifico Dei nos impediunt. Ad tertium pacem postulabis, quam parit bona conscientia, dominum sui, omniumque rerum creatarum contemptus.

## §. XI.

*De Communione.*

**R**ECTE Psalmographus de Domino lo-  
F 6 quens

quen dixit, & factus est in pace locus ejus : & Apostolus etiam ait, Pacem habete & Deus pacis & dilectionis erit vobiscum. Non ergo mirari debes, si sæpius repetita imploratione docet Ecclesia proximè ante communionem pacem à Deo petere, quæ & omnia bona in se complectitur, & dignum Altissimo præparat habitaculum. Hanc petitionem continet prima ex tribus orationibus, quæ communioni præmittuntur ; postquam in secunda remissionem postulas peccatorum, & donum perseverant. Tertia vero timorem in te excitat ne panis vitæ & potus æternæ salutis prove-niat tibi in judicium & condemnationem : sed mox fiduciam concipies, sperans ut meritis Christi tibi proficit ad tutamentum mentis & corporis, & ad medelam percipiendam. Tum genuflexus Deum adorabis, ardentissimum concipiens desiderium ipsum in sacramento suscipiendo, cum versiculum illum profers, Panem cœlestem accipiam, & nomen Domini invocabo.

Cum dicis, Domine non sum dignus , confite-te indignitatem tuam, sed simul agnosce Dei omnipotentiam & misericordiam sequentibus verbis, sed tantum dic verbo & sa-nabitur anima mea. Te autem indignum fateberis, primò propter peccata tua, secundò ob uitatem naturæ tuæ , tertio quia ex te nobiles nihil habes, nihil potes.

Ante communionem subsiste aliquantu-lum,

lum, & præcipuarum virtutum humilitatis, fidei, spei, charitatis, contritionis, abnegationis, & adorationis actus breviter elice, quos sequenti vel simili modo formabis. Quamvis autem longiusculi videantur, si tamen memoriæ bene impressos habebis, sicut tibi ex ipso usu & agilitate à Deo tributā aedē familiares, ut quasi in instanti eos mente de-promas.

Ita est. Domine Iesu, indignissimus sum, quia omnibus peccatoribus, & ipsis damnatis deterior sum, indignus omni bono, & dignus omni malo. Fretus tamen pietate & misericordia tua infinita, te sumere presumo. Credo Domine, quicquid credit à te edocta S. Romana Ecclesia, & quicquid illa damnat, ego pariter damne & anathematio. Spero à te, & peto omnia auxilia necessaria pro consequenda mea perfectione & salute aeterna tuis infinitis meritis, & Sanctorum tuorum opululationi ac communioni innixus. Gaudio & exulto de omni bono & gloria tua, eiusque propagationem quam maximam desidero. Omnia peccata mea quantum possum detestor propter te, parasus pro iis plenissimè in hac vita satisfacere, ut anima mea purissimum tua Majestatis habitaculum semper sit. Parco omnibus qui me aliquas molestia affecerunt, aut deinceps afficiunt, & eos propter te sincè amo. Offero me ad omnia mala pœna juxta beneplacitum tuum toleranda, renuncians voluntati, judicio, amori proprio, ac libertati,

liberari, meque tibi resignans cum omnimoda in-  
differentia Te denique summum bonum meum  
suppliciter adoro, O precor per illam amaritudinem,  
quam sustinuisti pro me in cruce, maxi-  
mè in illa hora, quando anima tua egressa est de  
corpori tuo, ut misericordia anima mea in egressu  
suo.

Hæc postrema verba addita sunt, ut im-  
petras bonam mortem, & cum ea dicis, Christi  
corpus sumere intedes per modum Viatici,  
si ipsa die te mori contingat.

Sumpturus sanguinem considera te nihil  
habere, quo dignè possis pro Christi corpore,  
quod sumpsti, gratias agere; & ideo paris  
valoris sanguinem offerens dices magno spi-  
ritu verba illa, Quid retribuam Domino, cum  
sequentibus orationibus quæ sumpto san-  
guine dici debent.

Quia vero post Communionem aliqua  
mora intercedit, dum abluitur calix, compli-  
catur corporale, extenditur velum; ea du-  
rante eos affectus breviter & ferventer elicies,  
qui magnis Principibus exhiberi solent, cum  
alicujus domum dignantur invadere. Primo  
itaque tantum hospitem adorabis in ejus Di-  
vinitate & Humanitate 2. Gratias ages,  
quod ad te tam indignum venire dignatus sit,  
& pro aliis beneficiis generalibus & particu-  
laribus. 3. Splendidè eum tractabis præben-  
do illi omnia, quæ a te desiderat, detestando  
scilicet

scilicet omnia peccata ; renovando vota , & bona proposita ; proponendo ab iis abstine-re, quæ illi displicant, & facere semper quod melius est ; offerendo te paratum ad omnem crucem & molestiam . 4. Petes à tanto Rege qui omnia potest, quicquid tibi & aliis , vi-vis & defunctis est necessarium :

## §. XII.

*De postrema parte Missæ usque ad finem.*

Præcta communione sequitur gratia-  
rum actio , quæ est ultima Missæ pars  
incipiens à Versiculo , qui communio di-  
citur, ed quod olim caneretur, dum popu-  
lus communicabat. Sequentes autem ora-  
tiones, non solum gratiarum actionem con-  
tinent , sed etiam postulationem ut dona  
accepta in te permaneant, & majus quotidiè  
sumant incrementum. Tum dimittitur Po-  
pulus, & dum ille responderet, *Deo gratias* ,  
iterum gratias ages Deo. Ad orationem *Pla-  
usat tibi*, rursum offeres sacrificium purissima  
intentione , & cum omni desiderio trium-  
phantis ac militantis Ecclesiæ, prout ipsa ver-  
ba sonant. Deinde Populo benedicens ube-  
rem à Deo omnibus fidelibus benedictionē ,  
*omnibus*

omniumque cælestium gratiarum abundantiam ex animo precerberis, ut nunc in via, postea in patria Sanctissimam Trinitatem omnes glorifcent.

Leges demum in fine initium Evangelii secundum Joannem cum reverentia & affectu gratitudinis pro beneficio Incarnationis, & vocationis ad fidem, & cum desiderio gloriae Dei, ut ab omnibus agnoscatur, & glorificetur. S. Augustinus, ut gravissimi autores testantur, hoc Evangelium aureis litteris conscribendum, & per omnes Ecclesias in loco eminenti proponendum esse dicebat. Idem antiqui Christiani tanti faciebant, ut plerique collo appensum ferrent, tanquam alterum Christianæ fidei symbolum, ac veluti amuletum contra Dæmonum vexationes. In prima hujus Evangelii parte agnosces, quantus sit hospes, quem sub panis & vini velamine latenter suscepisti, nempe Verbum æternum, per quod omnia facta sunt, Filius Dei, Patri consubstantialis, hominum lux & vita per quem & in quo omnes vivunt & illuminantur. Expendes deinde ne forte ad te pertineant verba quæ sequuntur, Lux in tenebris lucet, & tenebra eam non comprehenderunt. Sicut enim homini cæco præsens est sol, sed ipsi soli absens est: sic homines terreni affectibus veluti tenebris obvoluti intimam Dei lucem non vident, nec ab ea illuminantur.

minantur. Hæc etiam verba ponderabis, In mundo erat, & mundus eum non cognovit: In propria venit, & sui eum non receperunt: ne & hæc forsitan in te locum habeant, quod ne contingat, Deum precaberis & timebis. In ultimis denique verbis attendes quod dicitur, *Dedit eis potestatem Filios Dei fieri*, & hoc in te adimpleri rogabis: & quia verbum diuinum plenum est gratiæ & veritatis, ex hac plenitudine ubertim haurire satages quicquid tibi ad salutem & perfectionem est necessarium.

## C A P. VI.

Quid agendum post Missam.

## §. I.

*Discessus Sacerdotis ab Altari, & quadam exercitia post Missam.*

**Q**uia finis bonorum operum debet esse gratiarum actio, ab Altari post sacrum discessurus, Canticum incipis trium puerorum, quo ad gratias pro tanto beneficio Deo agendas omnes creature invitas. Ipsum itaque recitabis dum pergis in sacristiam, dum te sacris vestibus exuis, omni possibili devotione atque ardentissimo affectu Deum benedicen-

nedicendi & superexaltandi propter ipsius infinitam bonitatem. Quo absoluto in persona Ecclesiæ, quæ illo concludi sacrificium præcepit, in locum te recipies ab omni strepitu & distractione remotum, in quo clauso ostio cordis tui, cæterisque cogitationibus exclusis, soli Deo vacabis, nec ab eo recedes, donec benedixerit tibi. Sunt quædam orationes variis affectibus plenæ, post Missam recitandæ, quas Sancti Doctores Thomas & Bonaventura composuerunt. Has si devotè & sedatè recitaveris, ponderatis verbis & sensibus, non erunt inutiles & infructuosæ. At si eas celeriter percurreris, ut nonnulli solent, statimq; recesseris, nulla protracta cum Christo mora; vide & considera, quām plenè tuæ conscientiæ satisficias. Nullum certè pietatis sensum habere convincitur, qui non libenter cum Deo manet. Nec valent prætextus negotiorum vel studii, quibus se repidi excusant: quod enim gravius & utilius negotiū, quam de animæ salute cum Deo tractare? Vel quid possunt docere libri, quod non Deus præsens melius doceat? Sicut igitur post prandium necessaria est quies à negotiis & laboribus, ut nativus calor cibum subigat, & in substantiali aliti convertat; ita post hoc convivium quies requiritur ab externis & humanis occupationibus, ut divinum sacramentum vim suam & virtutem in animam diffundat.

Et

Et primò quidem diversarum virtutum actus elicies: *Fidei*, confitendo Christum à te susceptum esse verè Deum , & hominem cuius divinitati & humanitati ea omnia convenient , quæ credit & docet Ecclesia. *Spei* , sperando ab ea multa bona naturæ , gratiæ , & gloriæ. *Charitatis* , elicito erga illum ferventissimo amoris affectu : gaudendo , quod ejus Divinitas tantæ sit eminentiæ , ut nullo modo comprehendendi possit : dolendo quod tot peccata contra illum & tu olim commiseris , & passim committantur. *Humilitatis* , considerando quis venerit , & ad quem: ponderando magnitudinem hujus beneficii , attentis peccatis tuis præteritis , statu præsenti , & perfectissimo gradu vitæ spiritualis , ad quem tendere debes , & à quo adhuc longissimè distas. *Desiderii & Zeli* , optando ut cessent peccata , impii convertantur , justi multiplicentur & profiant , & Deus ab omnibus glorificetur.

Deinde quinque sensus internos animæ circa Dominum præsentem exercebis. Et primò inspice illum in te ejus majestatem , & splendorem , manusque , pedes , & latus cum quinque splendidissimis vulneribus : aspice quod ipse sit Deus , Splendor paternæ gloriæ , & figura substantiæ ejus , tam excellentis pulchritudinis , ut omnes ipsum videntes beatos faciat. Concipe affectus

nunc

nunc reverentiae & humilitatis, avertens oculos à conspectu tantæ majestatis : mox gaudii & exultationis, tum laudis, & gratiarum actionis. 2. Audi quid loquatur in te, & disce ab eo veram morum emendationem, & veras virtutes. 3. Percipe odorem virtutum ejus & post eum curre, atque illum imitare: considera quoque quanta sit flagranta oblati sacrificii, quod suavissime olet æternō Patri. 4. Gusta quam suavis sit Dominus, & dulcissimo convivio corporis & sanguinis ejus recreatus propone mundi vilissimos cibos nunquam amplius degustare : cumque ipse sit summa jucunditas, statue de cætero non affici erga aliquam creaturam. 5. Tange eum, & ora ut perlustret cor tuum & omnia interiora tua, & virtus de ipsa exeat ad sanandum & vivificandum quicquid morbidum & vitiosum in te repererit: Pete etiam humiliiter osculum ejus & dic cum sponsa, Osculetur me osculo oris sui; & suspira ad intimam cum ipso unionem. Oscula quoque spiritualia figes pedibus, manibusque transfixis, & cæteris membris, quæ gravioribus tui causâ doloribus & vulneribus excrucianta fuerunt.

His demum alia exercitia adjunges , vel quæ infra describuntur, vel quæ tibi devotione suggestis ; quibus peractis, singulari cura cor tuum & sensus custodire satages, tantam

Dei

Dei dignationem crebrò per diem in memoriam revocabis, piis affectibus & aspirationibus acceptam gratiam conservabis, atque in omnibus te ita geres, ut in Christum, quem suscepisti, omnino transformatus videaris, virtutum ipsius imitatione, morum gravitate, & rerum omnium abdicatione.

## §. II.

*Actus Amoris post Missam.*

**A**Mo te, Domine Jesu, jucunditas mea, & requies mea; amo te summum & unicum bonum meum ex toto corde, ex tota mente, ex tota anima, ex totis viribus meis: & si tu vides me in hoc deficere, saltem desidero id multum desiderare. Succende, Domine, igne tuo ardentissimo viscera mea, & quandoquidem nos nisi amorem petis à me, da quod jubes & jube quod vis. Nisi enim dederis mihi velle & perficere, peribo utique in infirmitate mea. Sonat vox tua in auribus meis, vox illa dulcissima & efficacissima. Volo. Nam si vis potes me mundare, & illuminare; potes me ad supremum amoris gradum elevare. Sicut voluisti pro me pati & mori; ita etiam velis, ut appareat in me fructus passionis & mortis tue. Memento verbi tui servο

servo tuo, in quo mihi spem dedisti : tu enim  
dixisti, qui manducat meam carnem & bibit  
meum sanguinem, in me manet & ego in eo.  
O dulcissimum verbum, tu in me & ego in  
te! O quantus amor , tu in me vilissimo  
peccatore, & ego in te, Deus meus, cuius ma-  
jestas incomprehensibilis est ! Unum est  
mihi necessarium, & hoc solùm quero, in te  
vivere, in te quiescere, à te nunquam separa-  
ri. Felix est, qui te querit, felicior qui te  
possidet ; felicissimus qui in hac possessione  
perseverat & moritur. O dies infelices, quos  
turpiter transegi diligens vanitatem, & rece-  
dens à te ! Et nunc Domine, qui venisti in  
hunc mundum, ut peccatores salvos faceres,  
redime animam meam in sola fiducia misera-  
tionum tuarum respirantem, & aufer à me  
omnia amoris tui impedimenta. Procul sit à  
me omnis terrena delectatio, nihil sapiat mi-  
hi, nihil me alliciat nisi tu. Vive & regna  
semper in me, fidelissime amator animæ meæ,  
in te enim sunt omnia bona, & jam deinceps  
paratus sum omnia potius mala perpeti ,  
quam ut unquam cessem amare te. O cor-  
pus sacratissimum quinque vulneribus fau-  
ciatum , pone te ut signaculum super cor  
meum, & imprime illi charitatem tuam. Ob-  
signa pedes meos , ut sequar vestigia tua :  
obsigna manus , ut bona semper opera exer-  
ceam : obsignalatus, ut ferverentissimos a-  
moris

moris tui actus proferam in æternum. O sanguis pretiosissime , qui omnem hominem abluis & purificas, lava animam meam, & pone signum in faciem meam , ut nullum præter te amatorem admittam. O dulcedo cordis mei & vita animæ meæ , sicut tu in Patre, & Pater in te est ; ita ego per gratiam tuam unus tecum sim amore & voluntate: mihique mundus crucifixus sit, & ego mundo. Amen.

## §. III.

## Gratiarum Actio post missam.

**G**ratias tibi ago , benignissime Deus , quod me vilissimum peccatorem admittere dignatus sis ad vivificum tuæ mensæ convivium. Et quis sum ego pulvis & cinis, ut apponeres erga me cor tuum , inclinans cælos tuos & descendens , ut sanguine tuo purissimo lordes meas lavares, & deficien- tem præ fame animam meam non manna de cœlo , sed carne tua immaculata reficeres & satiates. Si cæli cælorum te capere non pos- sunt, & Angeli non sunt mundi in conspectu tuo , quis ego sum, & quæ domus mea , ut ad te venire , & indignis manibus meis

con-

contrectari, ac in me commorari volueris ?  
 Quid in me invenisti, Rex tremendæ maje-  
 statis, quod à templo gloriæ tuæ traheret te,  
 & descendere faceret in abyssum miseriarum ?  
 Vos Angeli sancti, Vos omnes electi Dei, ve-  
 nite, audite, & narrabo vobis , quanta fecit  
 Deus animæ meæ : cùm enim essem pauper  
 & abominabilis, nec auderem oculos meos  
 levare ad cælum præ multitudine iniquita-  
 tum mearum, ille me de pulvere suscitavit, e-  
 rexit de stercore, ut sederem cum Principibus,  
 & de mensa ejus comederem omnibus diebus  
 vitæ meæ. Gratias illi agite ex me vos amici  
 mei fidelissimi, ego enim puer sum non annis,  
 sed sensu, & nescio loqui, nec verba invenio,  
 quibus possim, ut par est, tam copiosum mu-  
 nus gratiæ extollere, & prædicare. Quis enim  
 amor infinitæ charitati ejus à me redi po-  
 test, qui frigus & gelu dici, non autem amor  
 mereatur ? Quæ laus, quæ adoratio, quale  
 obsequium meum erit, quod nullum non red-  
 dat infinita ejus perfectio & dignitas ; & ima  
 ac summa indignitas mea ? Sed tu Domine  
 miserator & clemens, & immensa bonitatis,  
 tu noiti figmentum meum, ne despicias hu-  
 millimam gratiarum actionem , quam tibi  
 offero de paupertate mea, & sacrificium lau-  
 dis meæ honorificabit te. Tua est magnifi-  
 centia, tua est gloria , & tibi laus in perpe-  
 tuas æternitates protam excello & incom-  
 parabili

S  
 &  
 offer  
 & ac  
 culta  
 tibi d  
 Et ex  
 habeo  
 sumu

parabili beneficio. Tibi laudes concinant, tibi mecum gratias agant universi populi, tribus & linguae; omnes Angeli & Sancti tui, quoniam misericordia tua magnificata est super me, & miserationes tuæ super omnia operatua. Jubilent tibi omnes creaturæ, quæcunque cæli, terræ, & abyssi ambitu continentur, & laudem tibi perpetuam dicant, quæ à te exiens in te refluat omnium rerum principium & finem. Jubilent tibi & gratias agant cor meum & anima mea, vires, sensus, potentiae, & omnia membra corporis mei: tibiq; soli sit honor & gloria, à quo, per quem, & in quo omnia: qui es Deus benedictus & laudabilis in sæcula sæculorum. Amen.

## §. IV.

*Oblatio post Missam.*

**S**icut tuus ego sum, Domine Deus meus, & pro tributo servitutis meæ aliquid tibi offerre vellem, quod majestate tua dignum & acceptabile foret: sed excedit omnem facultatem meam debitum meum, quia tantum tibi debedo, quanti tu vales, qui infinitus es. Et ex me quidem nihil possum, nihil sum: habeo tamen ex gratia tua donum præclarissimum, quod nullo modo recusare potes: ha-

G

beo

beo dilectissimum filium tuum Dominum  
meum Jesum Christum , qui ita se mihi  
communicavit, ut ego in illo, & ille in me  
sit. Quare verba Prophetæ tui aptissimè u-  
surpabo & dicam ; Benedic anima mea De-  
mino, & omnia quia intra me sunt nominis sancto-  
ius. Ipse enim Filius tuus dignè pro me  
nominis tuo benedicet, teque amabit, & glo-  
rificabit, nam intra me sacramentaliter exi-  
stens, factus est unum tecum, & ego unum  
cum illo. Ipsum igitur offero tibi velut thy-  
miana suavissimi odoris ad maximam tui  
gloriam & honorem, in gratiarum actionem  
pro universis beneficiis tuis ; in remissionem  
peccatorum meorum, & totius mundi, ad  
imperrandum mihi & omnibus, pro quibus  
oravi & orare debedo , omnia subsidia vite  
temporalis & æternæ, & pro animabus om-  
nium fidelium defunctorum. Suscipe, Do-  
mine, cum hac sacratissima oblatione ani-  
mam meam, & corpus meum, omnes vires &  
affectiones meos , ut sim perpetuum holocau-  
stum jugiter ardens Majestatis tue. Præsta  
ut deinceps nec membra nec sensus, nec po-  
tentias, nec vitam habeam, nisi ut te amem, &  
serviam tibi. Tu sapientia mea , tu lux mea  
es; tu fortitudo mea & robur meum : doce  
me, illumina me, corroborame, ut cognos-  
cam & faciam voluntatem tuam. Offero me  
tibi in servum perpetuum , meque totum  
resigno

resigno in beneplacitum tuum, abjecta de me omni cura & solicitudine. Quicquid mihi evenire permiseris, à divina manu tua amantissimè suscipiam. In tempore & in æternitate id volo, quod tu ab æterno de me deccevisti, sive prosperum illud sit, sive adversum. Vivat semper & regnet super me beneplacitum tuum, quod in omni verbo, actione, cogitatione, & levissimo quoque motu implere desidero. Domine ante te omne desiderium meum, & gemitus meus à te non est absconditus. Desunt enim mihi verba, quibus explicem affectum meum, sed projicio me in ardentissimam fornacem amoris tui, quo succensus ad me venire dignatus es, & mansionem apud me facere. Succende me Domine, inflamma cor meum, viscera combure, ut jugiter tibi ardeam, in te vivam, & in te moriar. Amen.

## §. V.

*Petitiones post Missam.*

Dulcissime amator, Domine Jesu Christe, qui me corpore tuo immaculato, & pretiosissimo sanguine refecisti, ignosce obsecro indignitati meæ, & quicquid deliqui in hujus Missæ celebratione, misericorditer indulge.

indulge Agnosco enim & confiteor præsumptionem meam, quia ad hoc tremendum mysterium accedere ausus sum sine debita præparatione, reverentia, humilitate, & charitate. Respice in me oculis misericordiæ tuæ, & supple excessu meritorum tuorum meam nimiam imperfectionem. Heu quoties vennisti ad me, ut pauperimam animam meam donis tuis locupletares? Ego autem contempsite, & abii in regionem dissimilitudinis post prava desideria cordis mei. Cumque inutiliter dissipata omni substantia ad tenuus & fame consumptus reversus sum, tu suscepisti me, & omnium iniquitatum mearum oblitus es. Bonum mihi quod amasti me amore æterno & infinito: nisi enim infinita esset bonitas tua, nullo modo posse tolerare miseriam meam. Vincat igitur & absorbeat bonitas tua malitiam meam. Riga melacrymis, quas fudisti pro me; ungeme myrrha doloristui, astriinge vinculis, ablue sanguine, cruce erige, morte vivifica. Penetret amor tuus viscera mea, & omnem alienum amorem expellat. Abscedat phantasmatum multitudo, meque totum in te transforma, ut in te pereat omnis substantia mea, meque amplius non inveniam nisi in te. Imprime cordi meo amorem crucis & humiliationis, qui ut me redimeres nec uno quidem momento sine cruce esse voluisti. Ne patiaris me sine fructu

fructu à te recedere, sed operare mecum mirabilia tua, sicut cum sanctis tuis operatus es:  
& fac me ambulare in fortitudine cibi istius usque ad montem perfectionis. Succende me ignita vi amoris tui, ut sim tecum consummatus in unum, omnino abstractus à me ipso,  
& ab omni creatura. Omnibus quoque famulis tuis, pro quibus obtuli hoc sacrificium,  
& pro quibus orare debo, seu tu rogari vis,  
pacem, salutem, & tuam benedictionem.  
Cóverte miseris peccatores ad te, revoca hæreticos atque schismaticos, illumina infideles te ignorantibus. Adesto omnibus qui in aliqua necessitate, & tribulatione constituti sunt. Esto propitius propinquis & benefactoribus meis. Miserere omnium adversantium mihi, vel qui me aliqua molestia affecerunt. Succurre illis qui se meis precibus commendarunt. Da vivis veniam & gratiam, da fidelibus defunctis lucem & requiem sempiternam. Amen

## §. VI.

*Aspiraciones post Missam ad B. Virginem,  
Angelos & Sanctos.*

**R**espice in me, Gloriosissima Virgo Maria,  
quia dignum objectum oculorum tuorum  
G 3

rum nunc factus sum. Loquere pro me bona dilectissimo filio tuo , qui me corpore & sanguine suo suavissime refecit, & offer ei merita tua in supplementum imperfectionis meæ. Gratias age ei pro me, & impetra mihi ut sacramentali sua præsentia non discedat à me nisi relinquat post se animæ meæ largissimam benedictionem.

Angeli sancti, ministri Dei altissimi, facientes verbum illius, aspicite Primogenitum Patris æterni , quem introeuntem in orbem terrarum Iussiu Patris adorastis, & facite me in eo spiritu & veritate illi servire , qua vos eidem in hac vita ministrastis, & nunc in cœlesti patria servitis.

Sancti Patriarchæ & Prophetæ, viri desideriorum , consciî secretorum Dei, intuemini promissum ab initio mundi Redemptorem , quem tam ardenter desiderastis, & tanto tempore expectastis , nec videre potuistis : facite me toto affectu ad ipsum suspirare , ut reliquæ promissiones ejus fideles inveniantur , & sentiam promissos hujus sacramenti effectus.

Apostoli Jesu Christi , ejusque Evangelii clarissimi Prædicatores , aspicite in me ipsum dilectissimum magistrum vestrum , quem tantoper dilexistis : & impetrare mihi ut intimis visceribus ipsum super omnia amem ejusque fervoris particeps siam , quem tunc

tunc experimentaliter gustastis, quando hoc  
cibo de manu ejus refecti fuistis.

Invictissimi martyres, Christum respicite  
crucifixum, pro cuius amore sanguinem ve-  
strum tam libenter fudistis, ipsumque orate,  
ut me semper in crucē vivere & mori faciat,  
quatenus vicem quam possum ejus dilectio-  
ni rependam.

Beati Pontifices, dominici gregis pasto-  
res, Agnum cernite immaculatum, quem  
omnipotenti Deo in sacro altari toties im-  
molastis; & vestris precibus facite me tanti  
sacrificii dignum ministrum, ut me ipsum  
bonis operibus perpetuō immolem tam sa-  
crae oblationi associatum.

Servi fideles Christi, Sancti Monachi & E-  
remitæ, videte dulcissimum Dominum ve-  
strum, pro quo omnia hujus mundi oblecta-  
menta, & affectu & re ipsa reliquistis; & fa-  
cite me pro ejusdem amore prospera mundi  
despicere, nulla ejus adversa formidare, & ad  
fastidium sanctitatis quantocius pervenire.

Purissimæ Virgines, sponsum vestrum in-  
tuemini, cui cum summa exultatione Virgi-  
nitatem vestram consecrastis, illibatam mihi  
mentis & corporis puritatem obtinete, ut hu-  
jus vitæ cursu peracto mundus ab omni labo  
in conspectu Domini merear præsentari.

Omnès Sancti & Sanctæ Dei, consolatio pau-  
perculæ animæ meæ, vos præsertim patroni  
& pro-

& protectores mei , aspicite magistrum , au-  
ctorem , & præmium sanctitatis vestræ , ac  
universam vestram felicitatem intra viscera  
mea manentem , mihi que ab ipso , cui vos  
tantoperè verbo & exemplo in hac vita con-  
formastis , vestris intercessionibus impetrare ,  
ut vestra semper vestigia sequar , & ut ad  
scopum mihi propositæ perfectionis , ac tan-  
dem plenus meritum ad vestrum merear con-  
sortium pervenire .

### CONCLUSIO EXERCITIORVM POST MISSAM.

**A**nima Christi sanctifica me : Corpus  
Christi salva me : Sanguis Christi inebria  
me : Aqua lateris Christi lava me : Passio  
Christi conforta me : O bone Jesu exaudi me :  
Intra tua vulnera absconde me : ne permit-  
tas me separari te : Ab hoste maligno defen-  
de me : In hora mortis meæ voca me : & ju-  
nbe me venire ad te : ut cum sanctis tuis lau-  
dem te . In sæcula sæculorum Amen .

Recedo à te modicum , Domine Jesu , sed  
non sine te , consolatio , felicitas , & omne  
bonum animæ meæ , & me amplissimæ di-  
lectioni tuæ cum omnibus fratribus , amicis  
& inimicis meis humillimè commendo . Ama  
nos , Domine , & transforma quam simillimè  
in te .

in te. Totus occuper in te, & propter te, nihilque sit objectum verborum actionumque mearum internarum & externarum, nisi tu amor meus. Qui vivis & regnas per omnia sæcula sæculorum. Amen.

*Cur multi ex frequenti celebratione  
non proficiant.*

Cum multi sint Sacerdotes, qui frequenter, multi etiam qui quotidiè celebrant; & nihilominus hujus vivifici ac divini sacramenti admirabiles fructus non percipiunt, necessarium procul dubio est tanti mali causas investigare. Unde enim in cura salutis tanta tepiditas, tanta in studio perfectionis negligentia; cum dicat Chrysostomus, opportere nos ab hac mensa recedere dæmonibus terribiles, & ignem, omni ex parte spirantes? Si Deus noster ignis consumens est, venitque in terras suum ignem ferens, qui ardeat & omnium corda comburatur: cur ipso intra nos recepto, nec frigus a nobis expellitur, nec ardorem ejus sentimus? Nonne mortis indicium est, vel gravissimæ ægritudinis ignem habere in sinu, & omni calore destitui? Si olim non potuit coram arca Domini statua Dagon subsistere, sed statim corruit & contrita est: cur Christi præsentia a-

moris proprii tyrannice in anima dominantis idolum non atterit & confringit ? Cur tanta Christi dimissio superbiæ spiritum non elidit ? Curtanta ejus mansuetudo iram non compescit. Curtantus amor ad ejus sequenda vestigia non impellit ? Effectus Eucharistiæ sunt præservare à peccatis , augere gratiam , terrenorum odium infundere , ad æternorum amorem mentem elevare , illuminare intellectum , succendere affectum , conferre animæ & corpori puritatem , conscientiæ pacem & lætitiam , atque inseparabilem cum Deo unionem . Plerique tamen post frequentem celebrationem his effectibus non fruuntur , ad quos nimis spectat Aggæi Prophetæ objurgatio dicentis , *Comedistis & non estis satiati : bibistis & non estis inebrinati.* Defectus autem non in cibo & potu est , sed in prava edentis & bibentis dispositione . Et hæc prima tanti mali causa est , quia aliud comedimus , aliud esurimus : comedimus panem Angelorum , & iumentorum animalium siliquas esurimus , deteriores Israelitis , qui dum manna commederent in deserto , ad ollas Ægypti suspitabant . Quid igitur miramur , si fauces amaritudine infectæ mellis dulcedinem non percipiunt ? Purganda est anima à delectationibus carnis & sensuum , à cœpeditate , ab omni affectu ad creaturas , ut possit divinum sacramentum suos in ea effectus

effetus operari. Nam cor terrenis occupatum delectatio sancta declinat, nec datur divina consolatio admittentibus alienam.

Altera causa est omissio necessariæ præparationis: plerique enim ad tantum ministerium accedere non verentur perfunctoriæ, ex consuetudine, ex motivo humano, lucri potius quam devotionis causa, non considerantes quantioneris sit vel semel celebrare. Cum vir Apostolici spiritus Joannes A-vila quemdam Sacerdotio paulò antè initiatum immaturâ morte discessisse audisset, statim quæsivit num aliquando celebrasset: respondentि verò semel dumtaxat; Multum inquit deferet ante Judicem. Timere itaque oportet quia nemo dignè Sacerdotio fungi, nemo hujus sacramenti fructus percipere potest, nisi, quantum fert humana fragilitas, se ad illud disponat ea puritate, amore, & devotione; quæ suprà à nobis explicatae sunt.

Tertia demum causa est, quia multi sacro peracto ad exteriora statim divertunt, nec sinunt ut sacramentum suum in eis virtutem exerceat. Isti reverà gratiam Dei in vacuum recipiunt, nec de mensa cœlesti fructum reportant; quia tantum Dominum ad se venientem indignè excipiunt, nec reverenter, aut gratias agunt;

imò protinus ab eo recedunt, ipsumque contrastant, majestatem ejus & incomprehensibilem dignitatem parvipendentes ; nec adveritentes quanta sit fecunditas, vilitas & miseria ipsorum ad quos venire dignatus est. Quod si exhibita omni diligentia ad dignè & devotè celebrandum, contingat aliquem hujus convivii fructibus minime perfrui, id admirabili sapientiæ Dei adscribendum est, qui hoc permittit, ut suæ industriæ non tribuat homo hoc gratiæ donum, sed cautè illud custodiat , & se illo semper indignum profiteatur.

## C A P. VII.

Praxis celebrandi , cum quis prolixius orare non potest.

## §. I.

## De Preparatione.

**Q**uamvis humana negotia divinis functionibus nullo modo æquari, nec dum præferri debeant: quia tamen sunt aliqui sacerdotes publicis utilitatibus inservientes , qui necessariis & inevitabilibus occupatiibus ita aliquando detinentur, ut prolixius orare

orare nequeant ; brevem illis & expediam  
proxim proponere necessarium duxi, quau-  
ti possint, cum celebrare voluerint, ne minus  
digne divinum sacrificium offerentes, ejus  
fructibus priventur. Hæc autem tria tempo-  
ra complectitur, id quod Missam antecedit,  
id quo perficitur, & quod proximè subse-  
quitur.

Ante missam præmittenda præparatio du-  
plex, remota & proxima Pro remota hæc ser-  
vanda. Vespere præcedenti cogitet se die cra-  
stinâ hostiam salutarē omnipotenti Deo ob-  
laturū eiq; cogitationi indormiat. Addat bre-  
vem aliquem affectum reverentiæ, amoris,  
& desiderii. Sequenti die in eadem cogitatio-  
ne & affectu evigilet ; caveatque diligenter,  
ne animus ita se negotiis immergit, & ad ex-  
terna dilabatur, ut cum tempus celebrandi  
advenerit, ad se revocari & recolligi non  
possit. Proximè ante sacrum terrenis omni-  
bus cogitationibus abjectis, omnique sepo-  
sita rerum agendarum sollicitudine, mentem  
erigat ad cælestia. Perpendat qua devotione  
se sentiat ad celebrandum incitari, quo fine  
moveatur. Conscientiam excutiat & si ali-  
quam ei maculam inesse deprehenderit, sa-  
cramentali confessione eluat cum intimo do-  
loris sensu, & firmo proposito emendationis.  
Tum breve aliquid tempus sumat, quo fi-  
dem mysterii exciter, charitatem accendat,  
passio-

passionem Domini commemoret, dirigat intentionem, & Dei opem sibi & aliis flagitet. Auxilium quoque B. Virginis & Sanctorum ferventer & humiliter implorabit. Horum actuum & affectuum formulas suprà descripsimus cap. 4. quas sibi quisque in brevissimas aspirationes redigere poterit pro suo captu & devotione.

## S. II.

*De Celebration.*

**M**issa celebrationi tres comites adjunget, reverentiam, attentionem, & devotionem. Reverentia omnes motus extei-  
riores compónit, ut modestè graviterque  
fiant, præscriptis cæremoniis exactissimè  
servatis, summaque adhibita humilitate,  
quæ omnino necessaria est hostiam immaculatam offerenti in conspectu Dei & An-  
gelorum. Attentio mentem coerct, & iis  
qua aguntur affigit, nead alia defluat & e-  
vagetur. Devotio voluntatem inflammat,  
ne languide & ex consuetudine sacris ope-  
retur, sed cum ingenti fervore, sclerique  
studio Deum placandi & colendi. Quia  
verò animus parum tenax recti facile di-  
strahitur, quibusdam quasi vinculis adstrin-  
gi de-

sgi debet, & in se retineri, qualia sunt à me  
uprā proposita capite quinto, quæ ut ibibem  
notavi, brevitati Missæ nullum afferunt im-  
pedimentum. Sunt etiam aliqui, qui in sep-  
tem veluti stationes Missam partiuntur, ut in  
singulis congruos excitent affectus, & reno-  
vent attentionem. Prima dicitur *Contritionis*,  
quæ ante gradus Altaris peragit, ubi sa-  
cerdos tanquam reus se summi Judicis tribu-  
nali corde contrito præsentat, & generali  
confessione noxas expiat. Secunda *Glorifica-  
tionis*, quæ Missæ introitu, Angelorum canti-  
co, & reliquis usque ad Epistolam contine-  
tur. Tertia *Doctrina* sive instructionis, quæ  
Epistolam & Evangelium complectitur,  
monita scilicet salutis à Prophetis, ab Apo-  
stolis, & ab ipso Christo nobis tradita, &  
cum ingenti reverentia suscipienda. Quar-  
ta *Fidei*, quæ symbolo absolvitur. Quinta  
*Oblationis*, hostiæ salutaris oblationem con-  
tinens, omniumque fidelium, pro quibus  
oramus & offerimus, commemorationem.  
Sexta *Communionis*, ab illis verbis *Com-  
municantes* usque ad post communionem,  
qua sacerdotis animus in sublime erigitur,  
variisque affectibus ad divinam unionem,  
quæ communione peragit, se disponit.  
Septima, *Gratiarum actionis* à postcommu-  
nione usque ad finem. Porro in singulis  
stationibus variis affectus excitari possunt,  
raptim

raptim quidem & breviter, sed brevitatem intensio affectuum , atque ardor devotionis compensabatur.

## §. III.

## De Gratiarum actione.

**Q**uartuor post Missam præstanta sunt , quorum primum & præcipuum est Gratiarum actio , secundum Oblatio, tertium Petitio, quartum Propositum digne coram Deo ambulandi. Gratiarum actio quanto exactius fiet, tanto erit copiosior oblati sacrificii fructus. Sicut enim ingratitudo fontem divinæ largitatis excitat, ita gratitudo torrentem aperit cœlestium benedictionum. Potest autem hic affectus multis & variis modis excitari, quos unctio suggesteret, & ingeniosa pietas excogitabit. Hoc unum est, quod à nobis expectat Deus, ut grati simus, & memores beneficiorum ejus. Sequitur oblatio, qua par pari Deo reddere Sacerdos potest filium ejus Unigenitum & consubstantialem ei offerendo. Seipsum quoque offeret Patri & Christo holocaustum acceptabile in odorrem suavitatis : & quod gravior sit oblatio , merita ei addet B. Virginis & omnium Sanctorum, ac ipsius Christi, qui est salus, redemptio,

demptio, & tota fiducia nostra. Quia verò cum Filio omnia nobis Pater donavit, ipsum pro suis & aliorum necessitatibus humiliter & ferventer deprecabitur. Horum actuum formula in promptu habenda erit, potestque ex his excripsi, quæ superiori capite descripta sunt. Tandem concludet efficaci proposito eundi de virtute in virtutem in conspectu Dei, donec ad apicem Christianæ perfectiōnis perveniat.

## §. IV.

*Aspirationes post Missam sàpè per diem repetenda.*

**Q**uis me separabit à charitate tua Domine Deus meus? Non timor mortis, quia tu es vita mea : non amor mundi, quia ipsum sperno & omnes pompas ejus : non tribulatio, quia tu dum tribulor tecum es : non fames, non nuditas, non paupertas, quia tu es cibus meus, operimentum meum, & divitiæ meæ : non persecutio, non gladius, quia hæc dulcia mihi sunt propter te : non creaturæ, quia ante tenihil sunt.

Quando educes me de isto carcere, cui te reliquo adhæsit anima mea? quando trahes me post

me post te captum specie tua & pulchritudine tua? Quando mihi & toti mundo mortuus ero, ut in te solo vivam; & tu vivas in me? O si semper te amarem, te semper possiderem, à tenunquam discederem, in te prorsus converterer?

Quid possum extra te desiderare, cum in te sint omnia bona? Nimis avarus est, cui tu non sufficis.

O amor qui omnia potes, quando facies ut diligam te toto corde, tota anima, totis viribus?

Quid mihi est in cælo, & à te quid volui super terram? Jam plenum est desiderium meum, plenum gaudium cordis mei, quia tu es plenitudo mea, omne bonum & desiderium meum.

Refice Domine esurientem animam meam, accende frigiditatem meam igne amoris tui, illumina cæcitatem meam claritate præsentiae tue.

Verte mihi omnia terrena in amaritudinem, omnia infima & creata in contemptum & oblivionem.

Erige cor meum ad te in cælum, & ne permettas me vagari super terram.

Penetret quæso hujus sacramenti virtus omnia intima mea, & quicquid in me pravum, quicquid vitiosum est, mortificet & eradicet.

In te

In te Jesu suavissime, sit omnis delectatio  
mea: tædeat me gaudii quod est sine te,  
amaram hi sit omnis quies, quæ non est  
in te.

Emitte ex te, benignissime Jesu, amoris  
tui radios qui me succendant, & quicquid  
terrenum in me est comburant & consu-  
mant, ut igne inextinguibili charitatis tuæ  
ardeam, & vetus in me homo totus deficiat.

Utinam me rapiat ignita vis amoris tui ,  
quæ me transformet in te, & in te absorbeat,  
ac me tecum unum efficiat.

F I N I S.

INDEX

# INDEX

**C**ap. I. *Quedam pramittuntur de ipso Missa sacrificio.*

- |   |         |
|---|---------|
| §. 1. <i>Quale sacrificium sit Missa</i>                | Pag. 6. |
| §. 2. <i>De his qui offerunt hoc sacrificium.</i>       | 8       |
| §. 3. <i>De vi effectiva hujus sacrificii.</i>          | 10      |
| §. 4. <i>De valore &amp; fructibus sacrificii.</i>      | 13      |
| §. 5. <i>Qua praxis servanda in applicatione Missa.</i> | 17      |

**C**ap. II. *De requisitis in Sacerdote ad ritè & pie celebrandum.*

- |  |    |
|--|----|
| §. 1. <i>De puritate vita.</i>           | 20 |
| §. 2. <i>De rectitudine intentionis.</i> | 23 |
| §. 3. <i>De actuali devotione.</i>       | 25 |

**C**ap. III. *Varia considerationes ante missam.*

- |  |    |
|--|----|
| §. 1. <i>Quanta sit Sacerdotum dignitas, &amp; quanta debeat esse sanctitas.</i> | 27 |
| §. 2. <i>De excellentia hujus sacrificii.</i>                                    | 29 |
| §. 3. <i>De ejusdem necessitate.</i>   | 32 |
| §. 4. <i>Qua reverentia celebrandum sit.</i>                                     | 34 |
| §. 5. <i>Alia considerationes ad pios affectus in celebrante excitandos.</i>     | 37 |

**C**ap. IV. *De his qua Missa celebrationem proximè antecedunt.*

- |   |          |
|---|----------|
| §. 1. <i>De necessitate preparationis.</i>            | 40       |
| §. 2. <i>De pramittenda confessione sacramentali.</i> | 42       |
| §. 3. <i>Modus confitendi.</i>                        | 45       |
|   | §. 4. O- |

# INDEX.

- §. 4. *Oratio ante confessionem & actus contritionis.* 47  
§. 5. *Oratio post confessionem.* 50  
§. 6. *Directio intentionis ante Missam.* 51  
§. 7. *Deprecatio pro omnium necessitatibus.* 54  
§. 8. *Specialis oblatio sacrificii quatenus est latreuticum.* 58  
§. 9. *Oblatio sacrificii quatenus est Euchristicum.* 59  
§. 10. *Oblatio sacrificii quatenus est propitiatorium.* 64  
§. 11. *Oblatio sacrificii quatenus est imperatorium.* 65  
§. 12. *Actus diversarum virtutum ante Missam.*  
    *Fidei.* 69  
    *Spei.* 71  
    *Charitatis.* 72  
    *Desiderii.* 73  
    *Gratitudinis.* 74  
    *Timoris.* 76  
    *Humilitatis.* 77  
§. 13. *Commemoratio Dominica Passionis ante Missam.* 79  
§. 14. *Oratio ante Missam ad Patrem.* 82  
§. 15. *Oratio ante Missam ad Dominum Iesum Christum.* 83  
§. 16. *Alia Oratio ad eundem.* 86  
§. 17. Q.

## INDEX.

- |  |      |
|--|------|
| §. 17. Oratio ad Spiritum Sanctum.                                   | 87   |
| §. 18. Oratio ad B. Virginem.  | 89   |
| §. 19. Oratio ad sanctos Angelos.                                    | 90   |
| §. 20. Invocatio omnium Sanctorum                                    | 91   |
| <b>Cap. V. De Missa celebratione.</b>                                |      |
| §. 1. De proxima dispositione ad Missam.                             | 94   |
| §. 2. De sacris vestibus, & earum significazione.                    | 97   |
| §. 3. De accessu Sacerdotis ad altare.                               | 101  |
| §. 4. De initio Missa usque ad Introitum.                            | 105  |
| §. 5. De Introitu usque ad Epistolam.                                | 110  |
| §. 6. De Epistola, Evangelio, & Symbolo.                             | 111. |
| §. 7. De Offertorio usque ad Canonem.                                | 114  |
| §. 8. De Canone usque ad Consecrationem.                             | 119  |
| §. 9. De Consecratione usque ad Orationem Dominicam.                 | 124  |
| §. 10. De Oratione Dominicana usque ad Communionem.                  | 129  |
| §. 11. De Communione.  | 131  |
| §. 12. De postrema parte Missa usque ad finem.                       | 135  |
| <b>Cap. VI. Quid agendum post Missam.</b>                            |      |
| §. 1. Discessus Sacerdotis ab altari & quodam exercitia post Missam. | 137  |
| §. 2. Actus Amoris post Missam.                                      | 141  |
| §. 3. Gratiarum Actio post Missam.                                   | 143  |
| §. 4. Ob-  |      |

## INDEX

§. 4. Oblatio post Missam.	145
§. 5. Petitiones post Missam.	157
§. 6. Aspirationes post Missam ad B. Virginem, Angelos & Santos.	149
Conclusio exercitiorum post Missam.	152
§. 7. Cur multi ex frequenti celebratione non proficiant.	153
Cap. VII. Praxis celebrandi, cum quis prelixius orare non potest.	
§. 1. De preparatione.	156
§. 2. De celebratione.	158
§. 3. De Gratiarum actione.	160
§. 4. Aspirationes post Missam.	161

Imprimatur.

Si videbitur Reverendiss. Patri Magistro  
Sac. Palat. Apost.

M. Episc. Arimin. Vicesgerens.

---

Imprimatur.

Fr. Hyacinthus Libellus Sac. Pal.  
Apost. Magist.



